

ARRÜNA URRIA MANITACARRÜ COROBO UITI SAN MATEO

Arrübama primero pünanaquiti Jesucristo

1 ¹Tone nüri bama pünanaquiti Jesucristo tücañe, bama ipiarientetorrri David y arrti Abraham.

²Arrti Abraham tonenti yaütoti Isaac. Arrti Isaac tonenti yaütoti Jacob. Arrti Jacob tonenti yaütoti Judá, y arrübama yaruquitorrti. ³Arrti Judá tonenti yaütoti Fares ichepeti Zara. Nipiacütorrüma nürirri Tamar. Arrti Fares tonenti yaütoti Esrom, naqui yaütoti Aram. ⁴Arrti Aram tonenti yaütoti Aminadab, naqui yaütoti Naasón. Arrti Naasón tonenti yaütoti Salmón. ⁵Arrti Salmón tonenti yaütoti Booz. Nipiacütoti nürirri Rahab. Arrti Booz tonenti yaütoti Obed. Nipiacütoti Obed nürirri Rut. Arrti Obed tonenti yaütoti Isaí. ⁶Arrti Isaí tonenti yaütoti yüriaburrü David. Arrti yüriaburrü David posoti aübu nicüpostoti Urías y anati aütorrüma nürirrti Salomón.

⁷Arrti Salomón tonenti yaütoti Roboam. Arrti Roboam tonenti yaütoti Abías naqui yaütoti Asa. ⁸Arrti Asa tonenti yaütoti Josafat. Arrti Josafat tonenti yaütoti Joram naqui yaütoti Uzías. ⁹Arrti Uzías tonenti yaütoti Jotam. Arrti Jotam tonenti yaütoti Acáz. Arrti Acáz tonenti yaütoti Esequías. ¹⁰Arrti Esequías tonenti yaütoti Manasés. Arrti Manasés tonenti yaütoti Amón. Arrti Amón tonenti yaütoti Josías. ¹¹Arrti Josías tonenti yaütoti Jeconías ichepe bama yaruquitorrti au manu tiemporrü nauquiche süromatü bama israelitarrü au Babilonia presoma ui masortaboca babiloniorrü.

¹²Auqui arrti Jeconías tonenti yaütoti Salatiel, naqui yaütoti Zorobabel. ¹³Arrti Zorobabel tonenti yaütoti Abiud. Arrti Abiud tonenti yaütoti Eliaquim, naqui yaütoti Azor. ¹⁴Arrti Azor tonenti yaütoti Sadoc. Arrti Sadoc tonenti yaütoti Aquim. Arrti Aquim tonenti yaütoti Eliud. ¹⁵Arrti Eliud tonenti yaütoti Eleazar. Arrti Eleazar tonenti yaütoti Matán. Arrti Matán tonenti yaütoti Jacob. ¹⁶Arrti Jacob tonenti yaütoti José iquiana Mariarrü, nipiacütoti Jesús, naqui Cristo.

¹⁷Abe catorce familiarrü auquiti Abraham hasta artti yüriaburrü David. Auquiti David hasta numo süromatü au Babilonia abe ito catorce familiarrü. Auqui manu tiemporrü hasta numo anati icu cürrü Cristo abe ito catorce familiarrü.

Anati icu cürrü Jesucristo

¹⁸Sane numo aübo anati icu cürrü Jesucristo: Arrüna nipiäcütoti nürirri Mariarrü. Comprometebo apo aübuti taman ñoñünrrü nürirrti José.

Chüposopümainqui, pero tanancati ipiaümacarrü icütüpü ui noñemarrti Espiritu Santo. ¹⁹Arrti José champü causane au nisüboriquirrti.

Chirranrrtipü uraboiti isucarü genterrü arrüna nipünate au ñaquiöncorrti.

Sane nauquiche rrantipü aiñocoti Mariarrü anecanatai, tapü cuaso ui macrirrtianuca.

²⁰Numo anancati ñapensatioti arrüna sane, tamanti ángel auqui napese itusiancanatiyü isucarüti au nipoquirrti, nanti ümoti:

—José, arricü auqui nesarrti familiarrü David, tapü airruca asuriu Mariarrü acüposüböcü, itopiqui artti maniqui aürrü anati icütüpü, ta ui noñemarrti Espiritu Santo. ²¹Arrtü tanati icu cürrü aiña üriboti Jesús. Itopiqui uiti ñana taesüburuma macrirrtianuca eanaqui nomünantü.

²²Nanaña arrüna pasao sane, nauqui acoco arrümanu nurarrti Tuparrü tücañe turuquiti profetarri:

²³Arrümanu cupiquirri chisuputaratiquipü ñoñünrrü, anati ñana ipiaümacarrü icütüpü, nürirrti Emanuel.

Auqui besüro arrüna nürirrti nantü: Anati Tuparrü uyarrüpecu.

²⁴Nauquiche sütopücoti José, isamutenti sane tacana arrüna yacüpuccurrti maniqui ángel ümoti. Yasutiuti Mariarrü icüpostoboti.

²⁵Pero anatiatai ichepe champü causane uiti ümo, cheperrtü tanati icu cürrü maniqui ipiaümacarrü. Numo tanati icu cürrü süro üriboti Jesús.

Yapaseaca bama estudiaboma ñome nostoñeca

2 ¹Arrti Jesús anati icu cürrü au manu pueblurrü nürirri Belén, au manu cürrü nürirri Judea, au na cauta nacarrti yüriaburrü Herodes.

Au manu tiemporrü iñataimia au Jerusalén manuma mañoñunca cuamatü auqui tauna ümo tansürü. Arrüma estudiaboma ñome arrüba nostoñeca abe icu napese. ²Ñanquitioma pünanaqui macrirrtianuca cauta nacarrti maniqui üriatu bama israelitarri maniqui aübo anati icu cürrü. Namatü:

—Sumarrtai taha arrüna auquiche sobetü arrümanu nocoborese nibiasarurrti. Uirri nauquiche sobetü supanaun ümoti.

³Nauquiche ipiatenti yüriaburrü Herodes arrüna sane, chümarrtacarrüpatái ümoti. Namanaiña macrirrtianuca au Jerusalén, chümarrtacarrüpatái ümoma.

⁴Auqui oberabarama uiti Herodes arrübama üriatu bama sacerdoterrü y arrübama manunecana nüriacarrü nauqui anquiriotti pünanaquimia. Cauta ñana anati icu cürrü maniqui Cristo. ⁵Arrüma namatü:

—Anati ñana icu cürrü au pueblurrü Belén, auna cürrü Judea, itopiqui ane corobo tücañe uiti maniqui taman profetarrü sane:

⁶Nanti Tuparrü:

Arraño bama pohoso au Belén yarusürürrü año eanaqui bama auqui piquiataca puebluca au na cürrü Judea, itopiqui auqui naubesa pueblurrü anati ñana taman yüriaburrü naqui bacuirarabo itacu niyesa genterrü Isarel.

⁷Auqui arrti Herodes anecanatai yatasucurrti ümo manuma mañoñünca cuamatü auqui tauna ümo tansürü nauqui anquirioti pünanaquimia, isane nanenese tücañe arrtaimia manu nocoborese.

⁸Nanti ümoma:

—iAmecosi au Belén apanquisio nurria arrtü tanati icu cürrü maniqui ñäüma! Arrtü tütabücoti aboi, aburasoi isucarüñü nauqui yerotito rranaun ümoti.

⁹Arrümanu nocoborese arrtaimia auqui niporrüma, cusürübo aübuma, tochenco onü taman porrü arrümanu cauta anati maniqui ñäüma. ¹⁰Arrümanuma mañoñünca pucünuñama nurria, nauquiche tarrtaimia manu nocoborese ane onü manu taman porrü. ¹¹Numo süromampo besüro narrtarrüma ümoti maniqui ñäüma, anati ichepe nipiäütoti. Auqui bachesoiyoma esati y manaunuma ümoti. Yaübutama nibiauririmia, auqui macumananama ümoti, oro, rroriocorrü y mirra. ¹²Au manu tobirri arrti Tuparrü nanti ümoma au niposiquirrimia:

—Champürrtü urria arrtü apasücübüca tato au niporrti yüriaburrü Herodes. Sane nauquiche basücübücoma tato besüro uimia au niporrüma auqui quiatarrü cutubiurrü.



(Mt. 2.11)

Niyesüburrti Jesús au Egipto

¹³Nauquiche tüsüroma tato manuma mañoñünca, tamanti ángel itusiancanatiyü isucarüti José auqui nipoisiquirrti, nanti sane:

—iAtütsai aiquiarrti maniqui ñaüma aübu nipiácütoti. Acosi au Egipto. Acamanu asiquia cheperrtü surapoi tatito asucarüci! Itopiqui arrti yüriaburrü Herodes rranrrti apacheriuruti naqui ñaüma, nauqui aítabajotiti.

¹⁴Auqui arrti José atüraití, iquianatiti maniqui ñaüma aübu nipiácütoti au manu tobirri. Besüburuti aübuma au manu cürrü nürirri Egipto. ¹⁵Taha süsioma chepe numo coiñoti maniqui yüriaburrü Herodes. Arrüna sane pasao nauqui acoco arrümanu turapoíticaü Tuparrü tücañe turuquiti taman profetarrü. Nanti sane: “Rraemenca iyoti isaü na ayeti tato auqui Egipto”.

Bacüpuruti yüriaburrü Herodes nauqui ataborimia masiomanca

¹⁶Nauquiche tütusio ümoti yüriaburrü que arrümanuma mañoñünca encañaoma ümoti, chümarrtacarrüpatai ümoti ui nitüborirrti. Sane nauquiche bacüpuruti nauqui ataborimia namanaiña bama mañaümanca au manu pueblurrü Belén y au manu cürrü saimia. Taborioma uimia arrübama aübo aboma icu cürrü, hasta bama tütabe torrü añorrü ümoma. Itopiqui ta tütabe torrü añorrü niplasaca manu nanenese anche tücañe arrtaimia nocoborese manuma mañoñünca cuamatü auqui tauna ümo tansürü. ¹⁷Sane cocono caüma arrüna corobo uiti profetarrü Jeremías tücañe. Nanti sane:

¹⁸Rabotü taman tosibirri au manu pueblurrü Ramá y fuerte nareocorrü y suchequirri.

Arrümanu areoro ta Raquel, areoro ui nisuchequirri isiu bama aürri itopiqui chauqui tücoiñoma, chirranrrüpü nauqui anati naqui ipucünumucuta.

¹⁹Nauquiche tücoiñoti yüriaburrü Herodes, tamanti ángel esauquiti Tuparrü itusiancanatiyü isucarüti José au nipoisiquirrti nauquiche anancatiqui au Egipto, nanti sane ümoti:

²⁰—Atütsai, aiquiarrti maniqui ñaüma aübu nipiácütoti y acosi tato au cürrü Israel, itopiqui chauqui tücoiñoma manuma rranrrüma aítabajomati naqui ñaüma.

²¹Auqui arrti José atüraití, iquianatiti maniqui ñaüma aübu nipiácütoti. Basücübücoma tato au manu cürrü Israel. ²²Nauquiche tipiatenti José que arrti Arquelao matoconoti itoboti Herodes naqui yaütoti, birrubuti José aüroti tato au Judea. Arrti ángel manitanati ümoti au nipoisiquirrti, nauqui aürotitü au manu cürrü nürirri Galilea. ²³Nauquiche tiñataimia au Galilea, süromatü avivimia au manu pueblurrü nürirri Nazaret. Arrüna sane pasao nauqui acoco arrüna turapoiimia bama profetarrü tücañe, que arrti Jesús tiene que nürirrtito uimia Nazareno.

Arrti Juan Bautista urapoiti nurarrti Tuparrü eana rroense

3 ¹Au manio naneneca tücañe, arrti Juan Bautista cuati au manu rroense Judea, nauqui anunecati. ²Nanti sane:

—Apíñorroncosaño nauqui urria nausüboriqui, itopiqui tüsaimia tiemporrü nauqui üriaburuti Tuparrü.

³Artri profetarrü Isaías turapoiti tücañe. Nanti sane:

Rabotü taman tosibirri eana rroense.

Nantü sane:

“iApicoñooco cutubiurrü cümenuti Señor, y apipesünaca nurria!”

⁴Naibirrti Juan tücañe niqui manu numuquianrrü camello, nipoñoentorrti taquirrtai. Niyaratarrti pururrü nubasoroca y nuhurrrü eanaqui nüunrrü. ⁵Cuamatü esati arrüabama auqui Jerusalén y auqui manu cürrü Judea y auqui taha saimia manu sapoco nürirri Jordán. Cuamatü onsaperioma arrüna nurarrti. ⁶Urapoimia isucarüti Juan nanaiña arrüba nomünantü uimia, ürioma uiti eana turrü au manu sapoco nürirri Jordán.

⁷Süromatito esati Juan sürümanama bama fariseorrü y saduceorrü, nauqui ürimia uiti. Auqui nanti ümoma:

—iNiñupariente noirrobo! ¿Quitipü urapoiche ausucarü nauqui puerurrü aupesübu ñünana cuabotü carrticurrü tütane saimia? ⁸Artrü aurrianca aupesübu, apisamune arrüna urria, na atusi ta apíñorroncosaño ñemanauncurratöe. ⁹Tapü abasiquia apapensa que arraña ui na abecatü eanaqui nesarrti familiarrü Abraham champü nümoche apíñorronconaño. Itopiqui arrti Tuparrü puerurrü aisamunenti ipiarienteboti Abraham oboi arrüba canca. ¹⁰Chauqui totoro nurria hacharrü nauqui atüsü ba sueca. Arrüba sueca churriampü nobütarrü botüsüro. Amontonabohio nauqui abü.

¹¹Artri Juan nantito sane:

—Ñemanauncurratöe arrüñü rraunimiaca ui turrtai, nauqui atusi que chauqui tapiñorroncocaño. Pero sucanañü ito aume: Anati naqui cuatiqui isiuñü. Artri maunimianati uiti Espíritu Santo y ui pese. Ane manrrü nüriacartri rropünanaquiñü, arrüñü chiyaserebiquiapü ni iñeniompü nisapaturrti. ¹²Artri chauqui tacomoraboti nauqui asucüti nesarrti trigo. Arrümanu trigo iñatati peese pünanaqui niyarrrirri. Arrümanu niyarrrirri amontonabo uiti y tiene que acheti pese ümo. Arrümanu pese champü nitacüru noncorrü. Tapü trigo ahüburu uiti.

Nüriquirrti Jesús

¹³Auqui iñataiti Jesús auqui Galilea au manu sapoco nürirri Jordán, auna cauta anancati Juan Bautista. Rranrrti nauqui üriti uiti Juan.

¹⁴Chirranrrtipü baeta Juan aiñaunimianatiti, nanti ümoti Jesús:

—Arrüñü tiene que isüri obi, ¿causane ayetü yesañü nauqui üri sobi?

¹⁵Aiñumuti Jesús, nanti:

—Añaunimiasañüantai, itopiqui tiene que uicoco nanaiña arrüna yacüpucurrü Tuparrü. Sane nauquiche arrti Jesús ürioti uiti Juan.

¹⁶Nauquiche tüchauqui nüriquirrti Jesús, süroti tato taiyiritu eanaqui turrü. Au manu rratorrü aurübo napese, auqui asaratitü ümoti Espíritu Santo, cuati onüti tacana naca nututaquimia. ¹⁷Auqui rabotito taman manitacarrü auqui napese, nantü sane:

—Tonenti naqui Isaiü, naqui chiyaupü nicuarrrti iñemo, tarucu nipucünuncu icuatati.

Macocotorrü ümoti Jesús

4 ¹Auqui manu sürotitü Jesús uiti Espíritu Santo eana manu rroense auna cauta pururrü canca y cüosorrü, nauqui aüro macocotorrü ümoti uiti choborese.

²Cuarenta naneneca y cuarenta tobiquia nacarrti chübasotipü. Auqui onquisioti nicürüpürri.

³Auqui caüma sürotitü choborese esati, nauqui aiñanti ñacocotorrti ümoti. Nanti sane:

—Arrtü ñemanauncurratoe arrücü Aütorrti Tuparrü aisamusio pan arrüba canca.

⁴Auqui aiñumuti Jesús, nanti:

—Nantü au Nicororrü: “No solamenterrü ui pan osüboriquia. Arrtü uicocota nurarrti Tuparrü, uirri ito osüboriquia”.

⁵Auqui manu arrti choborese iquianatiti Jesús au manu pueblurrü nürirri Jerusalén. Iquianatiti onü manu yapetairratoe niporrti Tuparrü. ⁶Nanti ümoti:

—Arrtü ñemanauntuapae arrücü Aütorrti Tuparrü, aiñemecasü auqui na ape, itopiqui nantü sane Nicororrü:

Arrti Bae Tuparrü tiene que acüputi ümo bama nesarrti angelerrü, nauqui acuírama atacucü, tapü obürío aemo oboi canca.

⁷Auqui aiñumuti Jesús:

—Pero nantito icu Nicororrü: “Tapü aiñata macocotorrü ümoti Tuparrü”.

⁸Auquimanu arrti choborese iquianatitito Jesús onü taman yiriturrü apetaisürü. Acamanu itusiancatati isucarüti nanaiña arrüba nacioneca abe icu na cürrü, aübu nanaiña niñocoñoporrü. ⁹Nanti ümoti:

—Itorrimiaata aemo nanaiña arrüna ane icu na cürrü, arrtü achesoiquia yesañü y anaunca iñemo.

¹⁰Auqui nanti Jesús ümoti:

—iAquicho auquina yesaquiñü naqui choborese, itopiqui icu Nicororrü nantü sane: “Anaun y aserebi ümotiatai Tuparrü!”

¹¹Auqui arrti choborese sürotitü esauiti Jesús; au manu rratorrü cuamatü bama angelerrü aserebimia ümoti.

Comensabo yatrabacacarrti Jesús au Galilea

¹²Au manio naneneca arrti Jesús ipiatenti que arrti Juan Bautista anati au preso. Auqui süroti tato au Nazaret au manu cürrü Galilea. ¹³Pero champürrtü asiotti acamanu. Sürotito aviviti au manu pueblurrü nürirri Capernaum, abeu manu narubaitu turrü saimia ñome ba cüca nobürirri Zabulón y Neftalí.

¹⁴Sane cocono arrümanu corobo tücañe uiti profetarrü Isaías:

¹⁵Arrüba cüca Zabulón y Neftalí abe saimia narubaitu turrü, topü manu sapoco Jordán, nobürirri ito Galilea, auna cauta aboma bama chütüpü israelitarrü.

¹⁶Arrümanuma macrirrtianuca auqui manio puebluca churriampü nisüboriquirrimia, amoncoma eana tomiquianene, pero caüma cuatü taman basarurrü nauqui anentarrü ümoma.

Arrübama amoncoma eana nomünantü tacana coiñoma, caüma cuatito taman basarurrü nauqui anentarrü ümoma. (Uirri caüburuma eanaqui nomünantü.)

¹⁷Auquimanu comensaboti Jesús anunecati ümo macrirrtianuca, nanti ümoma: —Apiñorroncosoño, itopiqui contoatai üriabucati Tuparrü.

Batasuruti Jesús ümo bama cuatro

¹⁸Arrti Jesús amencoti abeuqui manu narubaitu turrü au Galilea. Acamanu asaratitü ümo torrü mañoñünca, yaruquitorrümantoe. Arrti maniqui taman nürirrti Simón y nürirrtito Pedro. Arrti maniqui quiatarrü nürirrti Andrés. Arrüma batrabacarama acaübuma nopiocorrü enaqui turrü ui momese. ¹⁹Auqui nanti Jesús ümoma:

—iAusiapata isiuñü, irranca iñununecanaño apacaübu mañoñünca enaqui nomünantü!

²⁰Au manu rratorrü arrümanuma torrü iñocotama nimomerrüma. Süromatü isiuti Jesús.

²¹Manrrü taha asaratitito ümo bama maquiataca torrü, arrti Jacobo ichepeti yaruquitorrti nürirrti Juan, tonema aütorrti Zebedeo. Amoncoma au taman barco ichepeti yaütorrüma, icoñocotama nimomerrüma. Auqui tasuruma ito uiti Jesús. ²²Au manu rratorrü iñocotama manu barco. Onconotito yaütorrüma uimía, süromatü isiuti Jesús.

Manunecanati Jesús ümo sürümana genterrü

²³Arrti Jesús amencoti au nanaiña manu cürrü Galilea, manunecanati ümo macrirrtianuca au manio poca sinagoga. Urapoiti isucarüma arrüba omirria manitacaca icütüpüti Tuparrü. Bacurarati ümo bama maunrocono oboi arrüba aruqui nanaiña norrococa. Urriancama tato uiti. ²⁴Ipiatema nürirrti au nanaiña manu cürrü Siria. Canama esati arrübama tarucu nitaquisürücürüma oboi arrüba aruqui nanaiña norrococa, arrübama



(Mt. 4.25)

aboma machoboreca auma, arrübama chüpuerurrüpüma amema y arrübama consa. Enterurrüma urriancama tato uiti Jesús. ²⁵Sürümana genterrü sürotü isiuti auqui Galilea, auqui manu cürrü nürirri Diez Puebluca, auqui Jerusalén, auqui manu cürrü Judea y auqui manu topüqui manu sapoco nürirri Jordán.

Nisermorrri Jesús onü yiriturrü

5 ¹Taman nanenese asaratitü Jesús cümenu sürümana macrirrtianuca. Auqui süroti onü taman yiriturrü. Acamanu tümonsoti y arrübama ñanunecasarri tümonsoma ito itupecuti.

Arrübama urria nacarrüma

²Auqui manunecanati, nanti sane:

³—Urriampae naca bama ichimiancanamacü, itopiqui arrti Tuparrü bayurarati ümoma, nauqui aye uimia esati, arrtü türiabucati.

⁴Urriampae naca bama suchebo, itopiqui arrti Tuparrü bacheboti ipucünuncubuma ñana.

⁵Urriampae naca bama itaquisünacanamacü, itopiqui torrio ñana nanaiña cürrü uiti Tuparrü ümoma.

⁶Urriampae naca bama cürüpüo y tosüo iyo nomirria nurarrti Tuparrü, itopiqui bayurarati caüma ümoma.

⁷Urriampae naca bama ipiaca apucüru, itopiqui arrti Bae Tuparrü pucürusutito itacuma.

⁸Urriampae naca bama urria ñapensacarrüma, itopiqui asaramati Tuparrü ñana.

⁹Urriampae naca bama bapachero causane nauqui urria naca maquiataca, itopiqui tonema ñana aütorrti Tuparrü.

¹⁰Urriampae naca bama taquisürü itopiqui arrüna urria nisüboriquirrimia, itopiqui tonema bama üriabucama ñana ichepeti Tuparrü.

¹¹Urriampae nabaca arrtü unuma año y ocüsioma aume bama macirrtianuca auqui niyaca, o arrtü mapañama aucütüpü. ¹²Aupucünu, tapü ausuchecatai, itopiqui ane naucua au napese. Apaquionsaño: Arrübama profetarrü cusürübo amopünanaqui taquisürüma ito tücañe.

Arraño tacana siürrü icu na cürrü

¹³Nanti Jesús ümo bama ñanunecasarrti:

—Arraño tacana siürrü icu na cürrü. Arrtü arrümanu siürrü ensoro nisücürrü, chüpuerrüüpü aserebiqui. Botabatai acü na aicümonema macirrtianuca.

¹⁴Arraño tacana basarurrü ümo macirrtianuca icu na cürrü. Arrtü taman pueblurrü ane onü taman yiriturrü, chüpuerrüüpü chütusiopü.

¹⁵Chüpuerrüüpü uiñonoco basarurrü nauqui uitamurriquia. Tiene que uiñotorrimia ape, nauqui anentarrü ümo bama abomampo. ¹⁶Sane ito arraño tiene que anentarrü aboi ümo macirrtianuca. Tapü apiñanecata isucarüma arrüna urria napisamute, sane nauqui aiñanaunumati Aubäi, naqui anati au napese, itopiqui uiti arrüna urria napisamute.

Manunecanati Jesús ümo nüriacarrü

¹⁷Nantito Jesús:

—Tapü apapensaca que isecatü nauqui apiñoco sobi napacoconauncu ümo nüriacarrü uiti Moisés, ichepe ñanunecacarrüma bama profetarrü, ta isecatü nauqui acoco sobi. ¹⁸Nëmanauncurratoc sucanañü aume: Mientras que aninqui cürrü y napese, chüpuerrüüpü acaübu ni tamanpü letrarrü eanaqui nüriacarrü,

cheperrtü cocono nanaiña arrüna corobo. ¹⁹Artri naqui chicocotapü arrüna yacüpucu nüriacarrü panaca chitonempatai, y manunecanati ümo genterrü tapü icocotama, tonenti naqui manrrü chücuasürüpatai arrtü türiabucati Tuparrü. Tapü artri naqui icocota y manunecanatito ümo macirrtianuca sane, tonenti naqui cuasürüti arrtü türiabucati Tuparrü uyarrüpecu. ²⁰Tiene que apisamune isiu nirrancartri Tuparrü nauqui manrrü urria nausüboriqui pünanaqui nisüboriqui bama manunecana nüriacarrü y bama fariseorrü si no, chüpuerurrüpi aye aboi esati Tuparrü, au na cauta üriabucati.

Tapü otüboriquia

²¹Nantito Jesús:

—Arraño chauqui tamoncoi manu bacüpucurrü ümo bama antiburrü tücañe: “Tapü apatabaiquia, itopiqui arrtü apatabaiquia tiene que ayetü carrticurrü aume”. ²²Tapü arrüñü caüma sucanañü aume: Artri naqui tüborico ümoti quiatarrü tiene que acurrati Tuparrü aübuti. Artri naqui unutiti quiatarrü, tiene que carrticaboti ui mayüriabuca. Artri naqui mapaurramacanati ümoti quiatarrü, tonenti naqui sürobotü au infierno.

²³‘Sane nauquiche arrtü aecatü au niporrti Tuparrü aübu nacumanata ümoti y aquioncü taha iyoti aruqui ane isane churriampü uiti aübücü, ²⁴auqui caüma aiñoco nacumanata acamanu esa altar y acosi esati aruqui nauqui airrimiacata tato aübuti. Auqui caüma puerurrü asücübü tato nauqui aitorrimia nacumanata ümoti Bae Tuparrü.

²⁵‘Artrü ebeca ümoti quiatarrü y aecatü uiti esa nüriacarrü, arrtü tabaca isiu cutubiurrü, anqui püanaquiti marrimiacatarrü, tapü aiñatai uiti esati yüriaburrü. Itopiqui artri caüma itorrimianatiyü mecu masortaboca y arrüma caüma iñanamacü au preso. ²⁶Ñemanauncurratoe sucanañü aemo chataesübucaü uimía cheperrtü apacaca nanaiña nebequi.

Tapü aecatü isiu quiatarrü päürrü

²⁷Nantito Jesús:

—Tamoncoi arrüna corobo tücañe sane: “Tapü aecatü isiu quiatarrü päürrü”. ²⁸Tapü arrüñü sucanañü aume: Artri naqui asaratü ümo taman päürrü y tirranrrti ümo, chauqui tütane nomünantü uiti au nausasürrti.

²⁹‘Artrü atachea asaratü ümo arrüna churriampatai ui taman nasüto, mejor aiquiaübu, arusaübu. Itopiqui manrrü urria arrtü ensoro arrümanu taman nasüto, pünanaquirrtü enterurrü nacütüpü sürotü au infierno. ³⁰Artrü aisamute nomünantü ui nepanauncu nehe, mejor aütüsüna y arusaübu. Itopiqui manrrü urria arrtü ensoro tamantai nehe pünanaquirrtü enterurrü nacütüpü sürotü au infierno.

Tapü uiñocota nocüposü

³¹Tücañe ane ito corobo sane: “Artri naqui rranrti aiñocoti nicüpostoti, tiene que aitorrimiatu ümo taman quichonimiacarrü corobo icu arrüna uiche atusi que chitonenquipü nicüpostoti. ³²Tapü arrüñü sucanañü aume: Arrtü anati naqui iñocota nicüpostoti, arrüna champü causane nisüboriquirri aübuti, chauqui tütane nomünantü uiti. Itopiqui auqui nacarrti caüma puerurrü aürotü avivi aübuti quiatarrü. Y artri naqui poso aübu, chauqui tütane ito nomünantü uiti.

Tapü uitusiancata curusürrü

³³Tamoncoi ito tücañe arrüna manitacarrü ümo bama antiburrü, arrüna nantü sane: “Tapü chücoconopü aboi arrüna arrtü ane isane aburapoi aübu curusürru au nürirrti Tuparrü”. ³⁴Arrüñü sucanañü aume, tapü apitusiancata curusürrü. Arrti Tuparrü anati au napese. Sane nauquiche tapü apitusiancata curusürrü au nüri napese. ³⁵Tapü apitusiancata ito curusürrü au nüri cürrü, itopiqui tone arrüna cauta ito üriabucati. Ni au nüripü Jerusalén, itopiqui tone nesarrti pueblurrü naqui yarusürrü yüriaburrü, naqui Tuparrü. ³⁶Tapü apitusiancata ito curusürrü au nüri nautanu, itopiqui chüpuerurrüpi año apiquiampia nisu taman niqui nautanu. Uitiatai Tuparrü puerurrü. ³⁷Aburasoi solamenterrü arrüna arrtü sane o chüsanempü. Itopiqui arrtü tapiasatapae, chauqui tuiti choborese.

Tapü matococa tato itobo nomünantü oemo

³⁸Arrümanu nüriacarrti Moisés tücañe nantü sane: “Arrtü anati naqui ane causane uiti aemo, atoco tato atüborito ümoti”. ³⁹Tapü arrüñü caüma sucanañü aume: Arrtü anati naqui tüborico aume, tapü apasutiu nitüborirrti. Arrtü anati naqui iñompebairotiyü au taman nasu, aitorrimia ito quitarrü narücüqui nasu ümoti. ⁴⁰Arrtü anati naqui iquianü au nüriacarrü nirrancarrti aiquiaübuti apünanaquicü nacamisa, aitorrimia ito nasaco ümoti. ⁴¹Arrtü icüpurumacü aübu cacarrü nauqui aiquia ümoma taman kilómetro, acosi aübu torrü kilómetros. ⁴²Arrtü anati naqui manquio isane apünanaquicü, aitorrimia ümoti. Tapü chaprerretacapü ümoti naqui rranrrü aprertra apünanaquicü.

Nicuarrüma oemo bama tüborico oemo

⁴³Nantito Jesús:

—Tamoncoi ito arrüna manitacarrü, nantü sane: “Tari cuasürütü aemo naqui buenorrti aübücü, y atübori ümoti naqui tüboricatai aemo”. ⁴⁴Tapü arrüñü sucanañü aume: Tari cuasürüma aume bama tüboricatai aume. Apicunusiñancarrüma bama churriampiñanitacarrüma aume. Apisamuse arrüna urria aübu bama ipiaurramanaño. Apean itacu bama tüboricatai aucuata y arrübama autaqisürüca uimia. ⁴⁵Sane caüma tusio ta arraña aütorrti naqui Aubäü anati au napese. Itopiqui uiti cuara surrü ümo bama malorrü y ümo bama ito buenurrü. Uitito rrobeoca ümo bama champü nipünatema y ümo bama ito

tarucu nipünatema. ⁴⁶Arrtü cuasiirüma aume solamenterrü arrübama Hasta arrübama mayacobra impuesto isamutema ito sane panaca picarurüma. ⁴⁷Arrtü apanquiquia nurria solamenterrü ümo bama aubaruqui o ümo bama apisuputacama, ñnapaquionco urria arrüna apisamute sane? Arrübama ito chisuputaramatipü Tuparrü isamutema ito sane. ⁴⁸Apiña nausüboriqui tacana nisüboriquirrti naqui Aubaü anati au napese. Arrti champü isane nipünatenti.

Manunecanati Jesús ümo arrüna nauqui urria uisamune

6 ¹Nantito Jesús:
—Aensarrtü abasiquia apitusianca napanauncu ümoti Tuparrü isucarü macrirrtianuca, solamenterrü ui naurrianca asaramatü aume. Arrtü apisamute sane, chüpuerrüüpü ane naucua au napese uiti Tuparrü naqui Auyaü. ²Arrtü ane isane acumanaca nauqui ayura ümoti naqui pobrerrü, tapü asiquia uraboi isucarü macrirrtianuca, tacana arrüna nisoni bama mañapanca ubau ba poca sinagoga y yusiu cayaca. Arrüma isamutema arrüna sane ui nirranacarrüma urria ñanitaca genterrü ümoma. Pero surapoi nurria ausucarü, que arrüma chüpuerrüüpü ane nicuarrüma uiti Tuparrü. ³Arrtü ane isane acheca ümoti naqui pobrerrü, tapü tusio ümoti quiatarrü. ⁴Tari anecanatai nacumanaca, itopiqui arrti Tuparrü asaratitü aemo, sane nauquiche caüma ane nacua uiti.

Manunecanati Jesús nauqui uipia oñean

⁵Arrtü apearca, tapü apearca tacana arrübama mañapanca. Arrüma urriantai ümoma eama auqui natücaiquirrimia ubau ba poca sinagoga y au ba nerrquina cayaca. Ui arrüna sane ensoro arrümanu nicuarrüma uiti Tuparrü. ⁶Arrtü arrianca ehan, acosi au naesa cuarto tamancü y aiñamasio turuca, auqui caüma puerurrü eanca ümoti Uyaü, naqui anati acamanupo achepecü. Arrti asaratitü aemo tamancü au naesa cuarto, auqui caüma ane nacua uiti.

⁷Arrtü eanca, tapü yabaiturrü nanitaca tacana arrübama chisuputaramatipü Tuparrü, ñaquioncorrüma oncoiti ui arrüna yabaiturrü neancarrüma.

⁸Tapü apisamute sane arraño. Arrti Bae Tuparrü tütusiatai ümoti arrüna naurriantümo. ⁹Sane nauquiche arrtü apearca, amucanaño sane:

Suiyaü, aca au napese. Tari anaunrrü nüri. Üriabusü suiñemo.

¹⁰Tari urranena isiu narrianca auna acü, tacana au napese.

¹¹Ache sumutuburibo naneneca.

¹²Airrimiacata tato nomünantü soboi, tacana arrüsomü sopirrimiacata tato ümo bama churriampü uimia suiñemo.

¹³Tapü acheca macocotorrü suiñemo.

Aitaesümunusu somü eanaqui nomünantü.

Itopiqui champü nitacüru nüriaca, champü ito nitacüru nacusüu y nanentacarrü aesacü.

Amén.

¹⁴Itopiqui arrtü apirrimiacata tato ümoti quiatarrü, arrti Uyaü naqui anati au napese, rrimiacana tato uiti aume. ¹⁵Pero arrtü chapirrimiacatapü tato ümoti quiatarrü, arrti Uyaü naqui anati au napese, chüpuerurrüpito airrimiacati tato nomünantü aboi.

Arrtü chubacapü ui numaquionco iyoti Tuparrü (ayunabo oñü)

¹⁶Nantito Jesús ümoma:

—Tapü apapanca ausuche arrtü ayunabo año (arrtü chaubacapü). Tapü apiñata tacana bama mañapanca. Arrüma arrtü ayunaboma mapañama asuchema ui nirrancarrüma atusi ümo macrirrtianuca que ayunaboma. Ñemanauncurratöe sucanañü aume: Ui arrümanu sane nisonirrimia chüpuerurrüpü ane nicuarrüma uiti Tuparrü. ¹⁷Arrtü ayunabocü, atasubi y atacünauncu bien, tacanarrtü aca au pierrta, ¹⁸tapü tusio ümo macrirrtianuca arrüna ayunabocü o sea arrtü chacapü pemacarrü naquionco iyoti Tuparrü. Tamantiatai naqui Uyaü tusio ümoti arrüna anecanatai nachücoi. Uirri caüma ane nacua uiti.

Arrüna noñenarri au napese

¹⁹Tapü tarucapae namenarri icu na cürrü, itopiqui puerurrtai rriho y mameso amopünanaqui. Puerurrtaito aicusüpürioma bama macusüpüca. ²⁰Manrrü urria arrtü urria nausüboriqui. Tone te tacana namenarri au napese. Tari amontonabo aboi taha au napese, auna cauta chüpuerurrüpü irri y chüpuerurrüpito amameso y chiñataipüma bama macusüpüca iyo. ²¹Itopiqui arrüna cauta ane namenarri, tone arrüna ümoche napapensaca.

Nibiasaru nocütüpü

²²Nantito Jesús sane:

—Arrüba nasüto tacana basarurrü ümo nacütüpü. Sane nauquiche arrtü omirria nasüto anentarrü ito nurria ümo enterurrü nacütüpü. ²³Arrümanio omirria nasüto toneño tacana arrüba omirria napensaca. Tapürrtü chomirriampü napensaca, tacanarrtü chomirriampü nasüto. Ane nausüpü au tomiquianene.

Nomoni

²⁴Champüti naqui puerurrü aserebiti ümo bama torrüma ipiatronetorrti. Itopiqui chüpuerurrüpü ichépe nicuarrüma ümoti. Repente ane nauche cuasürüti nurria maniqui taman ümoti y tüboricoti ümoti quiatarrü. O ane nauche baserebiotito nurria ümoti maniqui quiatarrü, tapü arrti naqui chücuasürütipü ümoti. Chüpuerurrüpü baserebi ümoti Tuparrü arrtü tarucu nurrianca ümo monirri.

Yacuiracarri Tuparrü itacu bama aütorrti

²⁵Sane nauquiche sucanañü aume: Tapü tarucapae napapensaca iyo arrüna amutuburibo, autüpobocü, abaibibocü, itopiqui arraña ausüboriquia. Manrrü

te cuasürü nosüboriqui pünanaqui comirarrü, y manrrü cuasürü nocütütipü pünanaqui nusaibi. ²⁶Amasasio nutaumanca, arrüba abe bupasoro, ¿cautapü tupancituru nauqui cosechabohio umutuburibo? Chopiñahübutapito. Pero arrti Tuparrü bacheboti umutuburibo. Arraño manrrü te naucua ümoti ñopünanaqui nutaumanca. ²⁷¿Isanempataipito iyebo oemo auqui arrüna tarucu numapensaca?

²⁸¿Causane tarucapae napapensaca iyo arrüna abaibibo? Cabitopü apapensa iyo ubaibibo arrüba püsioaca eanaqui rroense. Champürrtü patrabacara, ni apaiñapü. ²⁹Pero sucanañü aume: Ni arrtipü Salomón tücañe aye uiti tacana nubaibiqui manio püsioaca, panaca rricurrti. ³⁰Artri Tuparrü bacheboti iyusubu püsioaca eana rroense. Abu arrtü bosübo botüsüro nauqui amoho. Arraño te manrrü asaratitü Tuparrü autacu. ¿Sane nauquiche, causane chamoncapütü ümoti? ³¹Sane nauquiche tapü ane penarrü aboi, rrepente amucanaño: ¿Isanempü uñutuburibo caüma? ¿Isanempü arrüna otüpobo caüma? ¿Isanempü arrüna usaibibo? ³²Arrüabama macrirrtianuca icu na cürrü mapensarama iyo arrüna sane. Pero arroñü anati Uyaü au napese. Artri tütusiatai ümoti arrüna naurriantümo. ³³Sane nauquiche apapensa iyo arrüna, arrtü türiabucati Tuparrü abarrüpecu y nauqui urria nabaca au narrtartri. Auqui caüma torrio aume nanaiña arrüba piquiataca naurriantümo. ³⁴Tapü tarucapae penarrü aboi iyo arrüna uiche ausüboriquia au quiatarrü nanenese. Tari ane penarrü aboi ümo tamantai nanenese iyo arrüna amutuburibo. Itopiqui au quiatarrü nanenese, cuantio piquiataca nomünantü.

Tapü carrticaboti ausüborisapa

7 ¹Nantito Jesús ümo bama ñanunecasarrti:
—Tapü apuncati quiatarrü, arrtü chaurriancapü carrticabo año uiti Tuparrü. ²Arrüna carrticurrtü apacheca ümoti quiatarrü, tone ito torrio aume uiti. Artri Tuparrü iñatati aume isiu arrüna napisamute ümo maquiataca. ³Causanempü ane nümoche obi arrüna chimiantai nünantü uiti aruqui, tapü arrüna tarucu nomünantü obi charrtapü. ⁴¿Causane arrian anunca ümoti quiatarrü, naqui champüapae nomünantü uiti, tapü arrücü tarucu nomünantü obi? ⁵¡Napanrrücü! Primero tiene que aicoñoco nasüboriqui aübuti Tuparrü, arrtü arrianca aiñununecanati naqui ane chimiantai nomünantü uiti.
⁶Tapü apanitaquio nomirria isucarü bama tarucapae nomünantü uimia, itopiqui champü nümoche uimia. Tapü apitusiancata ito nabüriaca isucarüma, itopiqui tiene que arriama aitabairoma año.

Apache niquiubu año nauqui urria nausüboriqui

⁷Artri ane isane naurriantümo apanqui pünanaquiti Tuparrü, arrti caüma bayurarati aume. Apapache y tabüco aboi. Apiyotobaita tururrtü, aurübo aume. ⁸Itopiqui artri naqui manquio, torrio ümoti, y artri naqui bapachero, tabüco uiti. Artri naqui iytobaitati tururrtü, aurübo ümoti.

⁹¿Aensapü apitorrimiata canrrü ümoti abaübosi, arrtü manquiوتي pan amopünanaqui? ¡No, champü! ¹⁰Artri manquiutito nopiocorrü

amopünanaqui, ¿aensapü apitorrimiata noirroborrü ümoti? ¹¹Arraño panaca malorraño, pero apipiaca apache arrüna urria ümo bama abaübosi. Arrti Bae Tuparrü naqui anati au napese, manrrü botorrio arrüba omirriantai uiti ümo bama manquio pünanaquiti. ¹²Sane nauquiche tapü apisamute ümo maquiataca arrüna churriampü aume. Ümo te arrüna sane torrio tücañe nüriacarrü uiti Moisés y ñanunecarrüma bama profetarrü.

Tururrü tunumusiñatai

¹³Arrtü urrianca oerotü au napese, tiene que bapacherio arrümanu tunumusiña tururrü. Amasasai nurria, tapü amecatü auqui manu tururrü arubaesa, ni isiuquipü manu pacubaesa cutubiurrü, itopiqui isiuqui oecatü au infierno. Sürümanama bama süromatü isiuqui manu cutubiurrü itopiqui pacubaesa. ¹⁴Tapü arrümanu nituru napese ta tunumusiñatai. Cümpañamatai ito cutubiuma ümo. Mümanamantai bama süromatü isiuqui.

Tusio isane naca suese ui nütarrü

¹⁵Nantito Jesús:

—Amasasai nurria ñünana bama cuamatü aübu ñapanturrüma anunecama au nürirri Tuparrü. Cuamatü tacana nobirramanca, abu ta nuitümürrüma. ¹⁶Arraño puerurrü apisuputarama ui arrüna nisamutema. ¿Acasopü puerurrü mata nüta uva icütüpüqui parirri? Champü ito tubarrtai üta cümüchürürrü tacana nütaca higo. ¹⁷Arrüba omirria sueca, omirria ito nobütarrü. Arrüba chomirriampü sueca, chomirriampito nobütarrü. Chüpuerurrüpü basarai churriampü nüta na urria suese. ¹⁸Champü ito tubarrtai urria nobütaca ba chomirriampü sueca. ¹⁹Sane nauquiche arrüba chomirriampü sueca, botüsü nauqui amoho. ²⁰Sane ito arraño, tiene que apisuputarama bama mañapanca ui arrüna isamutema.

Causane nauqui uiñanai esati Tuparrü

²¹Chüpuerurrüpü ichépe aye ui macirrtianuca auna cauta ane nüriacarrti Tuparrü, arrtü namatatai iñemo: “Señor, Señor”. Ümonatai arrümanu nurarrüma. Solamenterrü arrübama isamutema yacüpuurrti Iyaü naqui anati au napese iyebo uimia. ²²Arrtü iñatai manu nanenese nesa bacurrtacarrü, sürümanama bama namatü iñemo: “Señor, Señor, arrüsomü amonco somü supanitate nüri. Au nüri sopiciüpucama bama machoboreca auqui macirrtianuca. Supasamuca sürümana milagrorrü au nüri”. ²³Pero arrüñü caüma sucanañü ümoma: “Champürrtü isuputacaño, apaquicho auquina yesaquiñü, bama mañasamuca nomünantü”.

Torrü nubaca nitümo porrü

²⁴Arrti naqui oncoi nisura, y isamutenti nanaiña arrüna nirrácüpu, iyebo uiti tacana nacarrti maniqui ñoñünrrü bien ipiacati. Isamutenti niporrti onü canrrü, nauqui segurorrü nacarrü. ²⁵Numo iñatai nitiempo tanaunrrü, ubataso nusüruca, umuünasio. Iñatai turrü itupecu manu porrü.

Y bausucüro fuerte maquiütürri, pero chütaübücopü, itopiqui atünaiñacana uiti onü manu canrrü. ²⁶Tapü arrti naqui oncoi nisura y chisamutentipü arrüna nrracüpucu, iyebo uiti tacana nacarrti maniqui taman ñoñünrrü sonsorrü naqui isamutenti niporrü eana cüosorrü. ²⁷Numo iñatai nitiempo tanaunrrü ubataso nusüruca, umuünasio y bausucüro ito fuerte maquiütürri ümo manu porrrü. Auqui taümünaña, iñarrio y champü isane yerubutü.

²⁸Nauquiche tüchauqui ñanitacarrti Jesús, enterurrü manuma macirrtianuca cütobüsoma ui arrüna ñanunecacarrti. ²⁹Itopiqui arrti manunecanati aübu nanaiña nüriacarrti y champürrtü tacana bama manunecana nüriacarrü.

Urriancati tato uiti Jesús naqui upusara nañeturrti

8 ¹Nauquiche tücuati tato Jesús onüqui manu yiriturrü, sürümanama macirrtianuca cuamatito isiuti. ²Auqui tamanti ñoñünrrü maunrocono ui arrümanu norrocorrü nürirri lepra, cuati esati. Bachesoiyoti esati y nanti ümoti:

—Señor, arrücü puerurrü aicurarañü, arrtü arrianca.

³Auqui arrti Jesús iñenotiti maniqui maunrocono y nanti ümoti:

—Irranca icurarü. Caüma urriancü tato. Ui arrümanu nurarrti sane, arrti maniqui maunrocono urriancati tato. ⁴Auqui nanti Jesús ümoti maniqui ñoñünrrü:

—Tapü urapoi ümoti quiatarrü arrüna sane. Auquina acosi besüro aitusiancasü isucarü bama sacerdoterrü. Acumana ito itobo ümoti Tuparrü, tacana arrüna yacüpucurrü Moisés tücañe, nauqui asaraimia macirrtianuca, arrücü chauqui turriancü tato.

Urriancati tato uiti Jesús yacüpusurrü capitán rromanurrü

⁵Nauquiche iñataiti Jesús au manu pueblurrü nürirri Capernaum, tamanti capitán rromanorrü cuati esati:

⁶—Asamu nurria iñemo, Señor. Arrti imoso anati icu nicürurrü maunroconoti, y chüpuerrtipü aepocoti, tarucu nitaquisürücürri ui manu norrocorrü.

⁷Auqui nanti Jesús ümoti:

—Auritarrü yecatanu rracura ümoti.

⁸Auqui iñumutati maniqui capitán:

—Señor, arrüñü champü isane niyaca nauqui aerotü au nipo. Acüpuatai ümo norrocorrü nauqui aürotü piñanaquiti, nauqui urrianati tato. ⁹Itopiqui arrüñü ito yaca ümo yacüpucu bama manrrü ane nüriacarrüma rropünanaqui, tacana arrüna nisüriaca ümo bama niyesa soldadorrü. Arrtü rracüpuca ümoti taman uturuquimia, sürotitü. Arrtü itasucati quiatarrü, cuati. Arrtü rracüpuca ümoti imoso na aisamunenti arrümanu isane nirrantiümo, isamutentito.

¹⁰Nauquiche oncoiti Jesús arrümanu nurarrti sane, cütobüsoti. Auqui nanti ümo bama macirrtianuca amoncoma isiuti:

—Ñemanauncurratoe sucanañü aume, champüti naqui isuputacai au nanaiña Israel tacana nacarrti naqui ñoñünrrü tarucu noncorrti iñemo.

¹¹ Nantito Jesús ümoma:

—Sürümanama bama macirrrianuca cuamatü ñana auqui iche, auqui tansürü y auqui nimümürü, nauqui atümoma ichepeti Abraham, ichepeti Isaac y ichepeti Jacob, nauqui aama auna cauta ane nüriacarrti Tuparrü.

¹² Tapü arrübama ümocheapae atorri, nauqui aye uimia esati Tuparrü, arrübama israelitarrü, tiene que apenema au tomiquianene. Taha tarucu nareorrüma y acamanu ito botoquio nohorrüma ui nitaquisürücürüma.

¹³ Auqui nanti Jesús ümoti maniqui capitán:

—Acosi tato au napo, ui arrüna oncatü nurria iñemo, chauqui turriancati tato maniqui amoso. Sane pasao au manu horarrü, urriancati tato maniqui mosorrü.

Urria tato ümo nipiaccürrtoti Pedro uiti Jesús

¹⁴ Auqui manu iñataiti Jesús au niporrti Pedro. Acamanu ananca maunrocono nipiaccürrtoti Pedro. Ananca aibu fuerte pacütaiquirri. ¹⁵ Auqui arrti Jesús iñentati nehese. Au manu atorrü pasao nipiaccütaiquirri. Sane nauquiche atürai nauqui ariorrü apema ümoti Jesús y ümo bama maquitaca, itopiqui turrian tato ümo.

Urriancama tato sürümanama maunrocono uiti Jesús

¹⁶ Nauquiche tütobiquia, canama esati Jesús sürümanama bama aboma machoboreca auma. Ui tamantai nurarrti Jesús süromatü machoboreca auquimia, y namanaiña bama maunrocono urriancama tato uiti. ¹⁷ Enterurü arrüna pasabo sane ta nauqui acoco arrümanu urpaoiti tücañe profetarrü Isaías. Nanti sane: “Uiti Cristo urrianca oñü tato. Iquiaübutati norrocorrü oñopünanaqui”.

Arrübama rranrrüma aüromatü isiuti Jesús

¹⁸ Nauquiche arrtaiti Jesús sürümanama macirrrianuca itupecuti, nanti ümo bama ñanunecasarrti:

—Curi topü narubaitu na turrü.

¹⁹ Tamanti maestro nesa nüriacarrü cuati esati Jesús, nanti ümoti:

—Maestro, irranca yerotü asiucü au nanaiñantai auna cauta naecü.

²⁰ Aiñumuti Jesús:

—Apensasio nurria. Arrüba numantureca ane niyoporrü cütu. Arrüba nutaumanca ane niñusumenurrü auna cauta apacansa. Tapü arrüñü Ñemanauncurratoe Ñoñünrrü champü nipo auna cauta ñacansa.

²¹ Tamanti uturuqui bama ñanunecasarrti Jesús nanti ümoti:

—Señor, yasiquia baeta esati taita cheperrtü tücoiñoti, nauqui iñanati cütu, auqui caüma yecatü asiucü.

²² Auqui aiñumuti Jesús:

—No, ariacu isiuñü caüma. Arrüabama chicocoromatipü Tuparrü, tari uimía aifñanama cütu bama coiño.

**Uiti Jesús tochenco nimiaquiütücürü
y nipococo turrü**

²³Auqui arrti Jesús sürotitü au manu taman barco ichepe bama ñanunecasarrti. Süromatü auqui manu isuqui turrü. ²⁴Au manu rrtorrtü nauquiche amoncoma isu turrü, maquiütüca fuerte. Pocoro turrü uirri y supiuu au barco ui manu maquiütürrü. Arrti Jesús anancati manumuti au manu barco. ²⁵Auqui arrüabama ñanunecasarrti süromatü esati nauqui airrtopünanamati, namatü ümoti:

—¡Señor, ayura suiñemo, tirranrrü uyubaca!

²⁶Auqui arrti Jesús sütopücoti, nanti ümoma:

—¿Causane tarucapae naupirruca? ¿Causane chamoncapütü nurria iñemo? Auqui atüraitü y icuansomocotati maquiütürrü, y nipococo turrü. Y au manu rrtorrtü tochenco nanaiña. ²⁷Arrüabama ñanunecasarrti cütobüsoma nurria. Namatü ümomantoe:

—¿Ñacutipü naqui ñoñünrrü? ¡Hasta maquiütürrü y turrü omoncoi nurarrti!

**Sürotitü choborese auqui mañoñünca
auqui Gadara**

²⁸Tiñataiti Jesús topü manu turrü au manu cürü nürirri Gadara. Acamanu cuamatü torrüma mañoñünca auqui panteón, aboma machoboreca auma. Cuamatü esati Jesús yarucurrüma. Arrüma bien malorrüma, birrubuma macrirrtianuca apasama auqui manu cutubiurrü. ²⁹Auqui arrümanuma torrü tosibicoma:

—¿Causane ayetü tauna suichepe? ¡Arrücü Äütorrti Tuparrü! ¡Apuraurrüciapae ache suichaquisürücübo! (Abu chiñataiquipü manu nanenese nesa bacurrtacarri.)

³⁰Acamanu saimia amonquio nupaucheca, bubaso. ³¹Arrümanuma machoboreca namatü ümoti Jesús sane:

—Asamu nurria suiñemo arrtü aicüpuca somü auqui bama mañoñünca, aicüpusu somü ubau manio nupaucheca.

³²Auqui iñumutati Jesús:

—Bueno, iamecosi ubahu! Auqui arrümanuma machoboreca süroma ubau manio nupaucheca. Ui arrüna sane rrepenteatai locorriantai. Opiñemecanaño abeuqui manu taman nisacürü. Bupaquio au turrü y ububacara cütu. Auqui mocoño.

³³Tapü arrümanuma bacuirara yutacu manio nupaucheca, süroma tato yarucurrüma au pueblurrü ui nirrucurrüma, besüro uraboimia arrüna pasabo sane. Urapoimia ito que urriancama tato manuma torrü mañoñünca amoncoma machoboreca auma. ³⁴Sane nauquiche enterurrü manuma macrirrtianuca auqui manu pueblurrü, süromatü auna cauta anancati Jesús. Ñanquitioma pünanaquiti nauqui äürotitü auqui manu nicürüma.

Urriancati tato uiti Jesús tamanti maunrocono

9 ¹Auqui arrti Jesús süroti tato au taman barco topü manu narubaitu turrü. İñataiti tato au manu pueblurrü arrüna cauta bavivicoti, nürirri Capernaum. ²Acamanu anancati taman maunrocono, canati esati Jesús ui bama icumpañeruturrti, icu nicürurrti. Chüpuerurrüpi amenti. Asaratitü Jesús ümo manuma uiche ayeti maniqui maunrocono. Tütusiatai ümoti que arrüma bien icocoromati. Sane nauquiche nanti ümoti maniqui maunrocono:

—Tapü airruca, saruqui, itopiqui arrüba nomünantü obi morrimiacana tato sobi aemo.

³Auqui arrümanuma maestro ümo nüriacarrü, mapensarama au nitusirrimia sane: “Artri naqui ñöñünrrü ane nipünatenti aübuti Tuparrü ui arrüna nurarrti sane”. ⁴Artri Jesús tütusiatai ümoti arrüna ñapensacarrüma, nanti ümoma:

—¿Causane churriampatai napapensaca iñemo? ⁵Arrüñü Ñemanauncurratoe Ñöñünrrü ane nisüriaca auna icu na cürrü nauqui aurrimiaa tato sobi nomünantü. Pero rrepente amucanaño iñemo que rranitacatai. ⁶Caüma itusiancata ausucarü nisüriaca, rracurara ümoti naqui maunrocono. Auqui nanti ümoti maniqui maunrocono:

—iAtüсай, aiquia nacüru, y acosi tato au napo!

⁷Auqui arrti maniqui maunrocono atüraiti, iquiatati nicürurrti y süroti tato au niporrti.

⁸Arrübama macrirrtianuca aboma acamanu arrtaimia arrüna sane, cütöbüsoma. İñanaunumati Tuparrü itopiqui torrio uiti arrüna sane nüriacarrü ümo mañoñünca icu cürrü.

⁹Auqui arrti Jesús sürotitito auqui manu.

Tasuruti Mateo uiti Jesús

Auqui arrti Jesús asaratitü ümoti taman ñöñünrrü nürirrti Mateo. Anancati tünonsoti auna cauta bacobüarati impuestorrü. Artri Jesús nanti ümoti:

—iAriacu isiuñü!

Auqui arrti Mateo atüraiti y sürotitü isiuti Jesús.

¹⁰Au manu nanenese, arrti Jesús anancati basoti au niporrti Mateo. Sürümanama bama bacobüarara impuestorrü y arrübama maquiataca ane nomünantü uimia, amoncoma basoma ichepeti Jesús acamanu, y arrübama ito ñanunecasartri. ¹¹Pero arrümanuma fariseorrü nauquiche arrtaimia arrüna sane, ñanquitioma piünanaqui bama ñanunecasartri Jesús sane:

—¿Causane aati maniqui aubesa maestro ichepe bama mayacobraa impuestorrü y arrübama tarucu nomünantü uimia?

¹²Artri Jesús oncoiti arrüna nurarrüma, auqui nanti ümoma:

—Champü nümocheti mercurrü ümo bama urria ümoma, ta ümo bama maunrocono. ¹³Amecosi apapensario nurria isane nümoche arrüna nurarrti Tuparrü sane icu Nicororrü: “Chirranapü apacumana iñemo numuquianca.

Arrüna nirrantiümo es nauqui ane naupucüru itacuti quiatarrü”. Arrüñü chisecapüti nauqui itasuruma bama urria nisüboriquirrimia, ta isecatü itasuruma bama tarucapae nomünantü uimia, nauqui puerurü aiñorronconomacü.

**Arrüna arrtü chubacapü aübu numaquionco
ümoti Tuparrü (ayunabo oñü)**

¹⁴Auqui arrümanuma ñanunecasarrti Juan Bautista cuamatü esati Jesús, ñanquitioma pünanaquiti sane:

—¿Causane chayunabopüma bama anunecasa tacana arrübama fariseorrü y arrüsomü?

¹⁵Aiñumuti Jesús nurarrüma:

—Chüpuerurrüpü ayunaboma y asuchema, arrübama tasuru ümo tübübürrü, mientras que arrti naqui itübübüche anati acamanu ichepema. Pero iñatai ñana manu nanenese anche carübuti pünanaquimia maniqui itübübüche. Auqui caüma chübasopüma ui nisuchequirrimia isiuti.

**Machepecatarrü: Rrüüpütürrü y
vinorrü tacana manunecatata**

¹⁶Champüti naqui marruparriancana ui arrüna iyebo. Itopiqui iñünanü y uirri manrü niquiopücü manu poma rrüüpütürrü. ¹⁷Sane ito chüpuerurrüpü uiñahübu nuevurrü vinorrü nauqui oco ubau arrüba nitaqui numaquianca namoncoca, itopiqui bopobo taquiquia uirri. Ui arrüna sane caüma ensoratai manu vinorrü y omensoro ito manio taquiquia. Asi que mejor uiñahübu nuevurrü vinorrü ubau arrüba obebo taquiquia, tapü arapara vinorrü y tapü bopobo taquiquia. (Arrüna nirranunecaca tone tacana manu nuevurrü vinorrü.)

**Nitaquiumucuturrti Jairo y arrümanu päürrü
iñenta naibirrti Jesús**

¹⁸Nauquiche aübapae chauqui nurarrti Jesús, tamanti üriatu manuma israelitarrü iñataiti acamanu esati Jesús. Bachesoiyoti esati y nanti ümoti:

—Aübapae aco nichaquiumucu, pero süborico tato arrtü ayecatü aiña nehe onü.

¹⁹Auqui arrti Jesús atüraitü ichepe bama ñanunecasarrti y süromatü isiuti maniqui ñoñürrü. ²⁰Acamanu ananca manu päürrü tütabe doce añorrü nacarrü aübu manu norrocorrü, tarucu nitaquisürücürü ui narapaca notorrü cübobiqui. Auqui sürotü esati Jesús chacuquitiatai nauqui aiñe nabeu naibirrti. ²¹Sane arrüna ñapensacarrü: “Arrtü iñenta caüma nabeu naibi Jesús, entonces urriancañü tato”. ²²Arrti Jesús asarati tato chacuti, y nanti ümo manu päürrü:

—iTapü airruca, päürrü, urriancü tato, itopiqui aicococañü!

Au manu rratorrü urriante tato.

²³Nauquiche tiñataiti Jesús au niporrti maniqui yüriaburrü, arrtaiti chauqui tacomoraboma, ariorrüma aiñama cütu manu nitaquiumucuturrti

maniqui yüriaburrü. Aboma bama mapununu burrirri. Rabotü nareorrüma, y nitosibirrimia ui nisuchequirrimia. ²⁴Auqui nanti Jesús ümoma:

—iApaquicho auquina esaqi na cupiquirri! Champürrtü coiño, ane manumu.

Pero arrüma iyabomati. ²⁵Auqui baquichoroma uiti auquimanu. Arrti sürotipo au manu porrü. Añenti nehe manu cupiquirri. Auqui süborico tato, atüraiyo tato uiti. ²⁶Contoatai tusio au nanaiña manu cürrü arrüna nisamutenti Jesús.

Torrüma urriancama tato uiti Jesús bama supuso

²⁷Nauquiche tüsürotitito Jesús auqui niporrti maniqui yüriaburrü, torrü mañoñünca supuso süromatü isiuti aübu nitosibirrimia, namatü sane:

—iApucüru suichacu arrücü Cristo enaqui nesarrti familiarrü David!

²⁸Nauquiche tüsürotitüpo Jesús, arrümanuma torrü cuamatü esati. Arrti Jesús ñanquitioti pünanaquimia:

—¿Apicocota arrüna arrtü puerurrü rracura aume?

Arrüma iñumutama:

—iSopicocota, Señor!

²⁹Auqui arrti Jesús iñentati nisütorrüma y nanti ümoma:

—Rracurara aume, isiuequi arrüna amoncatü iñemo. ³⁰Au manu rratorrü urrian tato narrtarrüma. Auqui arrti Jesús encargaboti nurria ümoma, tapü asioma uraboimia. ³¹Taipü sane uimia. Aübapae saliboma auqui manu esaquiti, turapoimia isucarü macrirrtianuca au nanaiña manu cürrü, arrüna nisamutenti Jesús.

Urriancati uiti Jesús naqui chüpuerurrüpü anita

³²Nauquiche aübapae süromati bama torrü esaquiti Jesús, canati taman ñoñünrrü acamanu esati, naqui chüpuerurrüpü anita, itopiqui anati taman choborese auti. ³³Auqui arrti Jesús icüpurutiti maniqui choborese auquiti. Sane nauquiche puerurrü anitati tato maniqui ñoñünrrü. Enterurrüma manuma macrirrtianuca cütobüsoma ui arrüna sane, namatü:

—Champü tubarrtai au na cürrü Israel arrüna sane.

³⁴Tapü arrümanuma fariseorrü namatü sane:

—Arrti naqui ñoñünrrü, bacüpuruti ümo machoboreca auqui macrirrtianuca itopiqui torrio üriacaboti uiti naqui üriatu bama machoboreca.

Pucürusuti Jesús itacu genterrü

³⁵Arrti Jesús amencoti auqui nanaiña puebluca y poca, aübu bama ñanunecasarri. Sürotitito ubau manio poca sinagoga auna cauta nantarrü iyoerabaramacü macrirrtianuca nauqui eama. Urapoiti nomirria icütüpü na arrtü türiabucati Tuparrü. Urriancama ito tato uiti arrübama maunrocono oboi arrüba aruqui nanaiñantai norrococa. ³⁶Nauquiche asaratitü ümo cütüpürrü macrirrtianuca, taquisürümantai ümoti. Itopiqui

cuamatü esati tacana arrobe omiñarriatai nobirraca patachebo, champüti bacuirara yutacu. ³⁷Auqui nanti Jesús ümo bama ñanunecasarrti:

—Cütüpürrü bama macirrtianuca choncoipüma arrüna urria manitacarrü. Ichepecacama tacana taman ñanaunrrü aübu tupubo trigo. Pero arrübama batrabacara ümoti Tuparrü ta mümanamantai. ³⁸Sane nauquiche apanqui pünanaquiti naqui esache manu cosecharrü, nauqui acüputi ümo bama nesarrti trabajadorerrü nauqui atama.

Arrübama doce apostolerrü

10 ¹Artri Jesús batasuruti ümo bama doce ñanunecasarrti. Torrio uiti üriacaboma, nauqui puerurrü acüpuma ümo machoboreca auqui macirrtianuca, y nauqui puerurrüma ito acurama aruqui nanaiñantai norrococa.

²Tonehio arrüba nürirrimia bama doce apostolerrü: Artri Simón naqui nürirrtito Pedro, ichepeti yaruquitotiatoe nürirrti Andrés; artri Jacobo ichepeti yaruquitotiatoe nürirrti Juan, tonema arrübama aütorrti Zebedeo; ³artri Felipe, artri Bartolomé, artri Tomás y artri Mateo naqui yacobrarrü impuestorrü; artri Jacobo naqui aütorrti Alfeo; artri Lebeo nürirrtito Tadeo; ⁴artri Simón naqui auqui manu partidorrü cananista; artri Judas Iscariote naqui uiche aipiaventecanatiti Jesús.

Bacüpuruti Jesús ümo bama ñanunecasarrti

⁵Bacüpuruti Jesús ümo bama doce ñanunecasarrti aübu arrüna ñanunecacarrti ümoma sane:

—Tapü amecatü au puebluca auna cauta champüma bama israelitarri. Tapü amecatü au manio puebluca au manu cürrü Samaria. ⁶Amecosi apapacheroma manuma macirrtianuca auqui na cürrü Israel, arrübama chaquionopümainqui iyoti Tuparrü, ta aboma tacana arrobe nobirraca omenso. ⁷Amecosi aburaboi que tüsaiypae üriaburuti Tuparrü. ⁸Apacura ümo bama maunrocono. Apitümoniancasama tato bama coiño. Apacura ito ümo bama upusara ñañeturrüma (lepra). Apicüpusuma bama machoboreca auqui macirrtianuca. Arrüna nabüriaca torrio aume champürrtü apacompratio. Sane ito tapü apacobracama bama urriancama tato aboi.

⁹Tapü apacaca oro ni monirripü. ¹⁰Tapü apacaca tapiquirri. Tapü apacaca ito rroparrü. Amecosi saneantai aübu arrüna ane aucütüpü. Tapü apacaca zapaturrü y tapü apacaca bastón. Arraño tusio te aume que artri naqui batrabacara tiene que atorri utuburiboti.

¹¹Artrü apiñatai au taman pueblurrü o au taman rranchurrü, apapacheti naqui ñoñunrrü macumananaunrrtai. Abasiqia au niporrti, cheperrtü amecatito auqui manu pueblurrü. ¹²Artrü apiñatai au taman porrü, apanqui nurria ümo bama pohoso. Amucanaño sane: “Taiquiana urria nabaca uiti Tuparrü”. ¹³Artrü yasutiuma arrümanu napanquiqui, urria nacarrüma. Tapürrtü chiyasutiupüma chücurusiopüma aboi. ¹⁴Artrü chiyasuriurupüma

año y chirranrrüpüma oncoimia napanunecaca, amecosi ito auqui manu porrü o auqui manu pueblurrü. Apipetobisaño nurria arrtü tünamequito nauqui, atusi ümoma que ane nipünatema. ¹⁵Ñemanauncurratoe sucanañü aume: Arrtü ñatai manu nanenese nesa bacurracarrü torrio carrticurrü ümo manu pueblurrü. Arrümanu carrticurrü manrrü fuerte pünanaqui manu torrio ümo bama pohoso auqui Sodoma y Gomorra.

Mataquisünümacacarrü

¹⁶Nantito Jesús ümo bama ñanunecasartti:

—İlcüpucaño tacana arrobe nobirracca omeana nuitümüca! Arraño tiene que amasarai nurria autacuapatoe, tacana noirroborrü. Pero sí tapü ane causane aboi ümo maquiataca. Apiña tacana nututaquiquia. Champü causane oboi. ¹⁷Amasai nurria, itopiqui arrübama macrirrtianuca tiene que autorriquia uimia ümo bama mayüriabuca, nauqui acurrutama abaübu. Aucüboriquia uimia au ba poca sinagoga cauta nantarrü meaboma bama israelitarrü. ¹⁸Hasta iquianama año ito ñana esa bama tarucu nüriacarrüma y esa bama mayarusürüca mayüriabuca auqui niyaca. Así que arraño caüma puerurrü apanitane nisüri isucarüma y isucarü nanaiña genterrü icu na cürrü. ¹⁹Arrtü itorrimianama año mecu bama mayüriabuca, tapü ane nümoche aboi iyo arrüna apanitacabo o arrüna aburapoboibo isucarüma. Au manu nanenese ñana torrio aume uiti Bae Tuparrü arrüna apanitacabo. ²⁰İtopiqui champürrtü aboiyapatoe arrüna apanitaca, ta uiti Espfritu Santo naqui anati au nabausasü uiti Uyaü.

²¹'Arrübama mañonñunca itorrimianama bama yaruquitörrümantoe nauqui ataborimia. Aboma bama mayaüca torrioma ito ui bama yaütörrüma. Y arrübama mayaüca tüboricoma ümo bama yaütörrüma. Sane nauquiche coiñoma uimia. ²²Namanaiñantai tüboricoma aume auqui niyaca. Pero arrti naqui chübatachebopü ñacoconauncurrti ñemo, tonenti naqui iyebo uiti ñana esati Tuparrü au napese. ²³Arrtü itaquisünümacanama año au taman pueblurrü, aupesübu auqui manu. Amecosi au quiatarrü pueblurrü. Ñemanauncurratoe sucanañü aume: Arrüñü Ñemanauncurratoe Noñünnrü tiene que ise tato abarrüpecu antes que apiñanai au nanaiña puebluca auna cürrü Israel.

²⁴'Arrti taman alumnörrü chüpuerurrüpü ane manrrü nüriacarrti pünanaquiti maestro. Arrti taman mosörrü chüpuerurrüpito ane manrrü nüriacarrti pünanaquiti ipiatronetörrti. ²⁵Arrti alumnörrü tiene que atakisürüti isiatai tacanati maestro. Arrti mosörrü isiatai. Arrüñü tacanati aupatron. Arraño tacana bama imoso. ¿Uramapü sane aume, arrtü namatü ñemo choborese?

Quiti ñünanache uirru

²⁶Tapü aupirruca ñünana bama aboma ausiu, bama tüboricatai aume. İtopiqui chüpuerurrüpü ane arrümanu chütusiopü. Nanaiña arrüna anecanatai tiene que

atusi. ²⁷Arrüna aumeantai surapoi anecanatai, arraño tiene que aburaboi nurria isucarü macirrtianuca. Tapü apiñanecata isucarüma. Arrüna surapoi ituru namumasuatai, arraño tiene que autosibine isucarü macirrtianuca, nauqui atusi ümoma. ²⁸Tapü aupirruca ñünana bama itabaitama arrüna cürri nocütüpü. Pero nuyausüpü chüpuerurrüpüma aitabaimia. Aupirru tone ñünanati Tuparrü naqui puerrü aipenenoti año au infierno aübu nanaiña naücütüpü y nabausüpü.

²⁹'Bacobraca tamantai monimia itobo torrü nutaumanca. Pero arrti Tuparrü chüpuerurrüpü atacüru ñaquioncorrti ni iyo nampü taman nutauma arrtü paquio acü. ³⁰Sane ito niqui nautanu abe mupacümuncunu uiti Tuparrü taiquiana taman. ³¹Sane nauquiche tapü aupirruca. Arraño manrrü naucua ümoti Tuparrü mopünanaqui nutaumanca.

Arrübama urapomia nürirrti Jesucristo isucarü genterrü

³²Nantito Jesús ümoma:

—Arrübama urapomia isucarü macirrtianuca que icocoromañü, arrüñü ito surapoi isucarüti Iyaü naqui anati au napese que arrüma nirranunecasama. ³³Tapü arrübama mapaña isucarü macirrtianuca que chisuputarapümañü, arrüñü ito tiene que suraboi isucarüti Iyaü naqui anati au napese que arrüma chitonempüma airranunecasa.

Uiti Jesús cuatü bahiquirri icu cürri

³⁴Nantito Jesús ümoma:

—Arraño apapensaca que arrüñü isecatü nauqui manrrü urria nacarrüma bama macirrtianuca icu na cürri. Abu chüsanempü. Auqui niyaca caüma ane bahiquirri. ³⁵Isecatü nauqui atüborimia bama mayaüca ümo bama yaütorrüma y arrüba cupiquiquia ñome niyupaparrü, arrüba tüboposo ñome niyupaparrrü. ³⁶Sane caüma enemigorrüma ümomantoe abu, familiarrüma.

³⁷'Arri naqui manrrü nicuarri yaütoti y nipiäcütoti ümoti rropünanaquiñü, chüpuerurrüpü yasuriurutito. Isiatai arrti naqui manrrü nicuarüma bama aübosirrti ümoti rropünanaquiñü, chüpuerurrüpü yasuriuruti. ³⁸Arri naqui chirranrrüpü atakisürü tacana arrüñü, chüpuerurrüpü yasuriuruti. ³⁹Arri naqui chirranrrüpü aco auqui niyaca, ensoro pünanaquiti nisüboriquirrti au napese. Tapü arrti naqui coño auqui niyaca, tonenti naqui iyebo uiti au napese ichepeñü.

Nucua uiti Tuparrü

⁴⁰Nantito Jesús ümoma:

—Arri naqui yasuriuruti año, yasuriurutiñü ito. Arrtü yasuriurutiñü, arrti Tuparrü yasuriurutitito ta uiti aiciüpuñü. ⁴¹Arri naqui yasuriurutiti taman profetarrü itobo arrüna ñanitacarri au nürirrti Tuparrü, ane nicuarri uiti Tuparrü isiu tacana arrüna nicua bama profetarrü. Arri naqui yasuriurutiti taman ñoñünrrü naqui buenorrü au nisüboriquirrti, ane ito nicuarri

uiti Tuparrü isiu tacana arrümanu nicuarrti maniqui ñoñünrrü buenorrü.
 42Arrtü anati naqui macumanana taman basorrü turrü ümoti naqui manrrü
 taquisüratai uturuqui bama nirranunecasa, ane ito nicuarrti au napese itobo.

Arrübama yacüpusurrti Juan Bautista

11 1Nauquiche tüchauqui ñanunecacarrti Jesús ümo bama doce
 ñanunecasarrti, sürotitü auqui manu anunecati ubau ba
 piquiataca puebluca y poca.

2Artri Juan Bautista anancati au preso. Ipiatenti nanaiña arrüna
 isamutenti Cristo. Auqui bacüpuruti ümo bama torrü ñanunecasarrti,
 nauqui ariorrüma esati Jesús 3anquirioma anquirioma pünanaquiti:

—¿Arrücü Cristo, naqui yebobotü, o tiene que suparrüpera cümenutiqui?

4Aiñumuti Jesús:

—Amecosi aburaboi isucarüti Juan enterurrü arrüna amarrtai y
 arrüna amoncoi. 5Aburasoi isucarüti que arrübama supuso asarama tato.
 Arrübama chamencopü amencoma tato. Arrübama maunrocono ui lepra
 urriancama tato. Arrübama chonaunpüma onauma tato. Arrübama tücoiño
 süboricoma tato. Arrübama taquisürü, abe omirria manitacaca isucarüma,
 arrüba uiche ataesübuma eanaqui nomünantü. 6Aburasoi ito isucarüti
 arrüna sane: Urriampae nacarrüma bama oncomatü nurria iñemo.

7Nauquiche tüsüroma tato manuma ñanunecasarrti Juan, artri Jesús
 manitanati icütüpüti Juan isucarü manuma macrirrtianuca, nanti:

—¿Isane nümoche abacatü aucutanu au roense numo apapaseacati Juan?
 ¿Taqui abacatü amasaraiti ñoñünrrü naqui tacana taman nihi tutairri arrüna ane
 mapetonono ui maquiütürrü? No, champürrtü sane nacarrti Juan. 8¿O abacatü
 amasarati taman ñoñünrrü, naqui champü tacanache naibiquirrti? Arraño
 tusio aume que arrübama champü tacanache naibiquirrimia aboma au nipo
 bama mayüriabuca. 9Ilsanempü nümoche abacatü! ¿Taqui abacatü amasarati
 taman profetarri? Bien ñemanauntu, artri te profetarri. Manrrüqui nüriacarri
 pünanaquiti profetarri. 10Artri Juan tonenti maniqui coreorrü uiti Tuparrü. Ane
 te corobo icütüpüti Juan arrüna sane nurarri Tuparrü ümoti Cristo:

Rracüpuca ümoti taman coreorrü nauqui acusürüti, aicoñocoti
 cutubiurrü acümenucu.

11Ñemanauncurratöe sucanañü aume —nanti Jesús ümo genterri—,
 icu na cürrü champü tanati naqui manrrü nüriacarri pünanaquiti Juan
 Bautista. Pero auna cauta üriabucati Tuparrü, artri naqui chitonempatai
 ane manrrü nüriacarri pünanaquiti Juan.

12'Auqui numo aübo ayeti Juan Bautista anunecati, tanancatai nüriacarri
 Tuparrü hasta caümainqui. Pero aboma bama churriampatai ümoma,
 sane nauquiche rranrrümampae aitochenacama. 13Itopiqui artri Moisés y
 namanaiña bama profetarri urapoimiacaü arrünarrrü üriabucati Tuparrü.
 Numo cuati Juan, chauqui tirranrrü acoco nurarrüma tücañe. 14Artri

aurrianca apicoco arrüna sane, entonces apicoco. Arrti Juan tonenti profetarrü Elías, naqui yebobotü. ¹⁵Arraño ane namumasu, amonsapesio.

¹⁶Nantito Jesús:

—¿Aüibuchepü ichepecanama bama macrirrtianuca arrüna tiemporrü?
Arrübama macrirrtianuca caüma tacana masiomanca. Cupiusuma au plaza y tosicocoma ümo bama icumpañeruturrüma: ¹⁷“Supapunuca burri aume, pero chautococapü. Supasoniquia aume arrüna orronenatai, pero chabareocapü”.
¹⁸Itopiqui numo cuati Juan, amucanaño que anati choborese auti ui arrüna amarrtai charucupatai niyacarrti y chichabotipü vinorrü. ¹⁹Auqui isecatito arrüñü naqui Ñemanauncurratoe Ñoñünrrü. Irraca, ichaca y aburapoi iñemo que arrüñü chaborrñü y tarucu nirrac. Amucanaño ito que arrüñü amigorñü ümo bama tarucu nomünantü uimía y arrübama mayacobra impuestorrü. Pero tusiatai arrüna ñapanauncurrti Tuparrü ui arrüna urria isamutenti auna icu na cürü.

Sane ñanunecacarrti Jesús.

Arrüba puebluca auna cauta chicocoromatipü Jesús

²⁰Auqui arrti Jesús macuansomoconoti ümo bama pohoso ubau manio puebluca auna cauta manrrtai ñasamucurrti milagorrü tücañe. Itopiqui arrüma champürrtü iñorronconomacü. ²¹Nanti sane ümoma:

—Autaqisürücatai bama auqui manio puebluca Corazín y Betsaida.
Arrübama pohoso au manio puebluca Tiro y Sidón tarucu nomünantü uimía tücañe. Pero arrtü nampü omirriante arrüba milagorrü taha tücañe, coboipü aiñorronconomacü, aibioma luto y manrrü tübütürü itama, na atusi orronene ümoma. ²²Bien sucanañü aume. Arrtü iñatai manu nanenese nesa bacurrtacarrü, tiene que atorri aume manrrü fuerte carrticurü pünanaqui arrüna torriobo ümo bama auqui Tiro y Sidón. ²³Y arraño bama auqui Capernaum, napaquioncopü tarucu manauncurrti aume. Pero arraño tiene que autapeneca au nusutu cürü. Arrtü nampü omirriante arrüba milagorrü au manu pueblurrü malorrü Sodoma tücañe, aninquipü caüma, itopiqui iñorronconomacüpü, y chiñarriopü. ²⁴Ñemanauncurratoe sucanañü aume —nanti Jesús, —au manu nanenese ñana nesa bacurrtacarrü, arraño tiene que atorri aume carrticurü manrrü fuerte pünanaqui arrüna carrticurü torriobo ümo bama pohoso auqui Sodoma.

Ausiapata yesañü apacansa

²⁵Au manu tiemporrü arrti Jesús meaboti sane:

—Arrücü Iyaü ane nüriaca ümo napese y ümo cürü ito.
Ñachampienccaca aemo, itopiqui aiñanecaquío arrüba sane pünanaqui bama namatü que tarucu ñapanauncurrüma y aitusiancaquío isucarü bama masiomanca. ²⁶Sane te Iyaü. Itopiqui sane arrüna narrianca.

²⁷Auqui nanti Jesús ümo manuma amoncoma acamanu:

—Artri Iyau itorrimiatati isüriacabo ümo nanainñantai icu na cürriü. Arrüñü Aütorrti Tuparrü. Champüti naqui isuputaratiñü nurria, arrtiatat Iyau. Y champüti naqui isuputaratiti nurria Iyau, arrüñüñantai ichepe bama itusiancacati isucarüma. ²⁸Ausiapata tauna yesañü namanaiña bama batachebo ui tarucu penarrü aboi, y ui napacoconauncu ümo bacüpucuca. Apacansa. ²⁹Apacoconaun iñemo, amonsoi nisura, apiña isiuquiñü, arrüñü champü causane sobi au nisüboriqui. Tarucu nibuenucu, sobi macansara nabausüpi. ³⁰Arrüna nirrácüpucu aume champürrtü cuerrtarri naqui apicoco. Puerurtai año apisamune.

Nubatrabacaca au nanenese nesa macansacarrü

12 ¹Au manu tiemporrü tücañe, taman nanenese nesa macansacarrü, artri Jesús sürotitü ichepe bama ñanunecasarrti auqui manio ñanaunca, arrüba cauta ane trigo. Arrümanuma ñanunecasarrti cürüpioma. Auqui baurtaquioma chimiantai nüta trigo y basoma. ²Arrübama fariseorrü nauquiche arrtaimia arrüna sane, namatü ümoti Jesús:

—iAsatü. Arrübama anunecasa baurtaquioma nüta trigo, abu churriampü batrabaca au nanenese nesa macansacarrü!

³Aiñumuti Jesús:

—¿Taqui champürrtü lehebo año icu Nicororrü arrüna isamutenti David tücañe ichepe bama icumpañeruturrti, nauquiche cürüpioma? ⁴Sürotipo au niporrti Tuparrü aübuma, iyarioma manio pan mosamamecana ümo bamantai sacerdoterrü. ⁵¿Taqui champürrtü lehebo año ito arrüna nantü au nüriacarrü uiti Moisés sane? Arrübama sacerdoterrü chümacansarapüma au nanenese nesa macansacarrü. Batrabacarama au niporrti Tuparrü. Pero ta champü nipünatema uirri. ⁶Arrüñü ane manrrü nisüriaca pünanaqui bama batrabacara au niporrti Tuparrü. ⁷Arraño champürrtü iyebo aboi arrüna nantü au Nicororrü: “Manrrü irranca nauqui ane naupucüru itacuti quiatarri, pünanaquirrtü apacumanaca numuquianca iñemo”. Arrtü nampü iyebo aboi, quiubupü abasiquia apanita arrüna churriampü ümoti naqui champü nipünantenti. ⁸Itopiqui arrüñü Nëmanauncurratoe Ñoñünrrü, ane ito nisüriaca ümo arrüna nanenese nesa macansacarrü.

Artri maniqui ñoñünrrü süübatai nehertri

⁹Auqui artri Jesús sürotitü auquimanu. Sürotipo au manu porrü sinagoga. ¹⁰Acamanupo anancati taman ñoñünrrü naqui süübatai nehertri. Arrümanuma fariseorrü bapacheroma niquiubuma causane nauqui urabomati Jesús. Ñanquitioma pünanaquiti, namatü:

—¿Urria bacura ümo bama maunrocono au nanenese nesa macansacarrü?

¹¹Aiñumuti Jesús:

—Supiarrtü anati taman abuturuqui naqui paquio niyaburrti nobirrama au cütubirri au nanenese nesa macansacarrü. ¿Aensapü chüsürotitüpi aiquiaübuti tanene au nanenese nesa macansacarrü? ¹²Arraño tusio nurria

aume que manrrtai nicuarrti ñoñünrrü pünanaqui taman nobirrarrü. Sane nauquiche urria uisamune arrüna urria au nanenese nesa macansacarrü.

¹³Auqui nanti Jesús ümoti maniqui ñoñünrrü:

—iAipesünaca nehe!

Ipesünacatati maniqui ñoñünrrü. Au manu rratorrü urriante tato tacana arrümanu quiatarrü. ¹⁴Arrümanuma fariseorrü caüma süromatü türtüpo auqui manu esaquiti Jesús. Auqui baparioma causane uimia nauqui aitabairomati Jesús.

Piaracarrü icütüpüti Jesús

¹⁵Pero arrti tusiatai ümoti. Sane nauquiche sürotitito auquimanu. Cütüpürrü genterrü sürotü isiuti. Isiu na namenrrti bacurarati ümo namanaiña bama maunrocono. ¹⁶Macuansomoconoti ümoma, tapü urapoimia isucarü bama macirrirtianuca. ¹⁷Arrüna nisamutenti Jesús, ta nauqui acoco arrüna urapoiti tücañe profetarrü Isaías, nauquiche nanti:

¹⁸Sane nurarrti Tuparrü:

Tonenti naqui baserebioti iñemo y tacümanauncunuti sobi.

Bien cuasürüti iñemo.

Tonenti naqui ipucünuncatai icuatati.

Tiene que rracüpu niyesa Espíritu au nausasürrti.

Tiene que ito uraboiti isucarü macirrirtianuca causane niyücü nirraccurrtaça aübuma.

¹⁹Chüpuerurrüpü nauqui ahiti, ni atosibitipü, ni uratoquitipü yusiu cayaca.

²⁰Chübachebotipito chacu bama champüqui nicusüurrüma, ni uratoquitipü ümoti naqui tarucapae nischequirriti.

Chübatachebotipü cheperrtü urriante uiti nanaiña arrüna urria au narrrarrti Tuparrü.

²¹Y nanaiña genterrü icuqui na cürrü tiene que oncotü ümoti.

Namatü ümoti Jesús ane nüriacarrti uiti choborese

²²Auqui iquianamati esati Jesús maniqui taman ñoñünrrü naqui chasarapütü, y chüpuerurrüpü anitati, itopiqui anati taman choborese auti. Arrti Jesús bacurarati ümoti. Sürotitü choborese auquiti uiti. Sane nauquiche arrti maniqui ñoñünrrü asarati tato y puerurrü ito anitati tato. ²³Enterurrü manuma macirrirtianuca amoncoma acamanu cütobüsoma ui arrüna nisamutenti Jesús, namatü:

—¿Taqui tonenti Cristo naqui cuabotü eanaqui nesarrti familiarrü David?

²⁴Nauquiche oncoimia bama fariseorrü arrüna sane, namatü:

—Arrti naqui ñoñünrrü bacüpuruti ümo bama machoboreca auqui macirrirtianuca, solamenterrü itopiqui torrio üriacaboti uiti Beelzebú naqui üriatu bama machoboreca.

²⁵Pero arrti Jesús chauqui tütusiatai ümoti arrümanu ñapensacarrüma, nanti ümoma:

—Supiarrtũ ane taman nación. Arrũbama mayũriabuca bahiyoma ñumomantoe. Arrũmanu nación chũpuerrũpũ urura, mameso nũriacarrtũ. Isiatai arrtũ ane taman familiarrũ o taman pueblurrũ auna cauta tũboricomantai ñumomantoe, chũpuerrũpũ urura, tiene que aĩnarri. ²⁶Sane ito pasabo ñumoti choborese, arrtũ bacũpurutipũ tanene auqui macirrtianuca ñumo bama machoboreca. Uirrtiatoepũ mameso nũriacarrti, chũpuerrũpũ urura nicusũurrti. ²⁷Arraño amucanaño que arrũñũ rracũpuca ñumo machoboreca auqui macirrtianuca ui nũriacarrti naqui yarusũrũrũ choborese. ¿Carũ arrũbama napanunecasa quitipũ naqui ñriacache arrũna uiche puerurrũma acũpuma tanene ñumo machoboreca? ¿Aensapũ ui nũriacarrti choborese ito? A ver te urama sane ñumo arrũna napanitaca ñemo. ²⁸Pero arrtũ ñemanauntu —nanti Jesús—, rracũpuca ñumo machoboreca auqui macirrtianuca ui nũriacarrti Espĩritu Santo, naqui cuati esaquiti Tuparrũ, auqui caũma tusiatai que chauqui tũriabucati Tuparrũ abarrũpecu. ²⁹Chũpuerrũpũ uiquiaũbu nenarrirrti naqui tarucu nicusũurrti arrtũ chũtomoenotipũ primero osoi.

³⁰Nantito Jesús:

—Arrti naqui chocũmanapũ ichacuñũ, tũboricotiatai ñemo. Arrti naqui chũbatasurutipũ ichepeñũ ñumo macirrtianuca isiuñũ, ñarrimiacata arrũba omirria. ³¹Sane nauquiche sucanañũ aume, que puerurrũ arrimiaca tato aruqui nanaiñantai nomũnantũ aboi. Pero arrti naqui churriampatai nurarrti ñumoti Espĩritu Santo, chũpuerrũpũ ane marrimiacatarrũ ñumoti. ³²Arrũñũ Ñemanauncurratoe Ñoñũrũrũ, arrtũ anati naqui churriampatai nurarrti ñemo, ane marrimiacatarrũ tato ñumoti. Pero arrtũ anati naqui churriampatai nurarrti ñumoti Espĩritu Santo, chũpuerrũpũ ane marrimiacatarrũ tato ñumoti, ni aunampũ icu na ciũrrũ, ni au napesepũ ñana.

Puerurrũ atusi isane naca plantarrũ isiuqui nũtarrũ

³³Nantito Jesús ñumoma:

—Arrtũ ane taman suese urria, ñta ito omirria. Tapũrrtũ ane taman suese churriampũ, chomirriampũ nũtarrũ. Sane nauquiche usuputacai suese ui nũtarrũ, arrtũ urria o churriampũ. ³⁴Sane ito arraño bama ñiñupariante noirroboca, chũpuerrũpũ urria arrũna napanitaca, itopiqui malorrũ año. Arrũna ane au nuyausasũ tone arrũna manitate. ³⁵Arrti ñoñũrũrũ buenurrũ, manitanati arrũba omirria, itopiqui arrũba omirria abe au nausasũrrti. Tapũ arrti naqui ñoñũrũrũ malorrũ, manitanati arrũba chomirriampũ, itopiqui arrũba chomirriampũ abe au nausasũrrti. ³⁶Ñemanauncurratoe sucanañũ aume: Ñana au manu nanenese nesa bacurrtacarrtũ, tiene que apacurrtario nanaiña arrũba chomirriampatai napanitaca tũcañe. ³⁷Itopiqui tiene que apacurrtai isiuqui arrũna napanitaca. Arrti naqui manitanatai ane nipũnatenti. Pero arrti naqui besũro nurarrti, champũ isane aũbuti.

Manquioma milagrorrű

³⁸Auqui namatű ümoti Jesús manuma fariseorrű y arrűmanuma maestro ümo nűriacarrű:

—Maestro, suirranca nauqui asamu taman milagrorrű suisucarű, nauqui atusi suiñemo que arrűcű ayecatű esaquiti Tuparrű.

³⁹Iñumutati Jesús manu nurarrűma:

—Arrűna genterrű auna y arraño bien malorrű, chapaquioncañopű iyoti Tuparrű. Aurrianca amasarai señarrű y milagrorrű. Chűpuerurrűpű atorri quiatarrű señarrű y milagrorrű aume, cunauntañantai manu señarrű uiti profetarrű Jonás, arrűna pasabo tůcañe ümoti. ⁴⁰Itopiqui arrti Jonás anancati cűbobi manu yarusűrűrű nopiocorrű, trerrű naneneca y trerrű tobiquia nacarrti ahu. Sane ito pasao iñemo arrűñű Ñemanauncurratoe Ñoñűnrű, tiene que yaca cűtu eana cűrrű trerrű naneneca y trerrű tobiquia. ⁴¹Arrtű iñatai manu nanenese nesa bacurrtacarrű, arrűmanuma mañoñűnca auqui manu pueblurrű Nínive tůcañe, atűraiyo y uimía caűma uraboimia carrticurrű ümo na genterrű nesa arrűna tiemporrű. Itopiqui arrűma tůcañe iñorronconomacű, numo anancati Jonás manunecanati ümoma, tapű asioma aűbu arrűna churriampatai nisűboriquirrimia. Arraño caűma chaurriancapű apicocoroti naqui manrrű pűnanaquiti Jonás, ta arrűñű. ⁴²Arrűmanu ito paűrrű nűriaburrű auqui tauna ümo mancarrű, atűraiyo ito ñana arrtű iñatai manu nanenese nesa bacurrtacarrű y uirri caűma urapoi carrticurrű ümo na genterrű nesa arrűna tiemporrű, itopiqui tone cuatű tůcañe auqui iche nauqui onsaperio ñanunecacarrti Salomón. Arraño caűma chaurriancapű apicocoroti naqui manrrű pűnanaquiti Salomón, ta arrűñű.

Basűcűbűcoti tato choborese auna cauta anancati

⁴³Arrtű anati taman choborese aűbo aiquiaűburutiyű auquiti taman ñoñűnrű, amencotiatai eana rroense auna cauta champű turrű, yapachequirrti arrűna cauta acansati. Arrtű chűmataműnanatipű, ⁴⁴auqui caűma mapensarati: “Yeca tato au nipo, arrűna auquiche saliboñű”. Arrtű basűcűbűcoti tato, icuñunutiti maniqui ñoñűnrű tacana arrone porrű bien sunucunu, bien coñocono y cűheca. ⁴⁵Auqui caűma sűrotitű atasuti ümo bama siete maquiataca machoboreca manrrű malorrűma pűnanquiti, nauqui aűroma ichepeti avivimía auti maniqui ñoñűnrű. Sane nauquiche manrrű churriampatai nisűboriquirrti. Sane tiene que apasa ümo na genterrű malorrű arrűna tiemporrű.

Nipiacűtoti Jesús y arrűbama yaruquitortti

⁴⁶Nauquiche anancatiqui Jesús manitanati ümo genterrű, auqui iñatai nipiacűtoti ichepe bama yaruquitortti. Arrűma sűsioma tűrűpo, rranrrűpűma aparimía aűbuti. ⁴⁷Tamanti urapoiti isucarűti Jesús, nanti ümoti:

—Napaciüma y bama aruquитайqui aboma auna türüpo, rranrrüma aparimia aübüciü.

⁴⁸Pero arrti Jesús nanti ümoti maniqui urapoiti isucarüti:

—¿Ñacusanempito nipiäcü, y ñacubamapito bama masaruquитайqui?

⁴⁹Auqui masamunuti señarrü ümo bama ñanunecasarrti, nanti ümoma:

—Arrübama nirranunecasa tonema tacana nipiäcü, y tonema bama masaruquитайqui. ⁵⁰Itopiqui cualquierarrtiatat naqui icocota arrüna yacüpuçurrti Iyaü, naqui anati au napese, tonenti saruqui y tone niquiasi y nipiäcü. Sane nanti Jesús ümo genterrü.

Machepecatarrü: Arrti naqui mancüturu

13 ¹Au manuinqui nanenese arrti Jesús sürotitü auqui manu porrü arrüna cauta anancati. Sürotitü atümoti abeu manu narubaitu turrü. ²Sürümanama macirrtianuca ñataimía acamanu esati. Süroti au taman barco, arrüna ananca esa nabeurrü, tümonsoti ahu. Enterurrü genterrü ane abeu narubaitu turrü. ³Auqui manunecanati ümoma aruqui nanaiñantai. Urapoitito isucarüma arrüna machepecatarrü sane:

—Tamanti ñoñünrrü sürotitü ancütuti au niyorrti. ⁴Isiu na yasupicurrü niyorrrü, abe arrüba bupaquio isiu cutubiurrü. Auqui cuantio nutaumanca y yubario. ⁵Piquiataca bupaquio omonü canca, auna cauta chimiantai cürrü. Orratorrtai ububaüro, itopiqui chotüsapü nubacarrü. ⁶Nauquiche tütane ape surrü bosübo uirri. Champü te nurria niyurranacarrü. ⁷Piquiataca bupaquio omeana cümeca. Musunaun arrümanio cümeca y chiyebopü ito oboi manio plantamanca. ⁸Pero piquiataca niyoca bupaquio eana arrüna urria cürrü. Sane nauquiche ububaüro y musunaun. Urriampae nobütacarrü. Abe ba pachebo cien granurrü. Piquiataca pachebo sesenta y abe ito ba pachebo treinta granurrü. ⁹Arraño ane namumasu, amonsapesio te.

Itopiquiche arrüba machepecataca

¹⁰Auqui arrümanuma ñanunecasarrti Jesús süromatü esati, nauqui namatü ümoti:

—¿Causane asiquia anitanio machepecataca isucarü macirrtianuca? Cuestarrü aye uimia.

¹¹Auqui iñumutati Jesús:

—Aumeantai tusio uiti Tuparrü causane arrüna niyücürrü taha auna cauta ane nüriacarrti. Pero arrübama macirrtianuca chüpuerurrüpü atusi ümoma. Chütorriopü ümoma uiti Tuparrü. ¹²Itopiqui arrti naqui tusio ümoti torrioiqui manrrü ipiacaboti, pero arrti naqui chütusiopü nurria ümoti, hasta arrümanu chimiantai ipiacati carübu pünanaquiti. ¹³Sane nauquiche rranunecaca oboi machepecataca, itopiqui arrüma arrtanaunrrüma y onaunrrüma ito, pero chentienderrüpüma. ¹⁴Sane cocono arrümanu urapoiti profetarrrü Isaías tücañe:

Arraño tiene que amoncoi, pero chüpuerurrüpü aüro au nautanu.

Tiene que amasacatito, pero chüpuerurrüpi aye au namasata arrüna amarrtai.

¹⁵ Itopiqui tarucu nitai nabausasi.

Uirri arrüna chautanunauncapü ümo arrüna arrtü ane isane amoncoi.

Abaca ito tacanarrtü umamana nausüto, chamasacapütü nurria.

Sane nauquiche chüpuerurrüpi aye aboi, chüpuerurrüpi ito

apiñorronconaño y chüpuerurrüpi autoesübu sobi eanaqui nomünantü.

¹⁶ Nantito Jesús ümo bama ñanunecasarri:

—Pero arraña urriampae nabaca itopiqui amasacatü ui nausüto y süro au nautanu arrüna amoncoi. ¹⁷ Ñemanauncurratoe sucanañi aume, sürümanama bama profetarrü y arrübama urria nisüboriquirrimia tücañe, rranrrüpiüma asaraimia arrüna amarrtai caüma. Rranrrüpiüma ito onsaperioma, arrüna amoncoi caüma, pero chiyebopü ümoma, itopiqui coiñoma.

Artri Jesús urapoiti isane ümoche arrümanu machepecatarrü apüti naqui mancüturu

¹⁸ Nantito Jesús:

—Suraboira ito caüma ausucarü isane nümoche arrümanu machepecatarrü ümoti maniqui ñoñürrü sürotitü ancütuti. ¹⁹ Aboma bama oncoimia arrüna manitacarrü icütüpi nüriacarri Tuparrü, pero chentienderrüpiüma ümo. Iyebo uimia tacana nubaca arrümanio niyoca bupaquio isiu cutubiurri. Cuati choborese iquiaübutati arrümanio omirria manitacaca auqui nausasürüma, tacana manio nutaumanca. ²⁰ Arrümanio niyoca bupaquio omonü canca isiu tacana arrübama oncoimia nurarri Tuparrü y yasutiuma aübu nipucünuncurrüma. ²¹ Pero chipiacapüma asamuma tairri. Ui arrüna ñacoconauncurrüma ümoti Tuparrü, taquisürüma y aboma bama tüboricomantai ümoma. Sane caüma orratorrtai iñocotama arrüna ñacoconauncurrüma ümoti Tuparrü. ²² Arrümanio niyoca omeno cütü omeana cümeca, isiu tacana bama oncoimia arrüna nurarri Tuparrü, pero ñana manrrü aboma yusiu arrüba nenarri nantai cürri. Itopiqui tarucapae penarrü uimia iyo nisüboriquirrimia. Ui arrüna sane ñapensacarrüma, tacürusu ñaquioncorrüma iyoti Tuparrü. ²³ Pero arrümanio niyorrrü omeno cütü au manu cürri urria, ta tacana bama oncoimia nurarri Tuparrü, iyebo uimia. Y urria nisüboriquirrimia. Aboma tacana manu niyorrrü bachebo cien granurri, piquiataca tacana ba pachebo sesenta granurri, o tacana manu ütao treinta granurri auqui taman niyorrrü.

Machepecatarrü: Narrüchopüro churriampü eana trigo

²⁴ Auqui artri Jesús urapoiti arrüna quiatarrü machepecatarrü: —Arrüna arrtü üriabucati Tuparrü oemo, isiu tacanati maniqui taman ñoñürrü mancüturu urria niyo trigo au niyorrti. ²⁵ Au tobirri nauquiche tümanumuma macirrtianuca, cuati maniqui nesarri enemigorrrü ancütuti narrüchopüro

eana nesarriti trigo, arrümanu isiu nacarrü tacana trigo, abu churriampü.

²⁶Ubaüro arrümanu trigo, abe nütarrü. Ubaüro ito manu narrüchopüro.

²⁷Sane nauquiche süromatü manuma mamosoca uraboimia isucarütü naqui iyoche: “Señor, arrücü ancütuca aucutanu arrüna urria au naho. ¿Causanempü nauqui ataso ito caüma ui narrüchopüro?” ²⁸Auqui arrti maniqui iyoche nanti ümoma: “Arrüna sane es uiti naqui tüboricatai isuatañü”. Auqui arrümanuma mamosoca ñanquitioma pünanaquiti maniqui iyoche: “Arrianca nauqui sopiquiyaurio manio narrüchopüro?” ²⁹Aiñumuti maniqui iyoche: “No, tapü apiquiyauquio, itopiqui arrtü apiquiyauquio rrepente boquiyauru ito manio trigo abe acamanu omeana. ³⁰Mejor apiñoco, tari ñusunauna juntorrü cheperrtü tupubu trigo. Auqui caüma rracüpuca ümo bama niyesa trabajadorerrü aiquiyäubuma primero arrümanio narrüchopüro nauqui aiñonocoma. Auqui ito caüma tana manu trigo nauqui ahübu iquiana nipo.

Machepecatarrü: Niyo mostaza

³¹Iñatatito quiatarrü machepecatarrü, nanti sane:

—Arrüna nüriacarriti Tuparrü oemo, es tacana arrone niyo mostaza sürocütü uiti taman ñoñünrrü au niyorrti. ³²Ñemanauncurratöe chitonempatai arrümanu niyo mostaza. Tapü arrtü ubaüro, isamunü sürümanarrü tacana suese. Arrüba nutaumanca caüma pasumenunu yocütüpü nipiarrü.

Machepecatarrü: Levadura

³³Iñatatito Jesús arrüna quiatarrü machepecatarrü isucarü macirrtianuca, nanti sane:

—Arrüna nüriacarriti Tuparrü oemo ta tacana arrümanu nürirri levadura arrüna uiche atusa tubarrirri arrtü masamuca pan. Taman paürrü iñata eana tubarrirri, auqui bien icorauta, nauqui aiñarri nurria eana manu tubarrirri.

Umoche arrüba machepecataca

³⁴Arrti Jesús nanaiña urapoiti isucarü genterrü oboi machepecataca. Chümanitanatipü ümoma mientras que chiñatatipü machepecatarrü.

³⁵Pasao arrüna sane, nauqui acoco arrümanu turapoiticaü tücañe taman profetarrü, nauquiche maconomonoti sane:

Rranitaca yupu machepecataca.

Surapoi arrüna ananca anecana, auqui numo maübo urriane na cürrü sobi, nanti Tuparrü.

Urapoiti Jesús isane nümoche arrüna machepecatarrü apü narrüchüpüro eana trigo

³⁶Auqui arrti Jesús masamunuti nariorrü ümo macirrtianuca. Sürotipo au taman porrü. Acamanu arrüabama ñanunecasarriti cuamatü esati y namatü ümoti:

—Urasoi suisucarü, isane nümoche arrümanu machepecatarrü, narrüchopüro au ñanaunrrü.

³⁷Auqui urapoiti isucarüma, nanti sane:

—Arrti maniqui mancüturu, ta arrüñü, naqui Ñemanauncurratoe Ñoñünrrü.
³⁸Y arrümanu ñanaunrrü tone arrüna cürü. Arrümanu niyo trigo, tacana arrübama macoconaunrrüma ümoti Tuparrü. Tapü arrümanu narrüchopüro tonema bama macoconaunrrüma ümoti choborese. ³⁹Tapüti maniqui enemigorrü uiche aïñaniontiño cütü manio narrüchopüro, tonenti naqui choborese. Arrümanu nitaca trigo tone arrüna arttü tiñatai ñapacümuncuturrti Tuparrü. Arrümanuma trabajadorerrü ta tonema bama angelerrü esaquiti Tuparrü. ⁴⁰Arrümanu narrüchopüro amontonabo nauqui oho ui pese. Sane ito ñana pasabo, arttü tiñatai ñapacümuncuturrti Tuparrü. ⁴¹Arrüñü Ñemanauncurratoe Ñoñünrrü tiene que rracüpu ümo bama niyesa angelerrü nauqui aipenenoma auqui manu cauta ane nisüriaca arrübama bachebo macocotorrü y arrübama isamutema nomünantü. ⁴²Tiene que apenema au horno ui bama angelerrü auna cauta ane pese. Acamanu tarucu nareorrüma y botoquio nohorrüma ui nitaquisürücürüma. ⁴³Tapü arrübama isamutema arrüna yacüpucurrti Tuparrü, tiene que anentarrü uimia tacana ui surrü auna cauta ane nüriacarrti naqui Yaiütorrüma. Arraño ane namumasu, amonsapesio te.

Machepecatarrü: Arrüna monirri anecana

⁴⁴Arttö üriabucati Tuparrü oemo pasabo tacana uiti taman ñoñünrrü naqui matamünana monirri cütü. Artti caüma iñanecatati tatito auna cauta ananca. Ui arrüna sane tarucu nipucünuncurrti, süroti tato au niporrti aipiaventecanatiño nanaiña arrüba nenarrirrti, nauqui acomprarioti arrümanu cürü, cauta ane manu chama monirri.

Machepecatarrü: Perla tarucu nicuarrü

⁴⁵Nantito Jesús ümoma:

—Arttö üriabucati Tuparrü oemo, pasabo tacana uiti taman ñoñünrrü comercianterrü, bapacheroti perlaca arrüba omirriantai y tarucu niyucuarü. ⁴⁶Arttö tabüco uiti taman perlarrü arrüna champü tacanache nicuarrü, süroti tato au niporrti, aipiaventecanati nanaiña nenarrirrti, nauqui acomprarioti manu perlarrü.

Machepecatarrü: Momese

⁴⁷Nantito Jesús:

—Arrüna ito nüriacarrti Tuparrü oemo, ta tacana arrone taman momese süro eana narubaitu turü y basuru aruqui nanaiñantai nopiococa. ⁴⁸Arttö tataso manu momese ui nopiocorrü, arrübama imomeche iquiaübutama taiyiritu na aitacümanauncunioma manio nopiococa, arrüba omirria omeno peese au noconorrü. Tapü arrüba chomirriampü bobotabo uimia. ⁴⁹Sane tiene que apasa

ñana arrtü tiñatai ñapacümuncuturrti Tuparrü. Cuamatü ñana bama angelerrü nauqui aitaciümanauncunuma bama urria nisüboriquirrimia eananqui bama malorrü. ⁵⁰Arrübama malorrü tiene que apenema eana pese au manu horno. Acamanu tarucu nareorrüma y botoquio nohorrüma ui nitaquisürüicürrüma.

Arrübama manunecana nurarrti Tuparrü

⁵¹Auqui arrti Jesús ñanquitioti pünanaqui bama ñanunecasarrti nanti sane: —¿Tusio aume arrüna sucanañü?

Auqui aiñunuma, namatü:

—Iyebo soboi, Señor.

⁵²Auqui nanti Jesús ümoma:

—Aboma bama tiyebo uimia causane nüriacarrti Tuparrü.

Manunecanama caüma arrüba tücoboí autusi ümoma, y arrüba ito aübo autusi ümoma. Ichepecacama tacanati taman naqui ane niporrti. Arrti itusiancatati arrüba omirria abe umahüburu uiti y itusiancaniontiño ito arrüba pomanca abe umahüburu uiti.

Anati Jesús au Nazaret

⁵³Nauquiche tanaiña uraboiti Jesús arrüba machepecataca, sürotitü auqui manu. ⁵⁴Auqui iñataiti tato au Nazaret au manu cürrü Galilea auna cauta asunaunti tücañe. Acamanu manunecanati au manu porrü sinagoga auna cauta nantarrü iyoberabaramacü. Enterurrtü genterrü cütobüso. Namatü sane:

—¿Auquichepü aipiati naqui ñoñünrrü arrüna sane, tarucapae ñapanauncurrti? ¿Causanempü nauqui puerurrti aisamunenti arrüba milagrorrtü? ⁵⁵Abu arrti auqui nantai. Tonenti naqui aütorrti carpinterurrtü José. Nipiacütoti nürirri Mariarrü. Arrübama yaruquitorrti aboma ito auna: Arrti Jacobo, arrti José, arrti Simón y arrti Judas. ⁵⁶Arrüba niquiastoti bopohoso ito auna uyarrüpecu. ¿Auquichepatai uiti arrüna ñapanauncurrti y nüriacarrti?

⁵⁷Sane nauquiche ünantü ümoma nacarrti. Auqui nanti Jesús ümoma:

—Arrübama profetarrtü cuamatü auqui quiatarrrü narüciquirri bien cuasürüma aume. Tapü arrti naqui auquina abarrüpecuqui, ta chapacoconauncapü ümoti.

⁵⁸Sane nauquiche champürrtü masamunuti nurria milagrorrtü acamanu, itopiqui champürrtü icocoromati nurria.

Niconcorrti Juan Bautista

14 ¹Au manu tiemporrü tücañe, arrti Herodes yüraburrti au manu cürrü nürirri Galilea. Arrti ipiatenti nürirrti Jesús. ²Auqui nanti ümo manuma imostorrti:

—Arrti maniqui ñoñünrrü tonenti Juan Bautista. Süboricoti tato eanaqui macoiñoca. Sane nauquiche ane nüriacarrti, nauqui asamuti milagrorrtü.

³Taipü arrti maniqui yüriaburrtü Herodes, bacüpuruti tücañe nauqui aiñenomati Juan Bautista. Tomoenoti ui cadenarrü y süroti au preso

uimía auqui naca Herodías. Arrümanu paürrü Herodías tone nicüpostoti Felipe tücañe naqui yaruquitorrti Herodes, y arrti Herodes pohosoti aübu.

⁴Arrti Juan icuansomoconotiti Herodes tücañe, nanti ümoti:

—Churriampü apoca aübu Herodías itopiqui tone nicüpostoti aruqui.

⁵Sane nauquiche rranrrtipü Herodes aítabajotiti Juan. Pero birrubuti ñünana genterrü, itopiqui enterürrümantai namatü que arrti Juan profetarrti. ⁶Auqui ññatai manu nesarrti cumpleañosrü Herodes. Arrümanu nicheche manu Herodías cuatü atoco isucarü namanaiña manuma amoncoma acamanu, bama tasuruma uiti. Arrti Herodes bien urriampae ümoti arrümanu nitococo manu nicheche Herodías. ⁷Sane nauquiche itusiancatati nurria curusürrü isucarü manu cupiquirri, nanti ümo:

—Anqui rropünanaquiñü isiu naca narrianca ichücü.

⁸Arrümanu Herodías bien ññunecata manu nichechese. Tone caüma urapoi isucarüti Herodes arrüna sane:

—¡Aitorrimia ññemo nitanu Juan Bautista au taman praturrü!

⁹Ui arrümanu sane nurarrü sucheboti yüriaburrü Herodes. Pero titusiancatati curusürrü isucarü y arrtaimia manuma amoncoma acamanu. Sane nauquiche tiene que aitorrimia ümo. ¹⁰Bacüpuruti nauqui aüromatü aítüsünama nitanurrti Juan au cárcel auna cauta anancati. ¹¹Auqui cuatü uimía taman praturrü, ane ahu nitanurrti Juan. Itorrimiatama ümo manu cupiquirri. Atoco tone aitorrimia ümo nipiaparrü.

¹²Auqui ññataimia manuma ññanunecasarrti Juan aiquiama nicunturrti y süromatü aññanamati cütu. Auqui süromatito uraboimía isucarüti Jesús.

Basaparati Jesús ümo cinco mil mañoñünca

¹³Nauquiche tütusio ümoti Jesús, sürotitü iche auquimanu tamanti au taman barco auna cauta champü macrirrtianuca. Numo tipiatema manuma macrirrtianuca auqui manio puebluca, süromatü isiuti abeuqui manu turrü, acü süromatü. ¹⁴Ññatai Jesús taha au manu quiatarrü nabeurrü, tobüsoti auqui barco acü. Asaratitü ümo süürümana genterrü. Auqui pucürusuti itacuma. Sane nauquiche bacurarati ümo manuma maunrocono cuamatü uimía. ¹⁵Nauquiche aübapae ütobi, arrübama ññanunecasarrti süromatü esati, namatü ümoti:

—Chauqui tütümümücapae, auna champü poca. Asamu nariorrü ümo bama macrirrtianuca, naqui aüroma tato au ba rranchuca, nauqui acomporama utuburiboma. ¹⁶Auqui nanti Jesús:

—Champü nümoche aüroma tato. Arraño tiene que apapache utuburiboma.

¹⁷Auqui namatü ümoti:

—Ane auna soboi cincoatai pan y torratai nopiocomanca.

¹⁸Nanti ümoma:

—¡Apiquiataunasio ññemo!

¹⁹Auqui bacüpuruti ümo genterrü nauqui atümoma onü borrrü. Auqui iquianiontiño mecuti manio cinco pan yочеpe manio torrü nopiococa.

Asaratitü ape, machampiencanati ümoti Tuparrü. Auqui bochepesüro uiti manio pan. Itorrimaniontiño ümo bama ñanunecasarrti y uimia rrepartibo ümo genterrü. ²⁰Enterurrü manu genterrü baso y abeco nurria. Auqui arrübama ñanunecasarrti Jesús matakümanauncunuma arrüba niyupearrtuca, arrüba bosobürau uimia. Ubataso uimia doce noconoca. ²¹Arrümanu nubiqui manuma basoma, taqui cinco mil mañoñüncatai. Champürrtü mupacümuncunu paüca ni arrübamapü masiomanca.

Amencoti Jesús isu turrrü

²²Auqui bacüpuruti Jesús ümo bama ñanunecasarrti, ariorrüma acüsüma taha nauqui aüromatü topü manu narubaitu turrrü au taman barco. Tapü arrti caüma masamunuti baeta nariorrrü ümo macrirrtianuca. ²³Auqui sürotitü onü yiriturrrü tamanti nauqui eanti. Tomite ümoti acamanu tamanti. ²⁴Tapü arrümanu barco tütane cümünta manu narubaitu turrrü. Maquiütica fuerte cümenu, pocoro turrrü, supiuu cütüpü barco. ²⁵Cuatü nanenese, arrti Jesús iñataiti isiu manu barco, amencoti isuqui turrrü. ²⁶Arrümanuma ñanunecasarrti asaramatü cümenuti cuati isuqui turrrü. Auqui tosibicoma ui nirrucurrüma, namatü sane:

—iAnite yausüpürrü!

²⁷Au manu rratorrrü arrti Jesús manitanati ümoma, nanti:

—iTapü aupirruca, ta arrüñü, tapü ane penarrü aboi!

²⁸Auqui arrti Pedro manitanati, nanti ümoti:

—Señor, arrtü ñemanauntu ta arrücü, aitasusuñü tanu aesacü, tari ñamena isuqui turrrü.

²⁹Nanti Jesús:

—iAriacu te tauna yesañü!

Auqui arrti Pedro tobüsoti auqui barco y amenti isuqui turrrü, niyücürtti cümenuti Jesús. ³⁰Nauquiche onquisiote nicüsü manu maquiütürrü, birrubuti. Auqui numo tüniyücürüpü ubacati cütü, tosibicoti sane:

—iAyurasañü Señor, tapü yubacaca cütü!

³¹Au manu rratorrrü arrti Jesús iñentati neherrti Pedro y nanti ümoti:

—iChampürrtü aicococañü nurria! ¿Causane choncapütü iñemo?

³²Nauquiche süromampo au manu barco, arrümanu maquiütürrü tochencho. ³³Arrümanuma amoncoma au manu barco, bachesoiyoma esati Jesús, namatü ümoti:

—iNemanauncurratöe arrücü Aütorrti Tuparrü!

Urriancama tato uiti Jesús bama maunrocono au Genesaret

³⁴Sane tompücana uimia manu narubaitu turrrü. Auqui aiñanaimia au manu cürrü nürirri Genesaret. ³⁵Tisuputaramati acamanu. Urapoimia au nanaiñantai manu cürrü ta iñataiti. Auqui macanama bama

maunrocono esati. ³⁶Ñanquitioma pünanaquiti Jesús nauqui aiñemantai nabeu naibirrti. Arrtü tiñentama, urriancama tato.

Arrüna uiche ane nuipünate

15 ¹Auqui süromatü esati Jesús manuma fariseorrü y manuma maestro ümo nüriacarrü. Arrüma cuamatü auqui manu pueblurrü nürirri Jerusalén, nauqui anquirioma pünanaquiti, namatü sane:

²—¿Causane arrübama anunecasa chicocotapüma arrüna ñanunecacarrüma bama antiburrü tücañe? Arrüma champürrtü entunumioma primero nauqui aama.

³Auqui ñanquitioti pünanaquimia nanti sane:

—Arraño ito, ¿causane chapicocotapü arrüna yacüpuccurrti Tuparrü, itopiqui arrüna napacüpuccuatai? ⁴Arrti Tuparrü nanti: “Tari ane nanauncu ümoti aüma y ümo ito napacüma. Arrti naqui manitana churriampü ümoti yaütoti o ümo nipiäcütoti, tari comati”. ⁵Tapü arraño amucanaño, que puerurrü amucanaño ümoti aubaü y ümo naupacü arrüna sane: “No, arrüñü chüpuerurrüpü rrayura aume, itopiqui enterurrü arrüba niñenarri chauqui titorrimiaquio ümoti Tuparrü”. ⁶Arrtü ananti naqui nanti sane, chauqui champü nümochequi ayurati ümoti yaütoti y ümo nipiäcütoti. Ui arrüna sane aboi apiñocota yacüpuccurrti Tuparrü yucuata arrüba napacüpuccuatoe. ⁷iMañapanca año! Ñemanauncurraotae nurarrti profetarrü Isaías tücañe nauquiche maconomonoti sane aucütüpü:

⁸Arrübama macrirrtianuca ui narurrümantai iñanaunumañü —nanti Tuparrü—, pero au nitisirrimia ta champürrtü icocoromañü.

⁹Umonatai arrtü cuamatü aiñanaunumañü y achesoimia yesañü, itopiqui arrümanu ñanunecacarrüma, ta yacüpuccu bama mañonñuncatai.

¹⁰Auqui tasuruma macrirrtianuca uiti Jesús y nanti ümoma:

—iAmonsapesio y tari entienderrü año ümo arrüna nisura! ¹¹Champüti naqui ane nomünantü uiti au narrtarrrti Tuparrü auqui naca arrüna iñatenti, ta ui arrüna churriampü ñanitatenti.

¹²Auqui arrümanuma ñanunecasarrrti Jesús süromatü esati y namatü ümoti:

—¿Tusio aemo que arrübama fariseorrü ünantü ümoma arrüna ucanü?

¹³Aiñumuti Jesús nurarrüma ui machepecatarrü, nanti sane:

—Cualquierarrü arrüna plantarrü chüsürocütüpü uiti Iyaü naqui anati au napese, tiene que aquiyaü aübu nanaiña niranacarrü. ¹⁴Asioma sane bama fariseorrü. Arrüma tacana bama supuso, pero ta ipiasurumati naqui quiatarrrü supuso. Arrtü anati taman supuso naqui ipiasurutiti quiatarrrü supuso, arrümanuma torrü tiene que apaquimia au taman cütubirri. (Machepecatarrü arrüna sane.)

¹⁵Auqui arrti Pedro nanti ümoti Jesús:

—Urasoi suisucarü isane nümoche arrüna machepecatarrü apü nusura.

¹⁶Aiñumuti Jesús, nanti sane:

—¿Arraño ito chütusiopü aume arrüna sane? ¹⁷Unca amarrrtaimo que arrüna umate sürotü ocübobí au nuñaunso. Auqui pasao pürücü, barutaübu tatito tanene. ¹⁸Pero auqui nuyasasü cuantio arrüba chomirriampü numapensaca.

¹⁹Mapensaca batabai, urrianca ümo quiatarrrü paürrü, baviviquia tacana numuquianca, bacusüpica, mapanca y macuentuca icütüpüti quiatarrrü.

²⁰Enterurrrü arrüba numapensaca sane pururrrü nomünantü. Tapü arrüna arrtü chuicocotapü oñentunumi primero arrtü oecatü uba, ta champü nomünantü uirri.

Taman paürrü extranjerurrrü icocoroti Jesús

²¹Auqui sürotitü Jesús auquimanu. Sürotitü au manu cürrü saimia manio puebluca nürirri Tiro y Sidón. ²²Taman paürrü cananearrrü ananca pohoso acamanu. Cuatü esati Jesús nitosibirri, nantü ümoti sane:

—iSeñor, naü nüriaburrrü David, apucüru ichacuñü! Nicheche ane choborese ahu. Tarucapae nitaquisürücürrü uirri.

²³Artri Jesús champürrtü iñumutati manu nurarrü. Auqui arrübama ñanunecasarri namatü ümoti:

—iAicüpu tato manu paürrü, tübatatai suiñemo nitosibirri!

²⁴Auqui artri Jesús nantü ümo:

—Artri Tuparrü icüpurutiñü esa bamantai israelitarrrü, nauqui rrayura ümoma. Arrüma aboma tacana arrobe nobirraca omensoro. Tapü arrücü chütüpü israelitarrrücü.

²⁵Arrümanu paürrü bachesoiyo esati Jesús y nantü ümoti:

—iSeñor, ayurasañü!

²⁶Auqui iñumutati Jesús ui machepecatarrrü, nantü ümo:

—Champürrtü urria arrtü uiquiaübuta niyarata bama masiomanca, nauqui uitorrimia ñome tamococa. (Ta arrübama isralitarrrü tonema bama tacana aübosirrti Tuparrü.)

²⁷Arrümanu paürrü iñumuta, nantü sane:

—Ñemanauntu Señor, arrüba tamocomanca bubaso ito arrüba niyupaquituca icuqui mensarrü.

²⁸Auqui nantü Jesús ümo:

—iPaürrü, aicococañü nurria! Isamunena isiu arrüna narrianca. Au manu rratorrrü urriante tato manu nichechese.

Sürümanama maunrocono urriancama tato

²⁹Auqui artri Jesús sürotitü auquimanu. Pasaoti abeuqui manu narubaitu turrü ane au Galilea. Auqui sürotitü onü taman yiriturrrü, atümoti. ³⁰Cütüpürrü macrirrtianuca iñataimia acamanu esati. Cuamatü uimia arrübama rrenco, arrübama supuso, arrübama chüpuerurrüpü anitama. Cuamatü ito uimia sürümanama bama maquiataca maunrocono. Iñanama esati Jesús y artri bacurarati ümoma. Urriancama tato uiti. ³¹Arrümanuma macrirrtianuca cütobüsoma ui arrüna arrtaimia: Arrübama chüpuerurrüpü anitama, manitanama tato. Arrübama rrenco urrian tato namensüma. Arrübama supuso, asarama tato uiti. Sane nauquiche iñanaunumati Tuparrü, naqui Tuparrü ümo bama israelitarrrü.

Basaparati Jesús ümo cuatro mil mañoñünca

³²Auqui arrti Jesús batasuruti ümo bama ñanunecasarrti y nanti ümoma:
—Taqisürümantai iñemo bama macrirrtianuca, itopiqui chauqui tütabe trerrü naneneca nacarrüma auna ichepeñü y champü isane utuburiboma. Chirrancapü icüpuruma tato au niporrüma aübu nicürüpürrüma. Rrepente chücüsüurupüma isiu cutubiurrü ui nicürüpürrüma.

³³Auqui namatü ümoti bama ñanunecasarrti:

—¿Causanempü nauqui atabü osoi tuburibo na cütüpürrü genterrü?
Champü poca auna saimia.

³⁴Ñanquitioti Jesús pünanaquimia:

—¿Mantucubo pan abe aboi?

Arrüma namatü:

—Abe siete pan y mümanantai nopiocomanca.

³⁵Auqui bacüpuruti Jesús ümo macrirrtianuca nauqui atümoma acü. ³⁶Auqui iquianiontiño mecuti manio siete pan y arrümanio nopiocomanca. Machampienanati ümoti Tuparrü, bochepesüro uiti, itorrimianiontiño ümo manuma ñanunecasarrti, nauqui rrepartibo uimia ümo namanaiña macrirrtianuca. ³⁷Enterurrü macrirrtianuca basoma, bien abecoma. Ubataso tato siete noconoca ui bama ñanunecasarrti, pururrü nisobüraturrüma. ³⁸Nubiqui manuma basoma cuatro mil mañoñüncatai, chümupacünuncunupü paüca ni masiomancapü. ³⁹Auqui arrti Jesús masamunuti nariorrü ümo macrirrtianuca. Süroti au taman barco ichepe bama ñanunecasarrti y süromatü au manu cürrü nürirri Magdala.

Arrübama fariseorrü y saduceorrü manquioma señarrü

16 ¹Arrümanuma fariseorrü ichepe manuma saduceorrü yebomatü esati Jesús nauqui aiñama macocotorrü ümoti. Ñanquitioma pünanaquiti nauqui aitusiancati taman señarrü isucarüma nauqui atusi ümoma ta uiti Tuparrü atorri üriacaboti. ²Aiñumuti Jesús nurarrüma:

—Arrtü amarrtai cüturiqui napese isiu nimümürrü, amucanaño: “Canapae urria napese tubaca”. ³Arrtü tansürü amarrtai napese cüsaüboca, amucanaño: “Rrobeoca caüma”. ¡Mañapanca! Arraño bien tusio aume arrüna ümoche cütüriqui napese, ta tone señarrü arrtü rrobeoca o arrtü urria napese. ¿Causane chütusiopü aume ümoche nanaiña arrüba milagrorrü omirriante sobi? ⁴Arraño macrirrtianuca caüma apanquiquia nauqui itusianca señarrü ausucarü. Abu tarucu naumaloco. Apiñococati Tuparrü. Chüpuerurrüpü itusianca señarrü ausucarü. Cunauntaiñatai arrüna sane surapoi ausucarü: Apaquionsaño iyoti profetarrü Jonás y arrüna pasabo ümoti. Tone caüma señarrü aume.

Sane nurarrti Jesús isucarüma. Auqui süroti tato auquimanu.

Ñanunecacarrüma bama fariseorrü

⁵Süromatü topü manu narubaitu turrü. Arrüabama ñanunecasarrti Jesús tacürusu ñaquioncorrüma acama pan itapiquiboma. ⁶Auqui nanti Jesús ümoma: —¡Amasasai nurria ñünana nesarrüma levadura bama fariseorrü ichepe bama saduceorrü!

⁷Arrüma namatü ümomantoe:

—Canapae nanti sane, itopiqui na chumacacapü one pan.

⁸Artri Jesús tütusiatai ümoti arrümanu nurarrüma, nanti ümoma:

—¿Causane ane penarrü aboi itopiqui champü pan aboi? Arraño chapicococapüñü nurria. ⁹¿Champürrtü entienderrü año pario ümo arrüna sane? ¿Causane chapaquioncañopü arrone yasapacama bama cinco mil mañoñünca oboi cincoatai pan? Tantorrü noconoca ubataso tato aboi üi pururrü nisobüraturrüma. ¹⁰Chapaquioncañopito arrone yasapacama cuatro mil macirrtianuca oboi sieteatai pan. Mantucubatai noconoca ubataso tato oboi nisobüraturrüma? ¹¹¿Chütusiopü aume ümoche arrüna nirranitaca? Champürrtü rranitaca iyo levadura ümo pan.

¹²Sane nauquiche caüma entienderrüma bama ñanunecasarrti arrüna nurarrti ümoma. Abu ta champürrtü manitanati ümo levadura ümo pan. Ta urapoiti isucarüma, tapü icocotama ñanunecacarrüma bama fariseorrü y bama saduceorrü.

Urapoiti Pedro que arrti Jesús tonenti Cristo

¹³Isiu namenrrüma ññataimia saimia manu pueblurrü nürirri Cesarea de Filipo. Acamanu arrti Jesús ñanquitioti pünanaqui bama ñanunecasarrti, nanti ümoma:

—¿Uramapü sane ññemo macirrtianuca arrüñü Ñëmanauncurratoe Ñoñünrrü?

¹⁴Auqui aiñumuma bama ñanunecasarrti, namatü sane:

—Aboma bama namatü que arrücü Juan Bautista. Maquiataca namatü que arrücü Elías. Maquiataca namatü ito que arrücü Jeremías o arrti quiatarrü profetarrü auqui tücañe, naqui süborico tato.

¹⁵Auqui nanti Jesús ümoma:

—Y carü arraño, ¿aburaño sane ññemo?

¹⁶Auqui aiñumuti Simón Pedro, nanti:

—Arrücü Cristocü naqui Aütorrü Tuparrü, naqui süborico.

¹⁷Auqui nanti Jesús ümoti:

—Arrücü Simón Pedro, aütorrü Jonás. Urriampae naca itopiqui champüti ñoñünrrü naqui uiche atusi aemo arrüna sane, ta uiti Tuparrü naqui Iyaü naqui anati au napese. ¹⁸Arrüna nüri Pedro, nantü auqui besüro “Canrrü”. Arrüabama icocoromañü ñana tacana arrone porrü urriante onü canrrü, arrüna chüpuerurrüpü apoco. Ni arrünampü concorrü puerurrü acana ümoma. ¹⁹Tiene que itorrimianio aemo niyabe arrüna cauta ane nüriacarrü Tuparrü. Arrüna urria aemo icu na cürrü, urria ito au napese. Arrüna churriampü aemo icu na cürrü, churriampito au napese.

²⁰Auqui arrti Jesús nanti ümo bama ñanunecasarrti:

—Tapü aburapoi isucarüti quiatarrü arrüna tusio aume, ta arrüñü Cristoñü.

Urapoiticaü Jesús niconcorrti

²¹Sane nauquiche arrti Jesús comensaboti uraboiti nurria isucarü bama ñanunecasarrti, arrüna pasabobo ümoti. Nanti:

—Tiene que yerotü au Jerusalén. Taha tiene que ichaquisürü ui bama mamayoreca, mayüriabuca ichepe bama üriatu bama sacerdoterrü y ui bama manunecana nüriacarrü. Itabairomañü, pero pürücü ba trerrü naneneca tiene que isübori tato.

²²Auqui arrti Pedro iquianatiti Jesús peese, aicuansomoconotiti:

—Tapü apensaca sane, Señor, tapü pasao aemo arrüna sane.

²³Auqui arrti Jesús azebütü tato nurria ui manu nurarrti Pedro ümoti, nanti ümoti:

—Aquicho auquina yasaquiñü, arrücü choborese. Arrücü aiñata macocotorrü iñemo. Napensaca champürrtü tacana ñapensacarrti Tuparrü, ta tacana ñapensaca macirrtianuca.

²⁴Auqui nanti Jesús ümo bama ñanunecasarrti:

—Arrtü anati naqui rranrrü ayetitü isiuñü, tari taquisürübatü isiuquiñü, tari tacürusu ñaquiuncorrti iyotiatöe, tacanarrtü chüvaleopü nisüboriquirrti ümoti. ²⁵Artri naqui rranrrü ataesübu ñünana concorrtü auna icu na cürü, pero ta chüpuerurrüpü aye uiti au napese ümo para siemprrü. Artri naqui coiñoti auqui niyaca, süboricoti au napese ümo para siemprrü. ²⁶Champü niyaserebiquirrti ümoti ñöñünrrü acananenti nanaiña arrüba abe icu na cürü, arrtü au nitacürurrü peneco nausüpürri, itopiqui tarucu nicua nuyausüpü. Champü aye uirri tacana nicuarrü. ²⁷Arrüñü Ñemanauncurratöe Ñöñünrrü. Iseca tato ñana auqui napese aübu nanaiña nanentacarrü esauquiti Tuparrü naqui Iyaü. Isecatü ichepe bama angelerrü bama baserebio iñemo. Auqui caüma rrapacaca ümo namanaiña macirrtianuca itobo arrüba isamutema icu na cürü. ²⁸Ñemanauncurratöe sucanañü aume: Aboma auna uyarrüpecu bama chüpuerurrüpü acoma cheperrrü arrtaimia nisequi tato aübu nanaiña nisüriaca.

Campiabo nacarrti Jesús

17 ¹Bupasao manio seirri naneneca. Auqui sürotitü Jesús onü manu yiriturrü bien apetaisürü. Süromatü uiti arrti Pedro, arrti Jacobo y arrti Juan yaruquitorrti Jacobo. ²Nauquiche taboma onü manu yiriturrü, arrti Jesús campiabo nacarrti isucarüma. Nisurrti bien cuaratai tacana nicua surrü y naibirrti champü tacanache nipurusubiquirrti y bucuara ito. ³Au manu rratorrü itusiancanamacü arrti Moisés ichepeti Elías. Aboma baparioma aübuti Jesús. ⁴Auqui nanti Pedro ümoti Jesús: —Señor, bien urria nusaca auna. Arrtü arrianca supasamuna trerrü cüpahumanca: Taman aemo, quiatarrü ümoti Moisés y quiatarrü ümoti Elías.

⁵Nauquiche anancatiqui Pedro manitanati ümoti Jesús, au manu rratorrü cuatü cüsaüborrü arrone cuara nurria oñüma. Auqui rabotü manitacarrü eanaqui, nantü sane:

—Tonenti naqui Isaü naqui tarucu nicuarrti iñemo, ipucünuncatai icuatati. ¡Amonsoi nurria nurarrti!

⁶Arrübama ñanunecasarrti Jesús, numo oncoimia arrüna manitacarrü, bachesoiyoma y mataconoconomia, iñatai nisurrüma acü ui nirrucurrüma.

⁷Au manu rratorrü cuati Jesús esama aiñenti neherrüma, nanti ümoma:

—¡Apatüsay, tapü aupirruca!

⁸Nurria asarama tato nurria manuma ñanunecasarrti, champümainqui manuma torrü y champüquito manu cüsaüborrü, arrtiatái Jesús anancatiqui acamanu.

⁹Auqui süroma tato onüqui manu yiriturrü, niyücürrüma cümama. Nanti Jesús ümoma:

—¡Tapü aburapoi isucarü maquiataca arrüna amarrtai, cheperrtü isüboriquia tato eanaqui macoiñoca!

¹⁰Auqui ñanquitioma pünanaquiti, namatü:

—¿Causane arrübama manunecana ümo nüriacarrü namatü que tiene que ayeti acusürüti Elías apünanaquicü?

¹¹Aiñumuti Jesús, nanti:

—Bien ñemanauntu te arrti Elías cuati acusürüti nauqui aicoñocoti tato arrüba churriampü nisüboriquirrimia bama macrirrtianuca icu na cürrü.

¹²Sucanañü aume, ta arrti Elías chauqui tanancati auna icu na cürrü. Pero arrübama macrirrtianuca champürrtü isuputaramati. Isamutema aübuti isiu arrüna nirrancarrüma. Sane ito isamutema ñana saübuñü, arrüñü Ñemanauncurraetoe Ñoñünrrü tiene que ichaquisürü ui bama macrirrtianuca.

¹³Tütusiatai ümoma que arrti Jesús manitananti apüti Juan Bautista.

Urriancati tato uiti Jesús taman ñaüma naqui consa

¹⁴Nauquiche iñataimia tato auna cauta aboma macrirrtianuca, tamanti ñoñünrrü cuati esati Jesús. Bachesoiyoti esati y nanti ümoti:

¹⁵—¡Señor, apucüru itacuti isaü! Chaübopü ñaunrrococorrti. Tarucapae nitaquisürücürrti uirri. Ane nauche tasurerecoti y taübücoti oto pese y eana turrü. ¹⁶Chauqui tiquiacati taha esa bama anunecasa, pero arrüma chüpuerurrüpü acurama ümoti.

¹⁷Auqui arrti Jesús nanti ümoma:

—Arraño caümainqui chapicocapüñü y tarucu nomünantü aboi. Abu tücoboí niyaca abarrüpecu. ¿Hasta anche ñana tiene que ñasamunca abaübu? ¡Apiquiataunarrti maniqui ñaüma!

Auqui cuati maniqui ñaüma uimia esati Jesús. ¹⁸Artri icuansomoconotiti maniqui choborese anati auti, icüpurutiti tanene auquiti. Artri maniqui choborese sürotitü auquiti maniqui ñaüma. Sane nauquiche urriancati tato au manu rratorrü.

¹⁹Auqui arrübama ñanunecasartri süromatü peese aübuti Jesús anquirioma pünanaquiti arrüna sane, namatü:

—¿Causanempü chüpuerurrüü somü sopicüpüruti maniqui choborese auquiti maniqui ñaüma?

²⁰Nanti Jesús ümoma:

—Itopiqui champürrtü apicococañü nurria. Ñemanauncurratoe sucanañü aume: Arttü apicococañü pario, entonces puerurrü amucanañü ümo na yiriturrü: “Acosi auquina au quiatarrü narüciquirri”. Auqui arrüna yiriturrü sürotü auquina. Champü cuestarabo aume arttü apicococañü nurria. ²¹Pero artri naqui choborese sane chüpuerurrüü uicüpüruti tanene auqui macrirrtianuca arttü choñeancapü, y arttü chayunabopü oñü, chubacapü ui numaquionco iyoti Tuparrü.

Urapoiticaü tatito Jesús niconcorrti

²²Nauquiche anancatiqui Jesús ichepe bama ñanunecasartri au manu cürrü Galilea, nanti ümoma:

—Arrüñü Ñemanauncurratoe Ñoñünrrü, tiene que aitorrimianamañü mecu bama mayüriabuca. ²³Itabairomañü. Pero ta yopürücü manio trerrü naneneca isüboriquia tato.

Ui arrüna sane nurartri Jesús tarucu nisuchequirrimia.

Bapacatarrü ümo niporrti Tuparrü (impuestorrü)

²⁴İñataimia au manu pueblurrü nürirri Capernaum. Aboma ito acamanu bama bacobürara impuestorrü ümo niporrti Tuparrü. Cuamatü esati Pedro, anquirioma pünanaquiti, namatü:

—¿Carüti maniqui aubesa maestro, aensapü bapacarati impuestorrü ümo niporrti Tuparrü?

²⁵Aiñumuti Pedro:

—Bapacarati.

Auqui aürotitüpo Pedro au manu porrü cauta anancati Jesús. Artri Jesús cusürüboti anitatu ümoti Pedro, nanti:

—¿Uracü sane Simón? ¿Pünanaquiche acobürama impuestorrü bama mayüriabuca? ¿Taqui pünanaqui bama pohoso, o pünanaqui bama extranjerurrü?

²⁶Auqui aiñumuti Pedro, nanti:

—Pünanaqui bama extranjerurrü.

Nanti Jesús:

—Entonces arrübama pohoso chübapacarapüma. ²⁷Pero tapü anati naqui tüborico oemo, mejor acosi aha. Arttü ane na nopiocorrü itononü, aiquiaübu y aiyäübu narurrü. Acamanu ahi tabüco obi taman monedarrü. Aiquiaübu ahiqui y uirri apacase noesa impuestorrü ümo niporrti Tuparrü.

Ñacuti naqui ane manrrü nüriacarrti

18 ¹Au manu tiemporrü tücañe arrümanuma ñanunecasarrti Jesús süromatü esati nauqui anquirioma pünanaquiti, namatü: —¿Ñacuti subarrüpecuqui naqui ane manrrü nüriacarrti arrtü üriabucati Tuparrü?

²Auqui arrti Jesús itasurutiti taman ñaüma isucarüma, iñanatiti cümüinta auna cauta amoncoma. ³Auqui nanti ümoma:

—Ñemanauncurratoe sucanañü aume: Arrtü chücampiabopü napapensaca tacana ñapensacarrti naqui ñaüma, chüpuerurrüpü aye aboi auna cauta ane nüriacarrti Tuparrü. ⁴Sane nauquiche arrti naqui ichimiancanatiyü tacana bama masiomanca, tonenti ane manrrü nüriacarrti auna cauta üriabucati Tuparrü. ⁵Arrti naqui yasuriurutiti taman ñaüma au nisüri, yasurirurutiñü ito.

Macocotoca

⁶Arrtü anati naqui iñata macocotorrü ümo bama icocoromañü nauqui tapü icocoromañünqui, manrrüpü urria arrtü tomoeno sürümanarrü canrrü itüti, nauqui botaboti aübu au narubaitu turrü. ⁷Poberrümantai bama icu na cürrü oboi ba macocotoca uiche aisamunema nomünantü. Poberrümtai naqui ñoñünrrü uiche añañti ba macocotoca. ⁸Sane nauquiche arrtü nehe o napope arrüna uiche aisamute nomünantü, mejor aütüsünasio y arusiompü. Manrrü urria arrtü asüboriquia esati Tuparrü aübu tamantai nehe o tamantai napope. Tapü aichücü aürotü au infierno oto pese oboi manio nehe o napope. ⁹Tapürrtü atapeneca au nomünantü ui nasüto mejor aiquiaübu y arusaübu. Itopiqui manrrü urria arrtü aücatü esati Tuparrü aübu tamantai nasüto, pünanaquirrü aecatü au infierno oto pese yupu manio torrücaü nasüto.

Machepecatarrü: Nobirrama ensoro

¹⁰Nantito Jesús:

—Tapü chücuasürüpüma aume bama masiomanca icocoromañü. Arrübama angelerrü bacuirara itacuma, nantarrai aboma esati Tuparrü au napese. ¹¹Arrüñü Ñemanauncurratoe Ñoñünrrü isecatü icu na cürrü, nauqui ñataisümunucu eanaqui nomünantü ümo bama iñoconomati Tuparrü.

¹²Amonsoi arrüna machepecatarrü: Supiarrrü anati naqui taman ñoñünrrü abe cien niyaburrti nobirracá. Taman omeanaqui ensoro. ¿Acaso chomonconopü uiti manio noventa y nueve eana rroense na ariorrti apacherioti manu taman ensoro omeana yirituca? ¹³Arrtü tabüco uiti, manrrü nipucünuncurrti pünanaqui yucuata manio amonquiatai. ¹⁴Sane ito arrti Iyaü naqui anati au napese, chirranrrtipü nauqui anati naqui sürotü au infierno eanaqui bama masiomanca icocoromañü.

Numarrimiacaca nomünantü uiti usaruqui oemo

¹⁵Nantito Jesús:

—Arrtü artti taman aruqui ane causane uiti aemo, aitasurrti peese. Apari nurria aübuti y urasoi isucarüti arrüna churriampü uiti aemo. Arrtü oncoiti arrüna nura, urrian tato naca aübuti. ¹⁶Tapürrtü chirranrrtipü oncoiti nura, apari tatito aübuti aübu bama maquiataca bama asaramatü causane uiti aemo, na atusi nurria nipünatenti. Rrepente auquiapae yasutiuti nura maniqui aruqui. ¹⁷Arrtü chirranrrtipü oncoiti, urasoi isucarü namanaiña bama icocoromati Tuparrü. Arrtü chirranrrtipü oncoiti nurarrüma, auqui caüma aiñasü peese pünanaquiti tacana pünanaqui bama chicocoromatipü Tuparrü y bama mayacobraca impuestorrü.

¹⁸Ñemanauncurraetoe sucanañü aume: Arrüna napacüpücu auna icu na cürrü, valeo ito au napese. Arrüna chichebopü aboi auna icu na cürrü, au napese isiatai chichebopito.

¹⁹Sucanañü ito aume: Arrtü aboma torrüma mañoñünca icu na cürrü chepatai ñapensacarrüma nauqui anquimia arrüna nirrantiümoma pünanaquiti Iyaü au napese, artti caüma macumananati ümoma. ²⁰Itopiqui auna cauta aboma torrü o trerrüma iyoberabaramacü au nisüri, arrüñü yaca acamanu eanama.

²¹Auqui artti Pedro sürotitü esati Jesús, ñanquirioti pünanaquiti:

—Señor, ¿mantucubu veserrü tiene que irrimiaca tato nomünantü ümoti saruqui? ¿Taqui siete veserrü?

²²Aiñumuti Jesús, nanti sane:

—Champürrtü sieteatai veserrü. Ta sucanañü aemo: Hasta setenta veserrü siete narrimiacaca tato ümoti aruqui.

Machepecatarrü: Artti naqui chipiacapü arrimiacati nomünantü ümoti quiatarrü

²³Arrünarrtü üriabucati Tuparrü pasao uiti tacana uiti taman yüriaburrü naqui rranrrü acurrtä aübu bama imostoti. ²⁴Tanati bacurrtarati. Cuati acamanu esati artti maniqui taman mosorrü, naqui tarucapae nebequirrti ümoti, sürümana millonerü. ²⁵Artti maniqui mosorrü champü uiche apacamenti manu nebequirrti. Sane nauquiche artti maniqui yüriaburrü bacüpuruti nauqui apaventeti aübu nanaiña nicüpostoti, nenarrirrti y namanaiña bama aütorrti nauqui puerurrü apacamenti manu nebequirrti. ²⁶Auqui artti maniqui mosorrü bachesoiyoti nurria esati manqui yüriaburrü, nanti ümoti sane: “Señor, apucüru ichacuñü. Tapü apuraurrüciapae acobranañü. Tiene que rrapacane nanaiña manu nirrebequi aemo”. ²⁷Sane nauquiche artti maniqui yüriaburrü pucürusuti itacuti, perdonabo uiti manu nebequirrti. Champürrtü ananto acobraratiti. Emecanantito uiti. ²⁸Pero artti maniqui mosorrü nauquiche tanati tato türiüpo, icuñunutiti maniqui quiatarrü mosorrü icumpañeruturrti, naqui ebeoti chimiantai ümoti. Iñenotiti auqui nitapeurrti, itumenotiti, tüsaipü aconti uiti. Auqui nanti ümoti: “¡Apaca iñemo arrone nebequi!” ²⁹Auqui artti maniqui icumpañeruturrti bachesoiyoti esati. Nanti ümoti: “¡Apucürü ichacuñü, tapü apuraurrüciapae acobranañü, tiene que te rrapacane nanaiña nirrebequi aemo!” ³⁰Pero artti champürrtü pucürusuti itacuti. Más bien sürotitü aiñanatiti au preso, cheperrtü bapacarati ümoti

arrümanu nebequirriti. ³¹Nauquiche arrtaimía manuma maquiataca mamosoca, orronene nurria ümoma. Aüromatü uraboimia isucarüti maniqui yüriaburrü nanaiña arrüna pasabo uiti. ³²Nauquiche tütusio ümoti, maemencoti iyoti maniqui mosorrü. Nauquiche tanati acamanu esati, nanti ümoti: “Arrüciü mosorrü malorrü. Aucutanu ataquisürütcatai iñemo. Sane nauquiche chirracobracapü arrümanu tarucu nebequi iñemo, itopiqui achesoiquia nurria yesañü. ³³Isiupüciü tiene que ataquisürüti aemo maniqui acumpañeru tacana arrüna nataquisürüciü iñemo”. ³⁴Sane nauquiche bien tüboricoti maniqui yüriaburrü ümoti. Bacüpuruti nauqui carrtigaboti nurria cheperütü bapacarati nanaiña arrümanu tarucapae nebequirriti.

³⁵Auqui nantito Jesús:

—Sane ito isamutenti Iyaü au napese abaübu, arrtü chirrimiacanapü aboi nomünantü ümoti quiatarrü aübu nanaiña nabausasü.

Manunecanati Jesús tapü uiñocota nocüposü

19 ¹Nauquiche tüchauqui nurarrti Jesús arrüna sane, sürotito auqui Galilea, niyücürüti au manu cürü nürirri Judea, topü manu sapoco nürirri Jordán. ²Cütüpürrü macirrtianuca süromatü isiuti. Taha urriancama tato uiti sürümanama bama maunrocono.

³Acamanu aboma bama fariseorrü. Uturuquimia süromatü esati Jesús nauqui aiñama metorrü ümoti. Ñanquitioma pünanaquiti, namatü:

—¿Aensapü puerurrü sopiñoconio suisüposütaiqui, arrtü ane pario na itopiquiche?

⁴Aiñumuti Jesús, nanti ümoma:

—Tusiatai aume ane corobo sane: “Auqui maübo arrti Tuparrü isamunutiti taman ñoñünrrü ichepe taman paürrü”. ⁵Auqui nanti Tuparrü: “Sane nauquiche arrti yaürrü iñoconotiti yaütoti y nipiäcütoti nauqui aürotitü ichepe nicüpostoti. Sane nauquiche caüma tacanarrtü tamantai nacarrüma”. ⁶Champürrtü torrümainqui, tamantai au narttarüti Tuparrü. Sane nauquiche churriampü aiñoconomacü arrübama tüposo.

⁷Auqui arrümanuma fariseorrü ñanquitioma tatito pünanaquiti Jesús: —¿Causanempü acüputi Moisés tücañe nauqui atorri ñome paüca taman nicororrü arrüna uiche atusi ta champürrtü abiqui isiuti naqui nopiquianio?

⁸Aiñumuti Jesús, nanti:

—Torrio te uiti Moisés nauqui apiñoconio naucüposütaiqui itopiqui tarucu nomünantü aboi. Pero arrüna nirrancarüti Tuparrü auqui maübo ta champürrtü sane. ⁹Sucanañü aume que arrti naqui iñococotati nicüpostoti, arrüna champü causane nisüborirquirri aübuti quiatarrü, y posoti aübu quiatarrü paürrü, chauqui tisamutenti nomünantü. Arrti naqui poso aübu taman paürrü arrüna oncono uiti iquiana, chauqui ito tisamutenti nomünantü.

¹⁰Auqui arrübama ñanunecasarüti Jesús namatü ümoti:

—Arrtü sane, manrrü urria chopocapü.

¹¹Auqui nanti Jesús ümoma:

—Chüpuerurrüpi namanaiña atusi ümoma arrüna ñapanauncurrti Tuparrü. Cunauntaña bama torrio ümoma na atusi ümoma. ¹²Sürümanatai arrüna itopiquiche chüposotipü ñoñünrrü: Aboma bama chüposopüma itopiqui auquiapae mamesoma. Aboma chüposopüma itopiqui tübioma. Aboma ito bama chüposopüma itopiqui rranrrüma aserebimia ümoti Tuparrü. Arrti naqui puerurrü asuriuti arrüna sane, tari yasuriurati.

Macususüancanati Jesús ümo masiomanca

¹³Acamanu ito macanama masiomanca esati Jesús, nauqui aiñanti neherrti onüma, y nauqui eanti itacuma. Tapü arrübama ñanunecasarrti icuansomoconomana manuma uiche ayematü manuma masiomanca.

¹⁴Arrti Jesús nanti ümo manuma ñanunecasarrti:

—Asioma sane, tari yebamatü tauna yesañü manuma masiomanca, tapü abasiquia icuatama. Auna cauta üriabucati Tuparrü cuasürüma bama tacana naca bama masiomanca.

¹⁵Auqui iñatati neherrti ita manuma masiomanca, ñacususüancacarrti ümoma. Auqui caüma sürotitito auqui manu.

Manitanati taman yaürrü rricurrü aübuti Jesús

¹⁶Taman nanenese, arrti maniqui taman yaürrü sürotitü esati Jesús nauqui anquiriotti pünanaquiti, nanti sane:

—Buen Maestro, irranca rranquirio apünanaquicü: ¿Isane arrüna urria isamune nauqui aye sobi nisüboriqui esati Bae Tuparrü?

¹⁷Aiñumuti Jesús, nanti sane ümoti:

—¿Causane ucanü iñemo buenurrüñü? Tamantiatai Tuparrü naqui anati au napese naqui buenurrü. Arrtü arrianca aye obi au napese esati Tuparrü, aicocosio arrüba yacüpucurrti Tuparrü.

¹⁸Auqui nanti maniqui yaürrü ümoti:

—¿Ñacusabe arrüba yacüpucurrti Tuparrü?

Aiñumuti Jesús:

—Tapü atabaiquia, tapü arrianca ümo quiatarrü paürrü, tapü acusüpüca, tapü apanca apüti quiatarrü. ¹⁹Anaun ümoti aüma y ümo napacüma. Tari cuasürüti aemo asüborisapa tacana nacua aemoantoe.

²⁰Aiñumuti maniqui yaürrü, nanti:

—Enterurrü arrüba bacüpucuca icocoquio auqui maübo nisunaun. ¿Isane manrrü arrüna faltabo iñemo?

²¹Nanti Jesús ümoti:

Arrtü arrianca bien urriampae nasüboriqui, acosi tato au napo y aipiaventecasio enterurrü arrüba abe obi. Aitorrimia nicuarrü ümo bama pobrerrü y ariacu isiuñü. Auqui caüma ane nacua au napese uiti Tuparrü.

²²Arrti maniqui yaürrü oncoiti arrümanu nurarrti Jesús sane, süroti tato aübu tarucu nisuchequirrti, itopiqui arrti bien rricurrti.



(Mt. 19.13)

²³ Auqui nanti Jesús ümo bama ñanunecasarrti:

—Ñemanauncurratoe sucanañü aume: Cuestarrü ümoti taman rricurrü nauqui aye uiti auna cauta üriabucati Tuparrü. ²⁴ Manrrü chücestarrüpi ümo taman camello apasa auqui nirrto cümese. (Arrümanu numuquianrrü camello isiu nisunaun cabayurrü.) Artti rricurrü cuestarrü aye uiti auna cauta ane nüriacarrti Bae Tuparrü.

²⁵ Nauquiche oncoimia arrüna sane bama ñanunecasarrti Jesús, tarucu nicütobürrüma, namatü ümomantoe:

—¿Quitimo naqui puerurrü aye uiti esati Tuparrü?

²⁶Tapü arrti Jesús asaratitü ümoma, nanti:

—Arrübama mañoñünca icuqui nantai cürri chüpuerurrüpi aisamunema arrüna sane uirrimiantoe, pero arrti Bae Tuparrü puerurrti aisamunenti nanaiñantai.

²⁷Auqui nanti Pedro ümoti Jesús:

—Señor, arrüsomü sopiñocota nanaiña arrüna ane soboi, nauqui sobetü asiucü. ¿Isane arrüna iyebo ñana soboi auqui na subaca asiucü?

²⁸Aiñumuti Jesús:

—Ñemanauncurratoe sucanañü aume: Au manu tiemporrü ñana coñocono tato nanaiña arrüba omirriante uiti Tuparrü. Auqui caüma arrüñü Ñemanauncurratoe Ñoñünrrü ichümoca au niyesa tronorrü taha auna cauta üriabucati Iyäu. Tapü arraño bama nirranunecasa tiene que autümo ito ichepeñü esati Tuparrü au manio doce tronorrü, nauqui apacurrti ñome manio doce familiarrü auqui Israel. ²⁹Arrübama iñocotama niporrüma, yaruquitorrüma, niquiasitorrüma, yaüitorrüma, nipiactorrüma, aüitorrüma, nicüpostorrüma niyorrrüma auqui niyaca, tiene que asuriuma cien veserrü manrrü. Tiene que ito aye uimia esati Tuparrü au napese auna cauta champü nitacüru nisüboriquirrimia. ³⁰Sürümanama bama arucapae ümoma caüma, pero ñana tonema bama champü yaserebiquirrimia. Sürümanama ito bama champütiatai asaratü ümoma caüma, pero ñana tonema bama cusürübo aüromatü esati Tuparrü.

Machepecatarrü: Bama trabajadorerrü

20 ¹Nanti Jesús ümoma: —Arrtü üriabucati Tuparrü oemo, pasao tacana uiti taman patrón. Ane niyorrti bien arubaesa, ane uva cütu uiti. Taman nanenese tansürapae sürotitü apacheti bama trabajadorerrü ümoti nauqui atama nüta uva. ²Nauquiche tütübücoma uiti, nanti ümoma: Rrapacaca aume taman denario au sapeso. Auqui bacüpuruti ümoma au niyorrti nauqui atrabacama. Süromatü. ³Taqui a las nueve tansürü sürotitü au plaza, besüro narrtarrti ümo bama mañoñünca aboma acamanu champü yachücoimia. ⁴Nanti ümoma: “Amecosi apatrabaca au niyo, apata nüta uva. Rrapacaca bien aume”. Auqui arrümanuma mañoñünca süromatito atrabacama ümoti. ⁵Tiñatai toce. Süroti tatito au plaza. Isamutenti tatito isiatai. Isiu nimümürri taqui a las tres, isiatai tatito uiti. ⁶Tütümümüca a las cinco, süroti tatito au plaza. Tabücoma uiti manuma mañoñünca aboma acamanu tünonsoma, champü yachücoimia. Nanti ümoma: “¿Causane chapatrabacacapi arrüna nanenese?” ⁷Auqui namatü ümoti: “Itopiqui champüti naqui iquianati somü supatrabaca”. Auqui nanti ümoma: “Amecosi au niyo apatrabaca. Rrapacaca bien aume”. ⁸Nauquiche tütobiquia, nanti maniqui iyoche ümoti maniqui capatarrü: “Aiyoberabasama manuma trabajadorerrü y apaca ümoma. Cusürübo apaca ümo manuma aübapae aiñanaimia. Au nitacürurrü apaca ito ümo manuma amoncomantai auqui tansürü”. ⁹Auqui cuamatü manuma aüboqui aiñanaimia a las cinco isiu nimümürri. Pagabo ümoma taman denario. ¹⁰Au nitacürurrü pucünuñama

ito manuma tücoboi yatrabacacarrüma auqui tansürü, ñaquioncorrümampü pagabo ñana manrrü ümoma. Pero tamantai ito denario pagabo ümoma. ¹¹Nauquiche tiyasutüma manu pagorrü, uratoquioma ümoti maniqui iyoche. ¹²Namatü: “Arrübama aübpae aiñanaimia tamantai horarrü batrabacarama. Pero arrücü apacaca ümoma isiu nisubaiqui arrüna apacaca suiñemo. Abu arrüsomü enterurrü sapese supatrabacaca ümo nipequi surrü”. ¹³Auqui arrti maniqui iyoche nanti ümoti manqui taman: “Saruqui, champürütü rrencaña aemo. Ta tüsurapoi asucarücü que rrapacaca taman denario au sapese. ¹⁴Nani arrüna nacanasa, acosi. Taiquiana urria aemo tanu. Arrüñü irranca rrapaca ümo bama aübatai atrabacama isiu tacana arrüna nirrapacaca aemo. ¹⁵Arrüñü isamute aübu nimoni isiu arrüna nirranca. ¿Taqui ünantü aemo arrüna tarucu nibeunucu?” ¹⁶Sane te pasabo ñana: Arrübama champütiatai asaratü ümoma caüma, tonema bama cusürübo aiüromatü ñana esati Tuparrü. Tapü arrübama arucapae ümoma caüma, tonema bama champü yaserebiquirrimia ñana.

Anati urapoiti tatito Jesús niconcorrti

¹⁷Tanati Jesús isiu cutubiurrü, niyücürtri au Jerusalén. Auqui tasuruma peese uiti bama ñanunecasarrti. Nanti ümoma:

¹⁸—Tusio aume que usaca noecü au Jerusalén. Arrüñü Ñemanauncurratoo Ñoñünrrü tiene que ichorri ümo bama üriatu sacerdoterrü y ümo bama manunecana nüriacarrü. Arrüma caüma namatü tiene que ison. ¹⁹Tiene que ito aitorrimianamañü ümo bama extranjerurrü. Arrüma caüma emeonomañü, icübairomañü y icüramucunumañü apü curusürü. Pero yopürücü trerrü naneneca tiene que isübori tato eanaqui macoiñoca.

Arrüna ñanquitio nipiácütoti Jacobo y Juan

²⁰Au manu nanenese arrümanu nicüpostoti Zebedeo sürotü esati Jesús aübu bama torrü aürri: Arrti Jacobo y arrti Juan. Bachesoiyo esati. ²¹Arrti Jesús ñanquitioti pünanaqui:

—¿Isane narriantümo?

Aiñumu manu paürrü:

—Irranca nauqui aütümocoquio arrüba torrücaü nisaütaiqui apetacücü au napease arrtü üriabücü. Taman au nepanauncu nehe, quiatarrü au nepau nehe.

²²Aiñumuti Jesús:

—Chütusiopü aemo isane arrüna anquitio.

Auqui nanti ümoti Jacobo y ümoti Juan:

—¿Aensapü puerurrü avantabo año ümo nautakisürücü tacana arrücuatü taquisürücürü cuabotiqui iñemo?

Auqui iñumutama:

—Puerurrü somü.

²³Auqui nanti Jesús ümoma:

—Ñemanauntu te autaqisürüca ñana tacana arrüna nichaquisürücü. Pero arrümanu naurriantümo nauqui autümo au nepanauncu y nepau niñe, canapae champü nisüriaca nauqui itorrimia aume. Arrtiatai Iyaü naqui puerurrü aitorrimiati ümo bama urria au ñaqui oncorrti.

²⁴Arrümanuma diez maquiataca ñanunecasarrti Jesús oncoimia arrüna sane. Tüboricoma ümoti Juan y ümoti Jacobo. ²⁵Auqui tasuruma uiti Jesús namanaiña manuma ñanunecasarrti, nanti ümoma:

—Arraño bien tusio aume arrüna sane. Arrübama ane nüriacarrüma icu na cürrü isamutema isiu nirrancarrüma, fuerte nurria yacüpucurrüma.

²⁶Pero arraño tapü sane aboi aumeampatoe. Arrti naqui rranrrü ane manrrü nüriacarrti, tari yaserebirati ümo bama maquiataca, ²⁷tiene que aisamunutiü tacana mosorrü ümo bama maquiataca. ²⁸Sane ito arrüñü Ñemanauncurratoe Ñoñünrrü champürrtü isecatü nauqui aserebimia iñemo. Ta isecatü nauqui yaserebi ümo bama macrirrtianuca y nauqui itorrimia nisüboriqui tacana bapacatarrü itobo nomünantü uimia.

Sane nurarrti Jesús.

Torrüma bama supuso urriancama tato uiti Jesús

²⁹Pasaoma auqui manu pueblurrü Jericó, niyücürrüma au Jerusalén. Cütüpürrü macrirrtianuca süromatü isiuti Jesús. ³⁰Acamanu isiu cutubiurrü aboma torrü mañoñünca tümonsoma, supusuma. Oncoimia que pasaoti Jesús auquimanu esaquimia. Tosibicoma, namatü:

—iSeñor, arrücü eanaqui nesarrti familiarrü yüriaburrü David, apucüru suichacu!

³¹Auqui cuasoma ui manuma macrirrtianuca, na etayoimia. Pero arrüma manrrü nitosibirrimia:

—iSeñor, arrücü eanaqui nesarrti familiarrü yüriaburrü David, apucürü suichacu!

³²Auqui arrti Jesús tohencoti. Tasuruma uiti. Cuamatü esati. Nanti ümoma:

—¿Isane naurriantümo?

³³Arrüma iñumutama:

—iSeñor, suirranca sumasara tato!

³⁴Arrti Jesús pucürusuti itacuma. Iñentati nistorrüma. Au manu rratörürü asarama tato nurria.

Auqui süromatü isiuti Jesús.

Iñataiti Jesús au Jerusalén

21 ¹Tütaboma saimia Jerusalén, iñataimia au manu pueblurrü nürirri Betfagé, cutaqui quibo manu yiriturrü nürirri Olivos. Auquimanu baciüpuruti Jesús ümo bama torrüma ñanunecasarrti. ²Nanti ümoma:

—Amecosi au ba ta poca abe taha ocümenu. Acamanu ane taman bururrü paüma, tomoeno aübu naübosimia esa. Apitaquisüna y apiquiasio

tauna iñemo. ³Artrü anati naqui manitana aume, amucanaño ümoti sane: “Artri Señor rranrrti ocupabo uiti”. Auqui caüma autorri aume.

⁴Pasabo nanaiña arrüna sane, nauqui acoco arrümanu corobo tücañe uiti taman profetarrü. Nantü sane:

⁵Amucanaño ümo manuma pohoso au Sión:

Amasasatü, artri naqui yüriaburrü aume cuati aubesa tacanarrtü taquisürütiatai.

Cuati chacu taman naübosi bururrü.

⁶Auqui arrümanuma torrü ñanunecasartri, isamutema isiu arrüna yacüpucurrü Jesús ümoma. ⁷Cuatü uimia manu bururrü aübu naübosirri. Iñatama naibirrimia chacu manu naübosirri nauqui aüroti Jesús chacu.

⁸Tarucapae nubiqui macrirrtianuca. Ipiacumainquiatama nicüburrrrimia isiu cutubiurrü cümenuti Jesús. Maquiataca maneonoma nasusüca, matüsünanama nasu mutacürrü, iñatama ito isiu cutubiurrü. ⁹Arrübama cusürübo y arrübama cuamatü isiuti Jesús, tosibicoma sane, namatü:

—iGloria ümoti naqui yüriaburrü eanaqui nesartri familiarrü David tücañe! iCurusüoti uiti Tuparrü naqui cuatü au nürirrti Señor! iUiñanaunati Tuparrü au napese!

¹⁰Nauquiche iñataiti Jesús au Jerusalén, enterurrü macrirrtianuca cütöbüsoma. Aboma bama ñanquitioma:

—¿Ñacutipü naqui ñoñünrrü?

¹¹Na arrümanuma macrirrtianuca cuamatü aübuti, namatü:

—Tonenti naqui profetarrü Jesús auqui pueblurrü Nazaret, auqui manu cürrü Galilea.

Anaunu niporrti Tuparrü uiti Jesús

¹²Auqui artri Jesús sürotipo au niporrti Tuparrü. Penecoma türüpo uiti manuma amoncoma acamanu mapaventecanama y macomporarama ausüratai. Ipemünacaniontiño nimesa bama macampiara monirri aübu macrirrtianuca y arrümanio nisiya bama mapaventecana nututaquiquia. ¹³Nanti ümoma:

—Nantü au Nicororrü sane: “Arrüna nipo urriante ümo meancarrü”. Pero arraño apiñata tacanarrtü nipo bama macusüpüca.

¹⁴Au manu niporrti Tuparrü cuamatü esati Jesús bama supusu y arrübama chüpuerrüüpü amema. Urriancama tato uiti. ¹⁵Arrümanuma üriatu sacerdoterrü ichepe manuma manunecana nüriacarrü arrtaimia arrümanio milagrorrü omirriante uiti Jesús. Oncoimia ito nitosibi masiomanca au niporrti Tuparrü, bama namatü sane: “iGloria ümoti aütorrti yüriaburrü David!” Sane nauquiche tüboricoma uirri. ¹⁶Namatü ümoti Jesús:

—Onsoi arrürabotü ñanitacarrüma.

Aiñumuti Jesús:

—Ñoncoi. ¿Champümo tülehebo año arrüna nantü icu Nicororrü? Nantü sane:



(Mt. 21.11)

Obi te Tuparrü iñanaunumacü bama masiomanca, hasta arrübama aübo aboma icu cürrü.

¹⁷Auqui onconoma macrirrtianuca uiti Jesús. Sürotitü au Betania. Acamanu barücüboti.

Higuera chütaupü paurremana uiti Jesús

¹⁸Tansürapae basücübücoti tato Jesús au Jerusalén. Isiu cutubiurrü cürüpüoti. ¹⁹Auqui asaratitü ümo taman suese higuera ane abeu cutubiurrü. Sürotitü esa, nirrancartipü atamünati nütarrü. Pero champüatai. Pururrtai nasurrü. Sane nauquiche nanti ümo:

—¡Tari chanantopü ütaca tato!

²⁰ Au manu rratorrü süübu manu suese. Arrübama ñanunecasarri nauquiche arrtaimia arrüna sane, cütobüsoma. Ñanquitioma pünanaquiti, namatü:

—¿Causanemo contoapae tüsüübo manu suese higuera?

²¹ Aiñumuti Jesús:

—Ñemanauncurratoe sucanañü aume: Arrtü bien amoncatü Tuparrü, arraño ito puerurrü apisamune arrüna sane, hasta manrrü. Puerurrü ito amucanaño ümo taman yiriturrü: “¡Aiquiaübusü auquina, acosi au narubaitu turrü!” Arrümanu yiriturrü sürotü. ²² Enterurrü apanquiquia au napeanca y arrtü bien amoncatü ümoti Tuparrü, torrio aume.

Nüriacarri Jesús

²³ Auqui iñataimia au Jerusalén. Sürotipo Jesús au niporrti Tuparrü. Acamanupo manunecanati ümo macirrtianuca. Auqui cuamatü esati bama üriatu sacerdoterrü y arrübama mamayoreca israelitarü, ñanquitioma pünanaquiti:

—¿Qüiti uiche aitorrimia aemo üriacabocü nauqui aisamune arrüna sane?

²⁴ Aiñumuti Jesús:

—Surapoi ausucarü, arrtü apiñumuta arrüna irranca rranquirio amopünanaqui. ²⁵ ¿Qüiti uiche aicüpurutiti Juan nauqui aunimiati? ¿Taqui uiti Bae Tuparrü o ui bamantai mañoñunca?

Auqui caüma ñanquitioma pünanaquimiantoe, namatü:

—Arrtü usucana oñü que uiti Bae Tuparrü, entonces arrti Jesús caüma nanti oemo: “Bueno, ¿causane chapicococatipü?” ²⁶ Arrtü usucana oñü que ui bamantai mañoñunca, tüboricoma macirrtianuca oemo. Itopiqui tüsaipü enterurrümantai icocotama que arrti Juan profetarri tücañe.

²⁷ Sane nauquiche namatü ümoti Jesús:

—Champürrtü tusio suiñemo.

Auqui nanti Jesús ümoma:

—Arrüñü ito chüpuerurrüpü suraboi ausucarü qüiti uiche atorri iñemo isüriacabo, nauqui puerurrü isamune arrüna sane.

Machepecatarrü: Tamanti ñoñünrrü aübu torrüma aütorrti

²⁸ Nantito Jesús ümoma:

—¿Aburaño ümo arrüna sane? Anati taman ñoñünrrü, aboma torrüma aütorrti. Nanti ümoti maniqui taman: “Isaü, acosi caüma atrabaca au niyo, ata uva”. ²⁹ Arrti maniqui aütorrti nanti: “No, chirrancapü”. Pero auqui campiabo ñapensacarri, sürotitü atrabacati. ³⁰ Arrti maniqui yaütoti sürotitito esati maniqui quiatarri aütorrti, icüpurutitito ariorrti atanti uva au niyorrti. Arrti maniqui aütorrti aiñumuti: “Urria taita, yecatü rratrabaca”. Pero champürrtü sürotitü.

³¹ ¿Ñacuti uturuqui manuma torrü icocota arrüna yacüpuurrti maniqui yaütorrüma?

Aiñumuma:

—Arrti maniqui yeboti atrabacati.

Auqui nanti Jesús ñumoma:

—Ñemanauncurratoe sucanañü aume: Arrübama mayacobraca impuestorrü y arrüba paüca opichübañantai ümo mañonünca tiene que aye uimía primero amopünanaqui auna cauta ane nüriacarri Tuparrü. ³²Itopiqui arrti Juan Bautista cuati tücañe anuncacati causane nauqui urria nausüboriqui aübuti Tuparrü. Pero arraña chapicocotapü nurarri. Arrübama mayacobraca impuestorrü y arrüba paüca opichübañantai ümo mañonünca icocotama ñanunecacarri Juan. Arraño amarrtai arrüna sane, pero ta chapinorroncocañopü y chapicocotapü.

Machepecatarrü: Arrübama trabajadorerrü churriampü nisüboriquirrimia

³³Amonsoi nurria arrüna quiatarri machepecatarrü: Anati taman ñonünrü naqui mana cütu uva au niyorrti. Masamunuti siercu itacu. Urrinate ito taman babetarri canrü uiti, arrüna cauta ataichome uva iyo niyürrü. Masamunutito arrüna cauta puerurrü ariorrti ape acuirati itacu niyorrti. 'Auqui torrio uiti manu niyorrti ümo bama trabajadorerrü nauqui atocoma acuirama itacu. Artti cübüsoti au quiatarri narücüquirri. ³⁴Nauquiche tiñatai nitiempo nupucu uva, bacüpuruti ümo bama imostoti ariorrüma anquirioma uva arrüna tocabo ümoti pünanaqui manuma trabajadorerrü. ³⁵Nauquiche tiñataimia manuma mamosoca taha, enoma ui bama trabajadorerrü. Tamanti ocüsioma ümoti, artti quiatarri taborioti y artti quiatarri obürü ümoti oboi canca. ³⁶Artti maniqui iyoche bacüpuruti tatito ümo sürümanama mamosoca. Pero arrümanuma trabajadorerrü isiatai tatito uimía tacana arrüna yachücoimia ümo manuma primero.

³⁷Au nitacürürrü icüpurutiti naqui propiorrü aütorrti, itopiqui mapensarati sane: "Tiene que ane ñanauncurrüma manuma trabajadorerrü ümoti naqui isaü". ³⁸Nauquiche tiñatai taha, arrümanuma trabajadorerrü asaramatü cümenuti, namatü ümomantoe: "Tonenti aütorrti naqui iyoche. Tonenti ñana naqui ümoche atorri nanaiña. Uitabairoti nauqui noesa caüma na ñanaunrü". ³⁹Sane nauquiche iñenomati, iquianamati auqui manu ñanaunrü, y itabairomati.

⁴⁰Auqui artti Jesús ñanquitioti pünanaqui bama sacerdoterrü y pünanaqui bama mamayoreca:

—Arrtü cuati tato caüma maniqui iyoche, ¿causanempü uiti ümo manuma trabajadorerrü?

⁴¹Auqui aiñumuma:

—Ui nitüborirrti ümoma, taborioma uiti. Itorrimiatati manu ñanaunrü ümo maquiataca trabajadorerrü arrübama urria yachücoimia. Arrüma caüma itorrimiatama arrüna tocabo ümoti, arrtü tütane cosecharri.

⁴²Auqui nanti Jesús ümoma:

—¿Champürrtü lehebo año arrüna nantü icu Nicororrü? Nantü sane:

Arrübama masamunu porrü oboi canca, yarutaübutama manu
taman canrrü ñaquioncorrüma churriampü, abu manrrü urria.
Tone baserebio tacana taman nompaciörrü principal ümo porrü.
Arrüna isamutenti Señor usucarü ucütöbüca uirri.

⁴³Sane nauquiche sucanañü aume —nanti Jesús—, tiene que acaübu
amopünanaqui arrüna nüriacarrti Tuparrü, nauqui atorri ümo bama ipiaca
añama nisüboriquirrimia tacana arrüna urria ümoti Tuparrü. ⁴⁴Tapü
arrümanu canrrü, arrtü anati naqui taübüco onü, coiñoti. Y arrti naqui
paquio manu canrrü onüti, cütocati nurria iquiana. (Arrti Jesús tacana
manu canrrü. Arrübama üriatu israelitarrü tacana bama masamunu porrü.)

⁴⁵Nauquiche oncoimia manuma üriatu bama sacerdoterrü ichepe
manuma fariseorrü arrümanio machepecatata uiti Jesús, tütusiatai
ümoma arrümanu nurarrti ta ümoma. ⁴⁶Sane nauquiche rranrrümampü
añenomatí. Pero birrubuma ñünana macrirrtianuca, itopiqui arrüma
icocotama que arrti Jesús profetarri, y manitanati au nürirrti Tuparrü.

Machepecatarrü: Taman tübübürrü

22 ¹Auqui arrti Jesús manitanati tatito yupu machepecatata, nanti
ümoma:

²—Arrüna arrtü üriabucati Tuparrü oemo, pasao uiti tacana uiti maniqui
yüriaburrü naqui masamunuti tübübürrü ümo nipocorrü aütorrti. ³Bacüpuruti
ümo bama imostoti ariorrüma atasuma ümo bama tütasuruma. Pero arrüma
bama champürrtü rranrrüma aüromatü ümo manu tübübürrü. ⁴Auqui
bacüpuruti tatito ümo maquiataca imostoti, nanti ümoma: “Amucanaño ümo
bama tasuru que tüchauqui pemacarrü. Chauqui tanaiña apobiqui sümucuca,
tari yebomatü ümo tübübürrü”. ⁵Pero arrümanuma tasuru champü nümoche
uimia. Anati naqui sürotitü au niyorrti y maquiataca süromatü ümo nesarrüma
negociorrü. ⁶Maquiataca iñenoma manuma imostoti maniqui yüriaburrü.
Ocüsüma ümoma y taborioma uimia. ⁷Sane nauquiche arrti maniqui
yüriaburrü tüboricoti nurria. Bacüpuruti ümo sürümanama masortaboca
nauqui, ariorrüma aítabajoma manuma mayatabayoca y nauqui añonocoma
ito manu nesarrüma pueblurrü. ⁸Auqui nanti ümo manuma imostoti:
“Chauqui tütane nanaiña ümo tübübürrü, pero arrümanuma tasuru tarucu
nimialocorrüma. Sane nauquiche champürrtü cuamatü. ⁹Amecosi caüma
auga nerrüquinaca tanu yusiu ba cayaca, apatasu ümo bama cualquierarrai
bama apicuñucama, nauqui ayematü ümo tübübürrü”. ¹⁰Auqui arrümanuma
mamosoca süromatü yusiu cayaca. Oberabarama uimia enterurrüma bama
icuñunuma. Aboma bama malorrü y aboma ito bama buenurrü. Sane
nauquiche ataso niporrti maniqui yüriaburrü ui arrümanuma tasuru.

¹¹Auqui arrti maniqui yüriaburrü sürotipo asaboriti ümoma. Besüro narrrarri
ümoti maniqui taman ñöñunrrü anan cati acamanu eanama. Champürrtü
aibioti tacanarrtü ümo tübübürrü. ¹²Nanti ümoti: “¿Causane ayetüpo aübu

arrüna nahibi sane? ¿Causane chacampiacapü nauqui ayetü ümo na tübübürrü?” Arrti maniqui ñoñünrrü chümanitanatipü ui nictisorrti. ¹³Auqui arrti maniqui yüriaburrü nanti ümo manuma mamosoca baserebioma icu mensarrti:

“¡Apipüniñoencasarrti y apitomoensio ito neherrti! ¡Apipenesorrti türüpo ümo tomiquianene! Taha au infierno, aboma bama areoroma y botoquio nohorrüma”.

¹⁴Sürümanama bama tasuru, pero mümanamantai bama tacümanauncunu uiti Tuparrü.

Causanempü arrtü bapacaca impuestorrü

¹⁵Arrümanuma fariseorrü caüma süromatü türüpo, apachema causane niquiubuma nauqui anitati Jesús uimia arrüna uiche puerurrü urabomati. ¹⁶Sane nauquiche bacüpuruma ümo bama ñanunecasarrüma ichepe manuma auqui nesarrti partidorrü Herodes nauqui aüromatü esati. Arrüma namatü ümoti Jesús:

—Maestro, tusio suiñemo que ñemanauntu arrüna nura isucarü macirrtianuca y aiñunecacama ito causane nauqui urria nisüboriquirrimia ümoti Tuparrü, y champü nümoche obi ñapensaca macirrtianuca. ¹⁷Urasoi suisucarü arrüna sane: ¿Taqui urria bapaca impuestorrü ümoti yarusürürrü yüriaburrü Cesar o champü?

¹⁸Pero arrti Jesús tütusiatai ümoti arrümanu churriampü ñapensacarrüma, auqui nanti ümoma:

—Arraño mañapanca. ¿Causane apache macocotorrü iñemo? ¹⁹Apitusianca isucarüñü taman monedarrü arrüna uiche apapaca impuestorrü.

Itusiancatama isucarüti taman monedarrü.

²⁰Nauquiche tarrtai Jesús manu monedarrü, ñanquitioti pünanaquimia, nanti:

—¿Nausüpütuche arrüna ane icu na monedarrü y quiti üriche arrüna ane corobo icu?

²¹Aiñumuma manuma fariseorrü, namatü:

—Nürirrti yarusürürrü yüriaburrü Cesar y nausüpüturrti.

Auqui nanti Jesús ümoma:

—Apitorrimia te ümoti Cesar arrüna tocabo ümoti y apitorrimia ito ümoti Tuparrü arrüna tocabo ümoti.

²²Nauquiche oncoimia arrüna sane nurarrti Jesús ümoma, cütobüsoma uiti. Auqui süroma tato. Onconoti Jesús uimia.

Osüboriquia tato eanaqui macoiñoca

²³Au manu nanenese iñataimia esati bama saduceorrü nauqui aparimia aübuti. Arrüma chicocotapüma nisüboriquirrimia tato bama coiño. Sane nauquiche caüma ñanquitioma pünanaquiti Jesús, namatü:

²⁴—Maestro, arrti Moisés bacüpuruti sane: Arrtü anati taman ñoñünrrü nauqui coiñatai pünanaqui nicüpostoti, chaübosiopü uiti, tari ñatoconati quiatarrü yaruquitorrti apoti aübu, nauqui ane naübosirri uiti au nürirrti maniqui coiño. ²⁵Bueno, auna subarrüpecu aboma tücañe sietema mañoñünca yaruquitorrümantoe. Arrti maniqui yarusürürrü posoti, pero

coiñotiatái pünanaqui nicüpostoti. Champürrtü aübosio uiti. ²⁶Arrti maniqui segundo posoti aübu manu biurarrü, isiatai, coiñotiatái ito pünanaqui, chaübosiopü uiti. Isiatai pasabo ümoti maniqui tercero y sane niyüciürrü hasta arrti maniqui séptimo. ²⁷Au nitacürrü coiño ito manu paürrü. ²⁸Carü ñana arrtü süboricomapü tato eanaqui macoiñoca, qüiti uturiqui manuma siete, naqui propiorratöe iquiana manu paürrü? Itopiqui chépe posoma aübu.

²⁹Aiñumuti Jesús, nanti ümoma:

—Arraño champürrtü apiplaca apapensa, itopiqui champürrtü apisuputacai Nicorrrü ni arrünampü nicusüürrti Tuparrü. ³⁰Arrtü süboricoma tato bama macoiñoca, champüqui nümoche apoma. Arrüna nacarrüma caüma chauqui tacana naca bama angelerrü esati Tuparrü au napese. ³¹Arraño chapicocotapü arrüna nisüboriquirrimia tato bama coiño, ¿canapae champürrtü lehebo año arrüna nurarrti Tuparrü icu Nicorrrü? Nanti sane: ³²“Arrüñü Tuparrüñü ümoti Abraham, ümoti Isaac y ümoti Jacob”. Arrti Bae Tuparrü champürrtü Itupa bama macoiñoca, ta Itupa bama süborico. (Itopiqui arrti rranrrti nauqui uiñanaunuti. Abu arrübama coiño chüpuerurrüpümainqui aiñanaunumati. Uirri tusio que arrübama trerrü antiburrü süboricoma tato esati Tuparrü.)

³³Nauquiche oncoimia arrüna sane, arrümanuma macrirrtianuca cütöbüsoma ui arrüna ñanunecacarri.

Arrüna yarusürürrü yacüpuürrti Tuparrü

³⁴Arrübama fariseorrrü iyoberabaramacü nauquiche tipiatema que uiti Jesús etayoimia arrübama saduceorrrü. ³⁵Tamanti uturuqui bama fariseorrrü, naqui manunecana nüriacarrrü, rranrrtipü aiñanti macocotorrrü ümoti Jesús. Ñanquitioti pünanaquiti:

³⁶—Maestro, ¿ñacuna manrrü yarusürürrü bacüpuürrü omeanaqui nanaiña arrüba bacüpuüca au nüriacarrrü?

³⁷Auqui nanti Jesús ümoti:

—Tari cuasürüti aemo Señor naqui Tuparrü aübu nanaiña nausasü, aübu nanaiña nausüpü y aübu nanaiña napensaca. ³⁸Tone arrüna manrrü yarusürürrü bacüpuürrü. ³⁹Aninqui quiatarrü bacüpuürrü isiatai yarusürürrü tacana arrümanu primero: “Tari cuasürüti aemo asüborisapa tacana arrüna nacua aemoantoe”. ⁴⁰Ubau arrüba torrrü bacüpuüca abe nanaiña arrüba piquiataca bacüpuüca uiti Moisés y arrüba manunecatata ui bama profetarrü tücañe.

¿Naübosicheti Cristo?

⁴¹Nauquiche amoncomainqui oberabarama manuma fariseorrrü, ⁴²arrti Jesús ñanquitioti pünanaquimia:

—¿Isane nacarrti Cristo aume, naqui tiene que ayetü? ¿Quitipü aütocheti au napaquionco?

Namatü:

—Arri cuati eanaqui nesarrti familiarrü yüriaburrü David tücañe.

⁴³ Aiñumuti Jesús:

—Arrti yüriaburrü David tücañe nanti “Señor” ümoti Cristo, numo manitanati uiti Espíritu Santo. Ane arrümanu corobo sane uiti David:

⁴⁴ Arrti Bae Tuparrü nanti ümoti Señor:

“Atümo auna rrupetacüñü au nepanauncu niñe, cheperrtü bachesoiyoma sobi aesacü arrübama tüboricomantai aemo”.

⁴⁵ Arrtü nampü ñoñünrrtiatai Cristo eanaqui nesarrti familiarrü David, quiubupü nanti David “Señor” ümoti.

⁴⁶ Arrümanuma fariseorrü champürrtü iñumutama arrümanu nurarrti Jesús. Auquito birrubuma. Champürrtü ananto ayematü anquirioma arrüna ausüratai pünanaquiti.

**Manitanati Jesús icütüpü bama fariseorrü
y ümo bama manunecana nüriacarrü**

23 ¹ Auqui nanti Jesús ümo macirrtianuca y ümo bama ñanunecasarrti:

²—Arrübama manunecana nüriacarrü y arrübama fariseorrü ñaqui oncorrüma ipiacama nurria anunecama nüriacarrü tacanati Moisés tücañe. ³ Sane nauquiche apicocoatai arrüna yacüpucurrüma y apisamute arrüna urapoimia ausucari, pero tapü apisamute tacana arrüna isamutema, itopiqui arrüma chisamutempüma isiu arrüna ñanunecacarrüma. ⁴ Bacheboma bacüpucuca ümo genterri, arrüba tacana cargarrü ümoma, champüti naqui avantabo iquiana. Tapü arrüma ni arriampüma aipoconocoma pario. ⁵ Nanaiña arrüna urriante uimia, es ui nirrancarrüma nauqui asaramatü macirrtianuca ümoma. Urriantai ümoma aiñanioma icutama y apü nipiarrüma arrümanio bupacubaesa cintaca ane corobo yucu arrüna nurarrti Tuparrü. Urriantai ümoma aiñama nabesaqui naibirrimia manrrü abaesa. ⁶ Arrtü ane yacarrü o ubau arrüba sinagoga urriantai ümoma atümoma ubau arrüba tümoca abe bien ümo nisurratoe. ⁷ Urriantai ümoma arrtü manquioma nurria macirrtianuca ümoma yusiu cayaca aibu rrespetorrü. Rranrrüma ito nauqui namatü ümoma “maestro”.

⁸ Pero arraño, tapü apisamute sane, tapü aurrianca nauqui namatü aume maestro, itopiqui ichepatai nabaca, tacanarrtü aubaruquiapatoe año. Tamantiatai naqui maestro aume: Arrti Cristo. ⁹ Tapü amucanaño ito “iyaü” ümoti cualquierarrü icu na cürrü, itopiqui tamantiatai Aubaü naqui anati au napese. ¹⁰ Tapü apisamucaño tacana yüriaburrü año, itopiqui tamantiatai naqui yüriaburrü: Arrti Cristo. ¹¹ Sane nauquiche arrti naqui baserebio tacana mosorrü ümo maquiataca, tonenti naqui manrrü cuasürüti, ane ito manrrü nüriacarrrti abarrüpecu. ¹² Itopiqui arrti naqui rranrrtiatai champüti manrrü pürücüti, tonenti naqui champü isane nacarrrti ñana. Arrti naqui ichimiancanatüyü tonenti, naqui yarusürürrü ñana uiti Tuparrü.

¹³ ¡Autaquisürücatai arraño bama manunecana nüriacarrü y bama fariseorrü, mañapanca! ¿Causane apiñama nituru napese pünanaqui bama

rranrrüma aüromampo? Arraño chamencapütüpo, ni chebopito aboi ariorrümampo bama ranrrü aüromampo auna cauta ane nüriacarrü Tuparrü.

¹⁴iAutaquisürücatai arraño bama manunecana nüriacarrü y arrübama fariseorrü, mañapanca! ¿Causane apiquiaübu niyopo arrüba biuraca? Tapü tusio arrüna naupicarucu, apeanca yabaiturrü. Tiene que ayetü yarusürürü carrticurrü aume.

¹⁵iAutaquisürücatai arraño bama manunecana nüriacarrü y arrübama fariseorrü, mañapanca! Amecatü au nanaiña cürrü topü ba narubaitu tuca, nauqui asuriuma bama macirrrianuca arrüna naubesa religión. Arrüma caüma torrü vecerrü manrrü churrimapatai nisüboriquirrimia amopünanaqui, manrrü niyücürüma au infierno tacana arraño.

¹⁶iAutaquisürücatai arraño itopiqui aurriancatai apipiasuruti quiatarrü, abu abaca tacana supurrü año! Aurriancatai apanuneca ümo maquiataca, pero ta chütusiopü aume. Arraño amucanaño arrtü anati naqui masamunu promesarri y itusiancatati nurria curusürü au nüri niporrti Tuparrü, chüvaleopü arrümanu sane. Tapürttö itusiancatati curusürü au nüri oro auqui niporrti Tuparrü, tone valeo. ¹⁷iMasonoca! Arraño abaca tacanarrtü supurrü año. Manrrü te Tuparrü cuasürü niporrti Tuparrü pünanaqui manu oro. Arrümanu oro ane samamecana solamenterrü itopiqui ane au niporrti Tuparrü. ¹⁸Arraño amucanaño ito: “Arrtü anati naqui masamunuti promesarri y itusiancatati nurria curusürü au nüri altar, auqui caüma chüvaleopü. Tapürttö itusiancatati curusürü au nüri manu macumanatarrü icu altar, auqui caüma valeo nurarrü. ¹⁹Tarucu nausonsoco, pariquipapae, chamasacapütü nurria, abaca tacana supurrü año. Manrrü te valeo altar pünanaqui numacumanata. Arrüna macumanatarrü ane samamecana solamenterrü itopiqui ane icu altar. ²⁰Ñemanauncurratoe: Arrti naqui itusiancatati curusürü au nüri altar, itusiancatati au nüri arrüna ito ane icu. ²¹Arrti naqui itusiancatati curusürü au nüri niporrti Tuparrü, itusiancatati au nürirtito Tuparrü naqui pohoso acamanu. ²²Arrti naqui itusiancatati curusürü au nüri napese, itusiancatati au nürirtito Tuparrü, itopiqui tone arrüna cauta anati.

²³iAutaquisürücatai arraño bama manunecana nüriacarrü y arraño bama fariseorrü, mañapanca! Arraño apitorrimiata ümoti Tuparrü taman ubuturuqui diez nasu menta, aníz y comino. Pero champü nümochehio aboi arrüba manunecatata manrrü yarusürürü icu nüriacarrü. Tai ñemanauntu urria arrümanu napachücoi sane. Pero si tapü apitompücaquio arrüba manrrü yarusürürü, arrüna uipia bacurrtta nurria, uipia upucüru itacuti quiatarrü y nauqui puerurrü oncomatü oemo, tonehion arrüba manunecatata manrrü yarusürürü. ²⁴Arraño aurriancatai apipiasuruti quiatarrü abu abaca tacana ausupuca. Apicocoquio arrüba bacüpucuca mochiomancatai. Pero chapicocoquiompü arrüba yarusürüca bacüpucuca. Arrüna napachücoi sane es tacanarrtü apiquiaübuta taman nocüpüma eanaqui narrirri arrtü auchaca, tapürttö ane taman camello eana ta apiipiuncutatai.

²⁵¡Autaquisürücatai arraña bama manunecana nüriacarrü y arraña bama fariseorrü, mañapanca! Apiyarrübita basorrü y praturrü icütüpüquiatai. Pero auna ubahu ta ubataso ui arrüna napacusüpusu y arrüna napacaübusu pünanaquiti quiatarrü ui tarucu naurrianca iyo nenarrirri. ²⁶Arraña bama fariseorrü bien supurrü año. Primero tiene que apicoñoco arrüba chomirriampü napapensaca au nabausasü, auqui caüma urria ito enterurrü nausüboriqui.

²⁷¡Autaquisürücatai arraña bama manunecana nüriacarrü y arraña bama fariseorrü, mañapanca! Itopiqui arraña tacana arrone cajón ümo macoiñoca, icütüpüatai ta bien purusubi y coñorrtai. Pero tapo pururrü yapaquia y nicümüca. ²⁸Sane nabaca arraña. Urria nabura ümo macirrtianuca. Tapü au nabausasü ta ataso ui mapancarrü y nanaiña arrüba chomirriampü.

²⁹¡Autaquisürücatai arraña bama manunecana nüriacarrü y bama fariseorrü, mañapanca! Arraña apisamute niquiajon bama profetarrü bama coiño tücañe y apicoñoco ito arrüba nicürrüma bama buenurrüma tücañe. ³⁰Amucanaño ito: “Arrtü amoncosomüpü ichepe bama antiburrü tücañe, quiubupü ataborimia soboi bama profetarrü”. ³¹Ui arrüna aburapoí sane, chauqui tütusio que arraña te eanaqui nesarrüma familiarrü bama uiche ataborimia bama profetarrü tücañe. ³²Arraña caüma isiatai napachücoi churriampü tacana bama antiburrü.

³³‘Arraña niñupariente noirroboca. ¿Causanempü naqui puerurrü aberrücapa ñünana carrticurrü au infierno? ³⁴¡Amonsoi! Tiene que icüpuruma aume bama profetarrü ichepe bama ane ñapanauncurrüma y arrübama maestro. Pero arraña caüma apitabaiquiama, apiñacama apü curusürrü, maquiataca poborioma aboi ubau sinagoga y apitaquisünacama ubau puebluca. ³⁵Sane nauquiche caüma süro carrticurrü aume itobo nanaiña arrüna niconcorrüma bama mañoñünca buenorrü, arrübama taborioma tücañe, auqui numo taborioti Abel naqui buenurrü, hasta arrti Zacarías naqui aütorrti Berequías, naqui itabairomati bama aupariente tücañe au nusuara niporrti Tuparrü esa altar. ³⁶Arrübama macirrtianuca caüma tiene que carrticaboma ichepe manuma tarucu nomünantü uimia tücañe.

Arrti Jesús urapoiti niñarriqui Jerusalén

³⁷Nantito Jesús ümoma:

—¡Autaquisürücatai bama pohoso au Jerusalén! Arraña apitabaiquiama bama profetarrü y aparucama oboi canca. Irriancapü iyoberabaraño, tacana arrone curubasürrü iyoberabario naübosirri iquiana nipiarrü. ¡Pero arraña chaurriancapü! ³⁸Amasatü te nurria, arrüba naupo tiene que acüche ñoquiana y omiñarri. ³⁹Itopiqui sucanañü nurria aume, chüpuerurrüüpü nauqui amasarañü tato, cheperrtü iñatai manu nanenese anche amucanaño: “Curüsüti uiti Tuparrü naqui cuatü au nürirrti”.

Urapoiticaü Jesús niñarriqui Niporrti Tuparrü

24 ¹Auqui sürotitü Jesús türüpo auqui niporrti Tuparrü. Numo tüniyüürtti türüpo, arrübama ñanunecasarrti cuamatü esati, uraboimia arrüna pucürusumantai icuata arrüna nicoñoco manu niporrti Tuparrü. ²Pero arrti Jesús nanti:

—¿Amarrtai nanaiña arrüna sane? Ñemanauncurratoe sucanañü aume: Arrüna porrü iñarrio ñana, chüpuerrüüpü na querabo ni tamanpü canrrü onü quiatarrü, nanaiña tiene que aiñarri.

Señarrü nauqui atusi arrtü túsaimia niyequirrti tato Jesús icu na cürrü

³Auqui süromatü onü manu yiriturrü nürirri Olivos. Nauquiche tanancati tümönsoti Jesús acamanu, arrübama ñanunecasarrti ñanquitioma pünanaquiti masamuñantai:

—Suirranca nauqui uraboi suisucarü, anche ñana cocono arrüna sane. ¿Isanempü arrüna señarrü nauqui atusi arrüna nayequi tato y arrüna arrtü tiñatai mapacümuncuturrü uiti Tuparrü?

⁴Nanti Jesús ümoma:

—¡Amasasai nurria, tapü anati naqui encañao aume! ⁵Itopiqui chiyaupüma bama cuabotü au nisüri aübu arrüna nurarrüma sane: “Arrüñü Cristo” y ui arrüna sane nurarrüma süürümanama bama icocotama ñapanturrüma. ⁶Amoncoi nüri guerra, itopiqui tiene que sane te, pero ta chütoneinquipü ñapacümuncuturrü Tuparrü. ⁷Taman nación tiene que ahi aübu quiatarrü. Tamanti yüriaburrü tiene que ahiti aübuti quiatarrü. Tiene que ane carerrtiya, norrocorrü y tiene que apaichocono cürrü au nanaiñantai. ⁸Enterurrü arrüna sane, arrtü aübo ane taquisürücürrü. ⁹Auqui tiene que autorriquia mecu macrirrtianuca nauqui emeonoma año chépe nauconco uimía y namanaiñantai tüboricoma aume auqui niyaca. ¹⁰Au manu tiemporrü ñana mapaventecanama ümoti quiatarrü. Süürümanama bama ensoro pünanaquimia arrüna ñacoconauncurrüma inemo. Tüboricomantai ümomantoe. ¹¹Tiene que ayematü süürümanama mañapanca arrübama namatü que manitanama au nürirrti Tuparrü. Ui arrüna sane süürümanama bama icocotama ñapanturrüma. ¹²Tiene que ane tarucu nomünantü ui macrirrtianuca icu cürrü. Ui arrüna sane chauqui chücuasürüpümainqui ümomantoe. ¹³Pero arrti naqui chübatachebopü isiuñü cheperrtü iñatai manu nanenese, tonenti naqui chiyebopü ui manu carrticurrü uiti Tuparrü. ¹⁴Pero cusürübo tiene que atusi nurarrti Tuparrü au nanaiñantai icu na cürrü ui bama ipiacama anitanema, auqui caüma iñatai ñapacümuncuturrü Tuparrü.

¹⁵Arrti naqui lehebo arrüna Nicororrü uiti profetarrü Daniel tari yeraca au nitanurrti. Arrti maconomonoti tücañe icütüpü arrümanu ünantapae. Arrtü amarrtai arrüna sane au niporrti Tuparrü, ¹⁶arrübama aboma au cürrü Judea tiene que aesübuma omeana yirituca. ¹⁷Arrti naqui batrabacara chachu niporrti,

tapü sürotipo aiquianti nenarrirrti, mejor tari yesüburati saneantai. ¹⁸Arrti naqui anati au niyorrti tapü süroto tato au porrtü aiquianti naibirrti, mejor tari yesüburati saneantai. ¹⁹Butaquisüratai arrüba patica anatiqui ñupatümacarrü y arrüba ito aübo ane omemecu y yocütüpü. ²⁰Apanqui pünanaquiti Tuparrü tapü tocabo aume aupesübu au nitiempo rrimianene ni aupü nanenese nesa macansacarrü. ²¹Itopiqui au manio naneneca ñana ane taquisürücürü tacana arrüna champü tubarrtai auqui numo aübo urriane cürü, ni anempito ñana. ²²Arrtü nampü chichimiancatatipü Tuparrü arrümanu tiemporrü auche ane taquisürücürü, champütüpü naqui süboricoiqui. Pero como tarucu nicuarrüma bama tacümanauncunu uiti sane nauquiche ichimiancatati manu tiemporrü ñana. ²³Arrtü anati naqui nanti aume: “Amasatü, tonenti Cristo naqui” y arrtü namatito: “Amasatü tonenti naqui taha”, tapü apicocota. ²⁴Cuamatito mañapanca y namatü: “Arrüñü Cristo, arrüñü rranitaca au nürirrti Tuparrü”. Urriante ito yarusürürrü señarrü uimia y milagrorrü arrüna uiche encañama ümo macrirrtianuca. Hasta rranrürüma encañama ümo bama tacümanauncunu uiti Tuparrü, arrtü puerurrüpü. ²⁵Pero chauqui tütusio aume sobi. ²⁶Sane nauquiche tapü apicocota arrtü namatü aume: “Isuñucati Cristo taha eana rroense, o anati taha au manu taman porrtü”. ²⁷Arrtü iseca tato, es tacana ñasünarrü arrüna quara auqui tauna ümo tansürü hasta auna ümo nimümürü, chanecataipü nisequi tato. ²⁸Auna cauta ane nicunturrü acamanu opiyoberabaraño parrüpaquiquia.

Niyequirrti tato Jesús

²⁹Arrtü tübupasao manio naneneca nesa taquisürücürü, surrü y pama obotochebo. Norrtöñeca bupaquio auqui napese icu na cürü. Nanaiña arrüba abe icu napese bupaichoconono. ³⁰Auqui caüma amarrtai señarrü icu napese sobi naqui Ñemanauncurratöe Ñoñünrrü. Namanaiña macrirrtianuca icuqui na cürü areoroma y tiene que asaramañü, nisequi tato auqui napese omeanaqui cüsaüboca aübu tarucu nisüriaca y aübu tarucu nanentarrü sobi. ³¹Rracüpuca ito ümo bama niyesa angelerrü isiu nipucu taman cornetarrü, nauqui aiyoberabarama bama tacümanauncunu sobi auqui nanaiñantai icuqui na cürü. ³²Tari süro nurria au nautanu arrüna machepecatarrü apü manu suese higuera: Arrtü aübapae nasurrü tato, arrañö tusio aume ta tüsaimia nitiempo tarrü. ³³Isiu arrtü amarrtai tücomensabo taquisürücürü, auqui caüma tusio aume que tüsaimia ñapacümuncuturrti Tuparrü. ³⁴Ñemanauncurratöe sucanañü aume: Arrübama macrirrtianuca auna caüma chüpuerurrüpü acoma mientras que chüpasabopü nanaiña arrüna. ³⁵Arrüna cürü y napese tiene que amiñarri, pero nisura tiene que acoco. ³⁶Champüti manrrü atusi ümoti isane arrüna nanenese o isane horarrü auche ise tato, ni arrübama angelerrü au napese, ni arrüpüñü naqui Aütörrti Tuparrü atusi iñemo. Solamenterrü arrti Tuparrü naqui Uyaü tusio ümoti. ³⁷Arrtü iseca tato, arrüñü Ñemanauncurratöe Ñoñünrrü, pasao auna icu cürü isiu tacana tücañe numo süboricotiqui Noé. ³⁸Au manu tiemporrü tücañe

nauquiche chiñataiquipü manu turrü, arrümanuma macrirrtianuca chaboma, basoma, posoma y maponacanama ito ñome nitaquiumucuturrüma y ümo bama aütorrüma, hasta que ñatai manu nanenese nauquiche süroti Noé au arca. ³⁹Chütusiopü ümoma isane pasabobo, rrepenteatai cuatü manu turrü y coiñoma uirri. Sane ito ñana chütusiopatai isane horarrü ñatai tato icu na cürrü, arrüñü Ñemanauncurratoe Ñoñünrü. ⁴⁰Au manu tiemporrü ñana aboma torrü mañonünca au ñanaunrü, tamanti uturuquimia carüboti, tapü arrti quiatarrü onconoti. ⁴¹Abe ito paüca tonrrio patubarrio, taman carübo, quiatarrü oncono.

⁴²'Sane nauquiche amasasai nurria itacu nausüboriqui, itopiqui chütusiopü aume isane horarrü ise tato auna icu na cürrü. ⁴³Supiarrrü anati taman ñoñünrü naqui ane niporrti. Arrtü nampü tusio ümoti isane horarrü tobirri aiñanainti cusüpürrü, taipü anutipü, yacuiracarrrti, tapü macanati nenarrirrti. ⁴⁴Sane ito arraño tiene que aparrüpera aübu urria nausüboriqui tapü autabücatai. Itopiqui chütusiopü aume anche ise tato.

Arrti mosorrü buenorrü y arrti mosorrü malorrü

⁴⁵Nantito Jesús ümoma:

—Arraño abaca tacanati taman mosorrü naqui oncono uiti ipiatronetorrti, nauqui acuirati itacu nanaiña nenarrirrti au niporrti, y nauqui asaparati ümo bama maquiataca mamosoca naneneca, cheperrrü ñataiti tato. ⁴⁶Urriampae nacarrrti maniqui mosorrü arrtü tabücoti isamutenti arrüna yacüpucurrti maniqui ipiatronetorrti. ⁴⁷Ñemanauncurratoe sucanañü aume: Arrti maniqui mosorrü tiene que aüroti tacana capatarrü uiti maniqui patrón ümo nanaiña nenarrirrti. ⁴⁸Pero supiarrrü malorrti maniqui mosorrü y arrtü mapensarati que chücontopü ayeti tato maniqui ipiatronetorrti, ⁴⁹y bacheboti chacu bama maquiataca mamosoca y chaiyatai ñasamucurrti pierrta aübu bama mayarisüboca. ⁵⁰Auqui caüma arrti maniqui patrón rrepenteatai ñataiti tato y arrti maniqui mosorrü tabücotiatai, itopiqui chütusiopü ümoti isane nanenese y horarrü anche aiñananiti tato ipiatronetorrti. ⁵¹Itacu arrüna sane arrti maniqui patrón bacheboti yarusürürrü carrticurrü ümoti maniqui mosorrü. Penecoti uiti ichepe bama mañapanca, nauqui atakisürüti tacana nitaquisürücürüma. Uirri caüma areoroti, botoquio nohorrti ui tarucu nitaquisürücürüti.

Machepecatarrü: Arrümanio diez cupiquiquia

25 ¹Arrtü üriabucati Tuparrü, pasao uiti tacana oboi arrümanio diez cupiquiquia, omenotü ümo taman tübübürrü nauqui amasarati maniqui aübo apo. Apacana niyubasarurrü arrüba omomo ui nacaite. ²Arrümanio cinco ubuturuqui champü ñupanauncurrü, tapü arrümanio piquiataca cinco bien urria ñupapanauncurrü. ³Arrümanio cinco sonsorrü champürrtü pacana chama nacaite ümorrtü cüpiüro auqui niyubasarurrü. ⁴Tapü arrümanio piquiataca cinco pacana chama nacaite. ⁵Arrti maniqui nitübübüche chücontopü aiñanainti esa manu nitübübürri. Sane nauquiche arrümanio

cupiquiquia cuatü ñome ñumpanucurrü y mumpanumu. ⁶Taqui ciumuinta tobirri, rabotü tosibirri: “iTücuati naqui nitübübüche! ¡Amecosi apicuñunuti!” ⁷Auqui arrümanio cupiquiquia patürai apicoñoco niyubasarurrü. ⁸Arrümanio cinco chupacanapü chama nacaite, panquio mopünanaqui manio piquiataca cinco, itopiqui tirranrrü acüpu nacaite auqui niyubasarurrü. ⁹Auqui arrümanio cinco opiñumuta: “No chisuirrancapü, itopiqui rrepenteatai chiñaitaipito suiñemo arrüna nacaite. Mejor amecosi auna cauta ane paventeobo apacompore aume”. ¹⁰Pero nauquiche tomenotü manio cinco cupiquiquia apacompore nacaite, arri maniqui nitübübüche iñataiti. Arrümanio piquiataca cinco chauqui niyocoborirri, omenotüpo ichepeti maniqui nitübübüche. Auqui mamana tururrü. ¹¹Auqui opiñatai tato manio cinco, opiyotobaita tururrü, munantü: “¡Señor, Señor, aiyäübu suiñemo tururrü!” ¹²Auqui arri maniqui itübübüche iñumutati: “Ñemanauntu sucanañü aume: Champürrtü isputacaño”.

¹³Nantito Jesús:

—Sane ito arraño amasasai nurria, itopiqui chütusiopü aume isane nanenese o isane horarrü anche iñatai tato, arrüñü Ñemanauncurratöe Ñonünrrü.

Machepecatarrü: Nimonirrti patrón

¹⁴Nantito Jesús:

—Suraboira quiatarrü machepecatarrü ausucari: Arrtü üriabucati Tuparrü, pasao tacana uiti maniqui taman ñoñünrrü naqui rranrrü aürotü au quiatarrü nación. Tasuruma uiti bama imostoti nauqui acuirama itacu niporrti.

¹⁵Itorrimiatati cinco mil monedarrü ümoti maniqui taman, ümoti quiatarrü torrio dos mil monedarrü y ümoti quiatarrü torrio mil monedarrü. Torrio sane uiti isiu naca arrüna narucurrü ümoma. Auqui sürotitü. ¹⁶Arri maniqui taman mosorrrü naqui torrio ümoti cinco mil, batrabacarati aübu y macananati piquiataca cinco mil monedarrü auqui. ¹⁷Sane ito isamutenti maniqui torrio ümoti dos mil, macananatito piquiataca dos mil auqui. ¹⁸Tapü arri maniqui torrio ümoti mil, iñanecatati cütü.

¹⁹Tücoboi niyüürütti maniqui patrón taman nanenese iñataiti tato esama. Auqui bacurrtarati aübuma. ²⁰Primero iñataiti maniqui torrio tücañe ümoti cinco mil monedarrü, nanti ümoti: “Señor, aitorrimia tücañe iñemo cinco mil. Pero auna abe piquiataca cinco mil monedarrü nirrakanasa ubauqui”. ²¹Auqui nanti patrón ümoti: “Arrücü imoso bien urria nachücoi y bien buenorrücü. Ui na cumplibocü aübu na chimiantai monimia torrio sobi, puerurrü itorrimia manrrü chama aemo. ¡Ariacupo y apucünu ichepeñü!” ²²Auqui iñataitito maniqui mosorrrü naqui torrio ümoti dos mil y nanti ümoti ipiatronetorrti: “Señor, aitorrimia tücañe iñemo dos mil, auna ane quiatarrü dos mil, arrüna nirrakanasa”. ²³Nanti patrón ümoti: “Arrücü imoso bien urria nachücoi y buenorrücü. Ui na cumplibocü aübu arrüna chimiantai monirri torrio sobi aemo, puerurrü itorrimia manrrü chama aemo. ¡Ariacupo y apucünu ichepeñü!” ²⁴Au nitacürurrü iñataiti maniqui botorrio mil monedarrü ümoti. Nanti ümoti ipiatronetorrti: “Señor, arrüñü tusio

iñemo que arrüciü tarucu nabrutucu. Arrüciü cosechabocü auquina cauta chancapü cütu y acaca auqui na cauta champü isane oncono obi. ²⁵Sane nauquiche irruca aünanacü. Ananca anecana sobi namoni eana cürü, tapü ensoro. Pero nani itorrimiana tato aemo”. ²⁶Aiñumuti maniqui patrón: “Arrüciü mosorrü nicumaturrü y miarriquiatarrü, tusio te aemo que arrüñü cosechaboñü auqui na cauta champü isane iñata cütu y rracaca au quina cauta champü isane oncono sobi. ²⁷Sane nauquiche manrrüpiü urria arrtü aiñocotapü manu nimoni esa bama ipiacama atrabacama aübu, ümo arrtü iseca tato yasutiupü, torrio tato iñemo aübu ñacanasarrü pario”. ²⁸Auqui nanti patrón ümo manuma amoncoma acamanu: “iApiquiaübu manu mil monedarrü pünanaquiti y apitorrimia ümoti maniqui abe diez mil uiti! ²⁹Itopiqui arrti naqui ane uiti, torrioqui manrrü uübo ümoti y sane caüma ane chama ümoti. Tapü arrti naqui chüpuerurrüpiü oñoncatü ümoti, carübu pünanaquiti arrüna chimiantai ane uiti. ³⁰Arrti naqui mosorrü champü yaserebiquirrti aparusaüburrti türüpo ümo tomiquianene, auna cauta tiene que areoti y botoquo nohorrti ui nitaquisürticürti”.

Bacurrta carrü yupu nacioneca

³¹Nantito Jesús ümoma:

—Arrtü isecatato icu na cürü, isecatü tacanati yarusürürü yüriaburrü. Cuamatü isiuñü bama angelerrü y tiene que ichümo au niyesa tronorrü arrüna champü tacanache nanentacarrü. ³²Arrübama macirrrianuca auqui nanaiña nacioneca icuqui na cürü iyoberabaramacü yesañü. Süroma peese sobi, tacana uiti taman naqui bacuirara yutacu nobirracca. Omeno peese nobirracca uiti omeanaqui chibuca. ³³Iñaniontiño nobirracca au nepanauncurrti, tapü chibuca iñaniontiño au nepaurrti. ³⁴Sane ito ñana sobi ümo bama macirrrianuca. Sucanañü ñana ümo bama aboma au nepanauncu niñe: “Ausiapata tauna arraño bama aucurusüca uiti Iyaü, apasusiu abüriacabo, ta sane ñapensacarrti aume auqui maübo nauquiche urriane na cürü uiti. ³⁵Itopiqui nauquiche anancañü isürüpüca, arraño apasapacañü. Nauquiche anancañü ichosüca apichamacañü. Nauquiche anancañü ñamenca arraño, apasuquiucañü au naupo. ³⁶Nauquiche champü nisahibi, arraño apacheca isaibiboñü. Nauquiche anancañü ñaunrococa, apapaseacañü. Nauquiche anacañü au preso, apatasuacañü”. ³⁷Auqui caüma arrümanuma urria tücañe nisüboriquirrimia, namatü: “Señor, champü tüsumasacü tücañe acürüpüca y supachecapü utuburibocü. Champü ito tüsumasacü atosüca y supachecapito atüpobocü. ³⁸¿Auchepü tücañe sumasacü amenca nauqui supasuriurü au suipo, o auchepü sumasacü champü nahibi y supachecapü aibibocü? ³⁹¿Auchepito tücañe sumasacü aunrococa o anancü au preso y subacapütti sumasarü?” ⁴⁰Auqui caüma sucanañü sane ümoma: “Ñemanauncurratoe sucanañü aume: Enterurrü arrüna urria apisamute tücañe ümo arrübama isaruquitaiqui, bama champü causane uimia, ta tacanarrtü apisamute iñemo”.

⁴¹Auquito caïma sucanañü ümo bama aboma au nepau niñe: “Apaquicho auquina yesaquiñü, arraño bama tarucu nomünantü aboi. Amecosi au infierno eana pese arrüna champü nitacürürü. Chauqui tacomorabo icimenuti choborese y arrübama ito nesarrti angelerrü. ⁴²Nauquiche anancañü abarrüpecu isürüpüca, arraño champürürtü apasapacañü. Ichosüca, champürürtü apacheca ichüpoboñü. ⁴³Anancañü ñamenca, champürürtü apasuquiucañü au naupo. Anancañü ñaunrococa y anancañü ito au preso, champürürtü apapaseacañü”. ⁴⁴Auqui caïma namatü iñemo: “Señor, ¿cautapü tūmasacü acürüpüca, atosüca, amenca, o arrtü champü nahibi, aunrococa, apresoca, nauquipü supayura aemo? Champü tūsumasacü”. ⁴⁵Auqui caïma sucanañü ümoma: “Ñemanauncurratoe sucanañü aume: Enterürü arrüna champürürtü apisamute ümoti taman uturuqui bama isaruquitaiqui, ta iñemo arrüna napachücoi sane”. ⁴⁶Sane nauquiche caïma süromatü ümo carrticurrü arrüna champü nitacürürü. Tapü arrübama isamutema isü nirrancarri Tuparrü tücañe, tonema bama süromatü au napese auna cauta champü nitacüru süboriquirri.

Mapensarama aiñenomati Jesús

26 ¹Nauquiche tanaiña urapoiti Jesús arrüna sane, nanti ümo bama ñanunecasarri:

²—Arraño tusio aume que pürücü ba torrü naneneca iñatai pierrta parruca. Au na pierrta tiene que aitorrimianamañü mecu bama rromanorrü nauqui aiñanamañü apü curusürri.

³Au manu tiemporrü ito tücañe, arrübama üriatu sacerdoterrü y arrübama mamayoreca israelitarrü iyoberabaramacü au manu nusua niporrti Caifás, maniqui yarusürürü sacerdoterrü. ⁴Acamanu bapacheroma niquiubuma causane nauqui puerurrü aiñenomati Jesús aübu nencañacarrüma, nauqui aítabajomatü. ⁵Namatü:

—Tapü uisamute ümo arrüna pierrta. Itopiqui arrtü sane osoi, uirrtopünatatai nitübori bama macirrtianuca.

Taman paürrü isemanati Jesús ui perfume

⁶Arrti Jesús anancati au Betania au niporrti Simón naqui maunrocono tücañe, ui manu nürirri lepra. Basoma icu mensarrü. ⁷Auqui iñatai manu taman paürrü acamanu esati aübu taman boteyama canrrü alabastro, ataso ui perfume arrüna chiyaupü nicuarrü. Auqui iyarapata itati Jesús. ⁸Nauquiche arrtaimia arrüna sane arrübama ñanunecasarri, ünantü ümoma, namatü:

—iEnsoatai ui manu paürrü arrüna tarucu nicuarrü! ⁹Abu puerurrüüpü aye chama monirri itobo, nauqui atorri ümo bama pobrerri.

¹⁰Arrti Jesús oncoiti nurarrüma, nanti ümoma:

—iTapü abasiquia icuata! Arrüna isamute, urria. ¹¹Itopiqui arrübama pobrerri nantarü au nantai abarrüpecu nacarrüma, pero arrüñü chüpuerurrüüpü nauqui yasiquia auna abarrüpecu. ¹²Arrüna paürrü iyarapata arrüna perfume ichañü

ümo ñana arrtü iñanamañü cütu. ¹³Ñemanuncurratoe sucanañü aume: Ñana arrübama manitana nomirria isucarü macrirrtianuca icu na cürrü, tiene que uraboimia ito arrüna isamute iñemo arrüna paürrü nauqui aquionomacü iyo.

Paventeoti Jesús uiti Judas

¹⁴Auqui tamanti uturuqui manuma ñanunecasarri nürirrti Judas Iscariote, yebotitü apariti aübu bama üriatu sacerdoterrü. ¹⁵Nanti ümoma: —¿Mantucubo monirri apapacaca iñemo, arrtü itorrimiacati Jesús amemecu? Arrüma bapacarama ümoti treinta moniquia.

¹⁶Auquimanu arrti Judas bapacheroti causane niquiubuti, nauqui atorriti Jesús uiti ümoma.

Nesarri cena Señor

¹⁷Arrübama israelitarrü tücañe basoma pan champü levadura eana ñome siete naneneca ümo manu pierrta. Au manu primer nanenese arrübama ñanunecasarri Jesús süromatü esati anquirioma pünanaquiti: —¿Cauta arrianca supapema nauqui uba ümo na pierrta parrcua?

¹⁸Nanti Jesús ümoma:

—Amecosi au pueblurrü, au niporrti maniqui taman ñoñünrrü y amucanaño ümoti: “Artri Maestro nanti: Tüsaimia nisonco. Au na napo irranca irra arrüna cena pascual aübu bama nirranunecasa”.

¹⁹Arrümanuma ñanunecasarri isamutema isiu arrüna yacüpucurrti. Süromatü apemama.

²⁰Nauquiche tütobiquia arrti Jesús tümonsoti esa mensarrü aübu bama ñanunecasarri. ²¹Nauquiche amoncoma basoma, nanti Jesús ümoma:

—Ñemanauncurratoe sucanañü aume: Tamanti abuturuqui tiene que aitorrimianatiñü mecu bama tüboricomantai iñemo.

²²Auqui caüma tarucu nisuchequirrimia, taiquianati taman ñanquitioma pünanaquiti Jesús:

—¿Taqui arrüñü, Señor?

²³Aiñumuti:

—Artri naqui baso ichepeñü auqui na taman praturrü, tonenti naqui uiche aipiaventecanatiñü. ²⁴Arrüñü Ñemanauncurratoe Ñoñünrrü tiene que acoco sobi arrüna nantü icu Nicorrrü. ¡Pero taquisürütiatai naqui uiche aipiaventecanatiñü! Manrrüpü uirria arrtü chanatipü icu cürrü tücañe.

²⁵Auqui manitanati Judas, naqui uiche aipiaventecanatiti Jesús, nanti ümoti:

—Maestro, ¿taqui arrüñü? Aiñumuti Jesús:

—Arrücü te.

²⁶Nauquiche amoncoma basoma, arrti Jesús iquiatati mecuti manu pan, machampiencanati ümoti Tuparrü. Auqui chepesüro uiti y itorrimiatati ümo bama ñanunecasarri, nanti sane:

—Auba, tone nisütüpü.

²⁷Auqui iquiatatito mecuti taman coparrü aübu vinorrü niyü uva. Machampiencanati ümoti Tuparrü, auqui itorrimiatatito ümo bama ñanunecasartti, nanti sane:

—Aucha namanaiña año auqui na coparrü, ²⁸itopiqui tone niñoto arapara autopiqui icu na cürri, nauqui amorrimiaca tato nanaiña nomünantü ui macirrtianuca. Ui arrüna niñoto urriante nuevurrü tratorrü uiti Tuparrü aupu. ²⁹Sucanañü aume, chanantopü icha arrüna niyü uva, chepertrü yaca auchepe esati Uyaü auna cauta ane nüriacartti. Auqui caüma ichaca tatito.

Urapoiticaü Jesús ñapanturrti Pedro ñana

³⁰Iyaü ñacantacarrüma süromatü auqui pueblurrü onü manu yiriturrü nürirri Olivos. ³¹Acamanu nanti Jesús ümoma:

—Arraño caüma arrüna tobirri apiñococañü ui tarucu naupirruca, itopiqui nantü sane icu Nicorrrü: “Omiñarrio nobirraca arttü coiñoti naqui bacuirara yutacu”. ³²Pero arttü isüboriquia tato, isusürüca yerotü au Galilea amopünanaqui.

³³Auqui nanti Pedro:

—Arrtü maquiataca iñoconomacü ui nirrurcürüma, pero arrüñü chiñococüpü.

³⁴Auqui nanti Jesús ümoti:

—Ñemanauncurratoe sucanañü aemo: Caüma arrüna tobirri, arttü chüpuruiquipü pohorrrü, ucanu trerrü veserrü, que chasuputacapüñü.

³⁵Nanti Pedro ümoti:

—Chüpuerurrüpü. Arrtü rranrrüma aitaibairomañü achepecü, pero arrüñü chüpuerurrüpü sucanañü sane.

Sane ito nura bama maquiataca ñanunecasartti.

Anati Jesús au Getsemaní

³⁶Iñataimia au manu nürirri Getsemaní. Artti Jesús nanti ümoma:

—Autümo auna, yecatü baeta manrrü taha rrapari aübuti Iyaü.

³⁷Auqui tasuruti Pedro uiti Jesús ichepe manuma torrü, artti Jacobo y artti Juan. Sürotitü aübuma. Nauquiche tucunauntaiñamantai manuma cuatro, artti Jesús onquisiotti yarusürürrü nisuchequirrti y nirrurcürti. ³⁸Auqui nanti ümoma:

—Ñonquisio nurria caüma yarusürürrü nisuchequi niyausüpü. Abasiquia auna, tapü aumpanuca. Tari amarrtaiquiatü ichepeñü arrüna tobirri.

³⁹Auqui sürotitü manrrü tahiqui pario. Bachesoiyoti, mataconoconoti, iñatai nurria nisurrti acü, meaboti ümoti Bae Tuparrü, nanti sane:

—Iyaü, arttü puerurrü, tapü cuatü iñemo manu yarusürürrü taquisürücürü, pero tapü aiñata isiu niranca, aiña isiu narrianca.

⁴⁰Nauquiche tüchauqui neancartti ümoti Tuparrü süroti tato esa manuma ñanunecasartti, tabücoma uiti manumuma. Nanti ümoti Pedro:

—¿Chüpuerurrüpü pario amarrtaiquiatü ichepeñü ümo taman horarrü?
⁴¹Tari amarrtaiquiatü aübu napeanca ümoti Tuparrü, tapü apatacheca, arttü cuatü macocotorrü aume. Ñemanauncurratoe sucanañü aume:

Nabausüpü rranrrtaipü aüiro au nomirria, pero arrüna cürrü naucütüpü ta chütonempü nirrانتümo, chücusüurupatai.

⁴²Auqui süroti tatito eanti ümoti Tuparrü, nanti sane:

—Iyaü, arrtü chüpuerrüüpü aiquiaübu rropünanaquüñü arrücuatü nichaquisürücü itacu macirirtianuca, aña te isiu narrianca.

⁴³Numo tiñataiti tatito esa bama ñanunecasarrti, tabücoma tatito uiti manumuma, itopiqui tarucapae nirrancarrüma anuma. ⁴⁴Auqui onconoma tatito uiti, süroti tato eanti ümoti Tuparrü. Isiatu tatito nurarrti tacana arrüna primero. ⁴⁵Auqui süroti tato esa bama ñanunecasarrti y nanti ümoma:

—iCausane apacansacaiqui y aumpanucaiqui! Chauqui tiñatai horarrü nauqui aitorrimianamañü mecu bama tarucu nomünantü uimia.

⁴⁶iApatüsü, curi, itopiqui tücuati naqui uiche aipiaventecanatiñü!

Iñenomati Jesús

⁴⁷Nauquiche anancatiqui baparioti aübuma, asaratitü cümenuti Judas naqui eanaqui manuma doce ñanunecasarrti. Cuamatü isiuti sürümanama mañoñünca aübu sueca y cüseca, yacüpucu bama üriatu bama sacerdoterrü y arrübama mamayoreca. ⁴⁸Arrti Judas turapoiti tücañe nesarrti señarrü isucarü manuma icumpañeruturrti, nanti sane:

—Arrti naqui yacheca caüma besorrü ümoti, tonenti Jesús, apiñensorrti.

⁴⁹Auqui arrti Judas besüro uiti esati Jesús. Bacheboti besorrü ümoti. Manquiotito nurria ümoti, nanti: iChamurraume, maestro!

⁵⁰Arrti Jesús nanti ümoti:

—¿Ümo ayetü, saruqui? Auqui arrümanuma maquiataca cuamatü nauqui aiñenomati Jesús.

⁵¹Auqui arrti maniqui taman ñanunecasarrti Jesús iquiaübutati nicüserrti. Bacheboti uirri ümoti maniqui taman imostoti yarusürürü sacerdoterrü. Tüsüro numasurrti uiti. ⁵²Auqui nanti Jesús ümoti maniqui ñanunecasarrti:

—Aiñahübu tato manu nacüse, itopiqui arrübama bahiyoma ui cüsece, ui cüsece ito tiene que acoma. ⁵³¿Chütusiopü aemo que arrüñü puerurrüüpüñü rranqui pünanaquiti Iyaü nauqui acüputi sürümana mil angelerrü y auritarrüpatai tütaboma auna nauqui ocümama ichacuñü?

⁵⁴Pero arrtü isamute arrüna sane, quiubupü acoco arrüna nantü au Nicororrü tiene que apasa arrüna sane.

⁵⁵Auqui nanti Jesús ümo bama cuamatü iyoti:

—Abecatü yupu cüseca y sueca, na apiñenoñü, tacanarrtü cusüpürrüñü, abu naneneca nantarrü amasacañü au niporrti Tuparrü ichümoca aübu nirrannunecaca. ¿Causanempü chapiñencapüñü acamanu? ⁵⁶Pero nanaiña arrüna sane pasabo iñemo, nauqui acoco nura bama profetarrü ane icu Nicororrü.

Auqui namanaiña bama ñanunecasarrti Jesús besüburuma. Onconoti uimia.

Anati Jesús esa bama mayüriabuca

⁵⁷Arrübama uiche aïñenomati Jesús iquianamati esati yarusürürü sacerdoterrü, nürirrti Caifás. Acamanu chauqui toberabarama bama mamayoreca ichepe bama manunecana nüriacarrü. ⁵⁸Artri Pedro sürotitü isiuti Jesús auqui icheatai. Iñataiti au manu nusuara esa niporrti maniqui yarusürürü sacerdoterrü. Acamanu tümonsoti esa bama policiarrü na atusi ümoti isane pasabobo ümoti Jesús.

⁵⁹Arrümanuma üriatu sacerdoterrü ichepe manuma mamayoreca y namanaiña manuma mayüriabuca israelitarrü, bapacheroma niquiubuma causane nauqui urabomati Jesús aibu ñapanturrüma, nauqui aítabajomati. ⁶⁰Pero chütäbücopü uimia, panacapü sürümanama amoncoma acamanu aibu ñapanturrüma icütüpüti. Au nitacürürü torrüma mañonünca, ⁶¹namatü:

—Artri naqui ñonünrrü nanti tücañe sane: “Arrüñü puerurrüñü iñarrimiaca niporrti Tuparrü y au trerrü naneneca atürai tato sobi”.

⁶²Auqui artri maniqui yarusürürü sacerdoterrü atürait, nanti ümoti Jesús:

—¿Causane chaimutapü nurarrüma? ¿Ñemanauntu nurarrüma aemo?

⁶³Artri Jesús chaimutapü. Auqui artri maniqui yarusürürü sacerdoterrü nanti tatito ümoti:

—Au nürirrti Tuparrü naqui süborico, sucanañü aemo, urasoi suisucari: ¿Ñemanauntu arrücü Cristo, naqui Aütorrti Tuparrü?

⁶⁴Auqui artri Jesús inmutati:

—Ñemanauntu te arrüñü Cristoñü, tacana arrüna ucanü. Suraboira ito ausucari, tiene que amasarañü ñana ichümoca au nepanauncurrti Tuparrü naqui chiyaupü nüriacarri. Amasarañü ito ñana nisequi tato auqui napese omeanaqui cüsaiboca.

⁶⁵Auqui artri maniqui yarusürürü sacerdoterrü iquiopünatati naibirrtiatote, na atusi que ünantü ümoti, nanti sane:

—Artri naqui ñonünrrü ane nipünatenti ui arrüna isamunutiüyü tacana Tuparrü. Champü ümochetiqui terrticurrü osoi. Arraño bien tamoncoi arrüna isamunutiüyü tacana Tuparrü. ⁶⁶¿Causane napapensaca? Arrüma inmutama:

—Ane nipünatenti, sane nauquiche tiene que aconti.

⁶⁷Auqui arrümanuma aboma esati utureuruma isuti, ipubairomati. Maquiataca inompebairomati. ⁶⁸Namatü ümoti:

—Arrtü ñemanauntu arrücü Cristo, iadivinabocü ñacuti naqui ocüσιο aemo!

Artri Pedro urapoiti que chisuputaratitipü Jesús

⁶⁹Tapü artri Pedro anancati türüpo tümonsoti au nusuara. Auqui cuatü taman cumanacarrü esati, nantü ümoti:

—Arrücü ito saon anancü ichepe manu Jesús auqui Galilea.

⁷⁰Artri Pedro inmutati nurarrü isucarü namanaiña manuma amoncoma acamanu:

—Chütusiopü iñemo isane arrüna nurapoi. Chisuputacatipü.

⁷¹Auqui sürotitü abeu tururrü. Acamanu ito taman paürrü asaratü ümoti, nantü ümo manuma amoncoma acamanu:

—Arrüna noñünrrü ananca ito amenco aucutanu ichepe manu Jesús auqui Nazaret.

⁷²Acamanu mapañati tatito Pedro, itusiancatati nurria curusürrü, nanti sane:

—¡Chisuputacatipü maniqui ñoñünrrü!

⁷³Tücoboi pario cuamatü esati Pedro manuma amoncoma acamanu, namatü ümoti:

—Ñemanauntu te, arrücü ito anancü aucutanu ichepeti maniqui ñoñünrrü, itopiqui chanecanapatai arrüna nanitaca.

⁷⁴Auqui ipiaurramanatiyü Pedro y nanti sane:

—¡Chisuputacatipü maniqui ñoñünrrü!

Au manu rratorrü puru pohorrü. ⁷⁵Auqui aquionotiyü iyo arrümanu nurarri Jesús tücañe ümoti sane: “Ñemanauncurratoe sucanañü aemo, caüma arrüna tobirri chüpuruiquipü pohorrü ucanü terrü vecerrü que chasuputacapüñü”. Auqui arri Pedro sürotitü türüpo, orronene nurria ümoti y areoroti.

Torrioti Jesús ümoti Pilato

27 ¹Nauquiche tütaneneca tato, namanaiña manuma üriatu sacerdoterrü ichepe manuma mamayoreca israelitarü iyoberabaramacü tatito, nauqui chépe apachema niquiubuma causane nauqui aítabajromati Jesús. ²Tomoenoti uimia y süromatü aübuti naqui aitorrimianamati ümoti yüriaburrü rromanorrü, nürirrti Poncio Pilato.

Niconcorrti Judas

³Auqui arri Judas, naqui uiche aipiaventecanatiti Jesús, tütusio ümoti tiene que aconti Jesús. Cuatü ümoti orronene au nitusirrti ui arrüna isamutenti sane. Auqui süroti tato aitorrimianiontiño manio treinta moniquia ümo manuma üriatu sacerdoterrü y arrümanuma mamayoreca. ⁴Nanti ümoma:

—Arrüñü tarucu nomünantü sobi, itopiqui ipiaventecacati naqui champü isane nipünatenti. Arrüma iñumutama:

—¡Ümochepito soboi, coiñoti te auqui naca!

⁵Auqui arri Judas yarutaübutati manu monirri au niporrti Tuparrü. Sürotitü aiñotorrimianatiyü ape y coiñoti.

⁶Auqui arrümanuma üriatu sacerdoterrü itacümanauncutama manu monirri, namatü:

—Chüpuerurrüpü uiña na monirri eana arrüna macumanatarrü ümoti Tuparrü, itopiqui tone te bapacatarrü itobo narapaca notorrü.

⁷Auqui mapensarama acomporama taman lote ui arrümanu monirri, auna cauta aiñanama cütü bama extrajerurrü. Comprabo uimia arrümanu lote auquiche nantarrü taurrü ui bama masamunuma parropeca. ⁸Sane

nauquiche hasta caümainqui nüri arrümanu lote “cürrü itobo notorrü”.
⁹Sane cocono arrümanu nurartri profetarri Jeremías tücañe, nauquiche nanti: “Itapeonotama manio treinta moniquia, yapacata bama israelitarri itoboti. ¹⁰Ui arrümanu monirri macomporarama manu cürrü nesartri maniqui masamunu parropeca. Sane yacüpucurtri Señor”.

Anati Jesús esati Pilato

¹¹Auqui iquianamati Jesús esati maniqui yüriaburri Poncio Pilato. Artri ñanquitioti pünanaquiti Jesús:

—¿Ñemanauntu arrücü üratu bama israelitarri?

Iñumutati Jesús:

—Arrüñü te.

¹²Auqui arrümanuma mayüriabuca urabomati Jesús. Pero artri chümanitanatipü. ¹³Auqui nanti Pilato ümoti:

—¿Choncoipü arrüna churriampü nurarrüma aemo?

¹⁴Chiñumutatipü. Sane nauquiche artri yüriaburri Pilato cütobüsoti ui arrüna chiñumutatipü, chümarrtacanapüatai ñapensacartri.

Urapoimia que tiene que aconti Jesús

¹⁵Au manu pierrta parruca nantarri artri yüriaburri ane nesartri costumbrerri ataesümunucuti auqui preso ümoti taman isiu arrüna niranca macirrtianuca.

¹⁶Au manu tiemporrü anancati au preso maniqui namanaiñamantai isuputaramati, nürirri Barrabás naqui chiyaupü nipünatenti. ¹⁷Nauquiche tiyoberabaramaci macirrtianuca, artri Pilato ñanquitioti pünanaquimia:

—¿Qüiti naqui aurrianca nauqui ataesübuti auqui preso, artri Barrabás o artri Jesús naqui ümoche namatü Cristo?

¹⁸Ñanquitioti sane, itopiqui tusiatai ümoti que arrüma itorrimianamati Jesús ui arrüna ubatioma bama mayüriabuca.

¹⁹Nauquiche anancati Pilato tümonsoti nauqui acurrtati, iñatai taman mensaje ümoti ui nicüpostoti, nantü sane: “Tapü asiquia icuata manu noñünrrü champü nipünate, itopiqui nütoba iposiquia icütüpü, uirri tarucapae nirrucu”.

²⁰Arrümanuma üriatu sacerdoterrü ichepe manuma mamayoreca, uimia bataheboma bama macirrtianuca, na anquirioma nauqui ataesübuti Barrabás auqui preso, tapü artri Jesús tari comati apü curusürrü. ²¹Auqui artri yüriaburri Pilato ñanquitioti tatito pünanaqui genterri:

—¿Ñacuti naqui aurrianca na ataesübuti auqui preso sobi, artri Barrabás o artri Jesús?

Iñumutama macirrtianuca:

—Artri Barrabás.

²²Ñanquitioti Pilato:

—¿Isane niyachücoi aübuti Jesús naqui nürirri Cristo?

Auqui iñumutama aübu nitosibirrimia:

—iAiñarrti apü curusürrü!

²³Auqui iñumutati Pilato:

—¿Isanemo arrüna nipünatenti?

Auqui namatü tatito aübu nitosibirrimia:

—iAicünamunucusurrti apü curusürrü!

²⁴Auqui arrti Poncio Pilato chütusiopü ümoti causane ocümati itacuti Jesús. Nauquiche tarrtaiti tarrüchopüratai ui macrirrtianuca, bacüpuruti iyo turrü nauqui entunumiti isucarü macrirrtianuca aübu nurarrti sane:

—Chisaübupüñü niconcorrti naqui ñoñürrü, itopiqui champü isane nipünatenti. Amasasai aboiyapatoe.

²⁵Auqui namatü aübu nitosibirrimia:

—iArrüsomü ichepe bama suisaütaiqui rresponsablerrü somü caüma ümo niconcorrti!

²⁶Auqui taesüburuti Barrabás auqui preso uiti Pilato. Bacüpuruti ümo masortaboca na aicübairomati Jesús. Auqui bacüpuruti nauqui aicünamunucunumati apü curusürrü.

²⁷Auqui sürotitü Jesús ui masortaboca au palacio niporrti yüriaburrtü Pilato. Acamanu oberabarama sürümanama masortaboca itupecuti.

²⁸Iquiaübutama naibirrti, nauqui aiñama rroparrü cüturiqui cütüpüti.

²⁹Auqui iñatama taman tarusürrü cümece itati. Iñatama ito taman barrton mecuti y bachesoiyoma esati aübu nuncurrüma ümoti, namatü:

—iTaiquiana urria nisüboriquirrti naqui üriatu bama israelitarrrü!

³⁰Utureuruma isuti, iquiaübutama nibiarrrtonrrti, bacheboma itati uirri. ³¹Nauquiche temeonomati nurria, iquiaübutama manu rroparrü cüturiqui icütüpüquiti. Iñatama tato naibirrti nauqui ariorrüma aübuti aicünamunucunumati apü curusürrü.

Icünamunucunumati Jesús apü curusürrü

³²Nauquiche tüsüromatü aübuti, icuñunumati taman ñoñürrü auqui Cirene, nürirrti Simón; icüpurumati aiquianti nicurusürrti Jesús isiuti.

³³Sane nauquiche iñataimia au manu nürirri Gólgota, nantü auqui besüro “nipiai nitanu macoiñoca”. ³⁴Acamanu ichamanamati Jesús vinorrtü aübu nansibirri eana. Nauquiche tututenti Jesús arrümanu ñachamatarrüma, champürrtü arriantiqui aichabaoti.

³⁵Numo tücrabuti uimia apü curusürrü, arrümanuma masortaboca suerteabo uimia arrüba naibirrti. Sane cocono arrümanu nurarrti profetarrrü Jeremías tücañe, nauquiche nanti sane: “Suerteabo uimia arrüba nisahibi”.

³⁶Auqui tümonsoma manuma masortaboca, yacuiracarrüma itacuti.

³⁷Ane ito taurarrü, corobo icu arrüna itopiquiche aitaibairomati. Nantü sane manu nicororrrü: “Tonenti Jesús, naqui üriatu bama israelitarrrü”. Icünamunucutama ito apü curusürrü ape pario onü nitanurrti.



(Mt. 27.36)

enterurrü tomiquianene icu cürrü. ⁴⁶Auqui tosibicoti Jesús fuerte, nanti: —¿Eli, Eli, lama sabactani? —nantü auqui besüro: ¿Iyaü, Iyaü, causane aiñoconoñü?

⁴⁷Arrübama amoncoma acamanu oncoimia y namatü:

—Amonsoi, babicoti iyoti profetarrü Elías.

⁴⁸Au manu rratörriü ipiacünotiyü taman uturuquimia aipiancati taman rriese ui vinorrü pichananene, süro uiti icutacu suema. Auqui iñatati ituruti Jesús, nauqui aichabaotipü. ⁴⁹Pero maquiataca namatü:

—Asioti sane; basaborira arrtü cuati Elías ocümati itacuti.

⁵⁰Auqui tosibicoti tatito Jesús fuerte y coiñoti. ⁵¹Au manu rratörriü quiopüro cortina au niporrti Tuparrü cümüintaqui, y paichocono cürrü y butarubu canca. ⁵²Ubaurübo sürümana nicü bama macoiñoca.

³⁸Süroma ito torrüma macusüpüca apü nicurusürrüma, tamanti au nepanauncurrti Jesús, arrti quiatarrü au nepaurrti. ³⁹Arrübama pasaoma esaquiti itatobiromacü aübu nuncurrüma ümoti, ⁴⁰namatü:

—Arrücü ucanü que puerurrü aiñarrimia niporrti Tuparrü y aiñatünaca tato au trerrü naneneca. Aitaesümunusü obiatoe, arrtü ñemanauntu Aütorrti Tuparrücü, ariacu acü apüqui manu curusürrü.

⁴¹Sane ito nura manuma üriatu sacerdoterrü ichepe manuma manunecana nüriacarrü y bama mamayoreca, namatü ümomantoe:

⁴²—Bayurati ümo maquiataca, pero ümotiatoe chüpuerurrütipü ayurati. Arrtü üriatu bama israelitarrti, tari yebati acü apüqui manu curusürrü, nauqui uicocoroti. ⁴³Oncotitü ümoti Tuparrü. Tari yayurati Tuparrü caüma ümoti, arrtü ñemanauntu arrüna nanti oemo que arrti Aütorrti Tuparrü.

⁴⁴Sane ito nuncurrüma ümoti manuma macusüpüca aboma apü nicurusürrüma esati.

Niconcorrti Jesús

⁴⁵Auqui iñatai toce. Auquimanu caüma hasta las trerrü isiu nimümürriü

Nauquiche túsüboricoti tato Jesús sürümanama süboricoma tato, bama icocoromati Tuparrü tücañe. ⁵³Arrüma süromatü au Jerusalén. Acamanu sürümanama macrirrtianuca asaramatü ümoma.

⁵⁴Auqui arrti capitán ichepe masortaboca bama bacuirarama itacuti Jesús, birrubuma ui na arrtaimia paichoconono cürrü y ausüratai pasabo. Namatü ümomantoe:

—Ñemanauntu arrti naqui ñoñünrrü tonenti Aütorrti Tuparrü.

⁵⁵Acamanu amonquio sürümana paüca arrüba cuantio tücañe auqui Galilea isiuti Jesús arrüba payurara ümoti. Arrio amonquio pasabori nanaiña arrüba pasabo auqui icheheñatai. ⁵⁶Omeana ananca Mariarrü Magdalena, ananca ito Mariarrü nipiácütoti Jacobo y arrti José y arrümanu nipiácüto bama aütorrti Zebedeo.

Iñanamati cütu Jesús

⁵⁷Nauquiche tütobiqia, cuati maniqui taman ñoñünrrü rricurrü nürirrti José. Arrti auqui manu pueblurrü nürirri Arimatea. Icorotitito Jesús. ⁵⁸Arrti yebotitü esati yüriaburrü Pilato anquiriotti pünanaqiti nicunturrti Jesús. Auqui arrti Pilato bacüpuruti na atorri ümoti. ⁵⁹Arrti maniqui José icümurrianecatati nurria nicunturrti Jesús ui taman cüburri bien aseabo. ⁶⁰Auqui iñatati au manu nusutu canrrü, arrüna paura uiti ümoti, ümorrtü coiñoti, icüboti. Nauquiche tütaburrio uiti manu nusuturrü ui canrrü sürümanarrü, süroti tato. ⁶¹Acamanu ananca ito María Magdalena, ichepe quiatarrü Mariarrü, motümonso esa manu nusuturrü.



(Mt. 27.60)

**Bacuirarama masortaboca itacu
nicunturrti Jesús**

⁶²Au manu quiatarrü nanenese nesa macansacarrü (sabaro), arrümanuma üriatu sacerdoterrü ichepe manuma fariseorrü yebomatü esati Pilato, ⁶³namatü ümoti:

—Arrücü yüriaburrücü, suburaboira asucarücü que arrüsomü supaquionca somünqui ümo arrone nanti tücañe maniqui ñapanrrü Jesús, nauquiche süboricotiqui, arrtü tübupasao trerrü naneneca niconcorrti tiene que asüboriti tato. ⁶⁴Sane nauquiche acüpu ümo masortaboca nauqui asegurabo nurria uimia nituru manu nusuturrü cauta ane nicunturrti, y nauqui acuirama itacu cheperrtü bupasao manio trerrü naneneca. Tapü cuamatü bama ñanunecasarrti au tobirri aicusüpüriuma nicunturrti. Sane caüma puerurrüpü uraboimia isucarü macrirrtianuca que süboricoti tato. Auqui caüma manrrü tarucu arrüna mapancarrü pünanaqui arrümanu primero.

⁶⁵Auqui arrti Pilato nanti ümoma:

—Rracüpura ümo masortaboca nauqui aüromatü acuirama itacu manu nusuturrü auchepe. Amecosi te asegurabo nurria aboi isiu naca arrüna puerurrü año.

⁶⁶Auqui arrümanuma üriatu sacerdoterrü süromatü aübu masortaboca na acuirama itacu manu nusuturrü nauqui asegurabo uimia. Iñama ito arrüna uiche emana manu canrrü nitaburri manu nusuturrü, na atusi arrtü pocoro tato. Auqui süroma tato manuma mayüriabuca, tapü masortaboca onconoma acamanu acuirama itacu.

Nisüboriquirrti tato Jesús

28 ¹Iñatai manu nanenese tominco. Aübapae anene sürotü María Magdalena ichepe quiatarrü Mariarrü amasabori ümo nicürrti Jesús.

²Au manu rratörri paichoconono cürri, abu ta niyequirrti taman ángel auqui napese uiti Señor, nauqui aiquiaübuti manu canrrü ituruqui nusuturrü. Nauquiche tücarübu uiti manu canrrü, tümonsoti onü. ³Anentarrtai nacarrti y naibirrti champü tacanache nipurusubiquirri. ⁴Nauquiche tarrtaimia masortaboca arrüna sane, paichocononoma ui nirrucurrüma y süsioma tacana coiñoma. ⁵Opiñatai acamanu manio paüca. Auqui nanti ángel ñome:

—¡Tapü aupirruca! Tusio inemo que apapachequiucati Jesús naqui süroti apü curusürrü uimia. ⁶Champütiqui auna, tüsüboricoti tato. Supia ausiapata apasabori auna cauta aiñanamati. ⁷Amecosi tato apuraurraño aburaboi isucarü bama ñanunecasarrti sane: “Tüsüboricoti tato eanaqui macoiñoca y tiene que acusürüti ariorrti au Galilea amopünanaqui. Taha tiene que amasarati”. Ümo isetü suraboi ausucarü.

Sane nanti ángel ñome manio paüca.

⁸Auqui omenotü esaqui nusuturrü apuraurrio nurria tanu aübu yupirrucurrü y tacane tarucu niñupucünuncurrü aburaboi isucarü bama ñanunecasarrti. ⁹Au manu rratorrü itusiancanatiyü Jesús yusucarü. Manquioti nurria ñome. Auqui arrio panaunu ümoti, opitañumenio nurria nipoperri. ¹⁰Arrti nanti ñome:

—Tapü aupirruca. Amecosi aburaboi isucarü bama masaruquитайqui, tari yeracamatü au Galilea arrüperama isümenuñü, nauqui asaramañü.

Arrüna nurapويمia manuma masortaboca

¹¹Nauquiche tomenotü manio paüca, aboma bama eanaqui manuma masortaboca süroma tato au pueblurrü uraboimia isucarü bama üriatu sacerdoterrü nanaiña arrüna pasabo. ¹²Auqui arrüma süromatü esa bama mamayoreca na aparimia aübuma. Bacheboma chama monirri ümo manuma masortaboca. ¹³Namatü ümoma:

—Arraño aburasoi isucarü genterrü que arrübama ñanunecasarrti Jesús icusüpütiuma nicunturrti, nauquiche amoncaño aumpanuca. ¹⁴Arrtü ipiatenti yüriaburrü arrüna sane, supapariquia nurria aübuti, tapü tüboricoti aume. ¹⁵Auqui arrümanuma masortaboca isamutema isiu arrümanu nurarrüma ümoma. Yasutiuma manu chama monirri. Sane nauquiche arrübama israelitarrü icocotama hasta caümainqui.

Arrti Jesús bacüpuruti ümo bama apostolerrü

¹⁶Sane nauquiche arrümanuma once ñanunecasarrti, süromatü au Galilea onü manu yiriturrü, auna cauta tiene que asaramati Jesús. ¹⁷Nauquiche tasaramati, manaunuma ümoti. Pero aboma bama chicocotapü nurria arrtü tonenti. ¹⁸Arrti Jesús sürotitü esama, nanti ümoma:

—Ane nisüriaca caüma au napese y auna ito icu na cürrü. ¹⁹Sane nauquiche amecosi au nanaiñantai icu na cürrü. Apiñununecasama macirrtianuca nauqui aicocoromañü. Apaunimia ümoma au nürirrti naqui Uyaü, au nisüri, y au nürirri naqui Espíritu Santo. ²⁰Apiñununecasama ito na acoconauma ümo arrüna nirracüpucu aume. Tapü tacürusu ito napaquionco iyo arrüna sane: Arrüñüü yaca anchepe cheperrtü tiñatai ñapacümuncuturrti Tuparrü. Amén.